

ISAIAS

I mul Judá

1 Ti jim ba ora che' añob i ye'tel ti rey ya' ti Judá* jini Uzías, yic'ot Jotam, yic'ot Acáz yic'ot Ezequías, jini Isaías i yalobil Amoz tsi' q'uele ti espíritu jini winicob ya' ti Judá yic'ot ti Jerusalén.

Lac Yum tsi' pasbe Isaías bajche' yilalob. ²Tsi' ya^{la}: Ñich'tanla c t'an, añet ba la ti panchan yic'ot ti pañimil. Tsac lon cosa calobilob. Tsac lon cantayob. Wolix i chañ'esañob i ba tij contra. ³Jini wacax mi' can i yum. Jini burro mi' wen camben i yotot i yum ba' mi' taj i buc'bal. Pero Israel* ma'anic mi' ch'amben isujm. Jini mero c cha'año' ba ma'anic mi' cañonob.

⁴Cabal jax i mul jini año' ba ti Judá. Calax but'ulob jax ti jontolil. I yalobilob xñusa t'añob. Tsa'ix i ñajtesayob i ba ba' año. Tsa'ix i ts'a'leyob jini Ch'ujul Ba i cha'an Israel.

⁵Tsa'ix i tats'ayob i ba tic tojlel. ¿Chucoch la' wom mic chan bajbeñetla ti asiyal? ¿Mu ba caj la' chan chañ'esan la' ba? Cabal i c'amajel la' jol. Tsa'ix junyajlel c'uñ'ayetla. ⁶C'alal ti' la' xinjol yic'ot c'alal ti' mal la' woc ma'anic la' c'oc'lel, lojwemetla, sit'iletla. Tsa' wen yax'a la' bac'tal, ñuqui ech'elix la' tsoy. Ma'anic majqui tsi' pixbeyetla. Ma'anic majqui tsi' bombeyetla ti aceite mi ti ts'ac cha'an mi' lajmel i c'uxel.

⁷Pujch'emix a lum Judá. Tsa'ix sujti ti c'anc'an. Tiquinix. Pulbilix a tejclum tac. Jini ñajt ba ch'oyolob woli' c'uxob i wut a pac'bal che' tulul a wut wola' q'uelob. ⁸Jini jach tsa' cale Sion, che' bajche' caybilix ba lejchempat ya' ti ts'usubil, che' bajche' caybilix ba i yotlel ixim ti cholel che' ujtemix i yorajlel

c'ajbal. Tsa' c'ale che' bajche' tejclum joyol ba' ti' contrajob, che'en lac Yum. ⁹Ts'ita jax tsa' c'aleyonla, mach oñonixla. Machic tsi' coltasyonla i Yum Panchan yic'ot Pañimil, tsa' jisantiyonla che' bajche' Sodoma yic'ot Gomorra.

Dios yom mi la cajñel ti ch'ujul

¹⁰Winicob año' ba' la' we'tel ti Israel, lajaletla bajche' i yumob Sodoma yic'ot Gomorra. Wen ñich'tanla chuqui mi' yal lac Yum. Ubinla i mandar Dios. ¹¹Woli' yal lac Yum: ¿Chuqui to i ye'tel mi la' chan tsansabeñon c majtan*? Anquese cabal, mach tijicñayic c pusic'al. Tsa'ix c'ojyi j q'uel la' majtan tac. Mach chan comix tat tiñame' yic'ot i lewil i yal wacax. Mux c bil'en i ch'ich'el tat wacax yic'ot ala tiñame' yic'ot i tat chivo.

¹²Mi la' lon tilel la' pas la' ba' tic tojlel. Pero mach comic mi la' t'uchtan ili cajñib, come ma'anic mi la' mel la' pusic'al cha'an la' mul. ¹³Mach comix mi la' ch'ambeñon tilel c majtan. Ts'a' mij q'uel i butsil pom. Ts'a' mij q'ueletla che' mi la' tempan la' ba' yic'ot la' pi'lob cha'an mi la' melben i q'uiñilel jini tsiji' ba' uw yic'ot i q'uiñilel c'aj o. Mach cujchix c cha'an la' mul. Mach tijicñayonic che' mi la' tempan la' ba' cha'an mi la' ch'ujutesañon. ¹⁴Mi la' lon mel q'uin ti' yorajlel tsiji' ba' uw yic'ot ti yan tac ba' ora. Mach cujchix c cha'an. Mach comix j q'uel. ¹⁵Che mi la' lon letsan la' c'ab tic tojlel cha'an mi la' pejcañon ti oración, mux caj c may c wut. Anquese cabal mi la' cha'len oración, mi wisilic mi caj c jac'beñetla cha'an ti' caj stsansajetla, xbec' ch'ich'etla. ¹⁶¡Pocox la' ba'; saq'uesan la' ba! ¡Cayax la' mel jontolil ti' tojel c wut! ¹⁷¡Nopox la' mel chuqui uts'at! Cantesan la' ba' ti' melol jini toj ba' ti' tojlel año' ba'. Tiq'uila xjontolilob, coltanla jini p'ump'uño' ba' yic'ot jini meba' alobob yic'ot meba' x'ixicob, che'en.

¹⁸Woli' chan al lac Yum: La' cula, la' lac tem cha'len t'an. Anquese wen chacts' eran jini la' mul, lajal mi caj i sujtel bajche' ña'al tsañal. Anquese wen chachac jini la' mul, lajal mi caj i sujtel bajche' wen sasac ba' tsuts. ¹⁹Mi la' wom la' waq'ueñon la' pusic'al cha'an mi la' jac'beñon c t'an, mi caj la' c'ux jini c'ax sumuc ba' pac'abal. ²⁰Pero mi mach la' womic, mi chan tsats la' pusic'al mi la' ñusabeñon c t'an, mi caj la' jilel ti espada ti' c'ab la' contrajob. Che' tsi' yala lac Yum.

Lac Yum mi caj i cha' coltan Jerusalén

²¹Jerusalén, xuc'ul tsa' ajniyet ti ñaxan che' bajche' xuc'ul ba x'ixic, pero tsa'ix sujtiyetla ti sts'i'lel. Ti ñaxan wen tojet. Tsa' cha'le toj ba meloñel, pero wale tsa'ix p'ojliyob sts'ansajob ti yojlil tejclum. ²²Ti ñaxan lajaletla bajche' plata, pero wale tsa'ix sujtiyetla ti misujelal. Ti ñaxan lajaletla bajche' vino, pero wale supetixla yilal. ²³Jini yumalob la' cha'an xñusa t'añob, i pi'Alobach xujch'. Mi ch'Amob taq'uin cha'an mi' mucbeñob i mul i pi'Alob. Mu' jach i saclañob i majtan. Ma'anic mi' wen coltañob jini meba'ob. Ma'anic mi' p'isob ti wenta i wocol t'an jini meba' x'ixicob.

²⁴Jini cha'an i Dios Panchan yic'ot Pañimil, jini P'Atal ba i cha'an Israel, woli' yal: A wila to, mi caj caq'ueñob i toj i mul pejtelel mu' ba i contrajiñoñob. I yorajlelix mij q'uextabeñob i mul j contrajob. ²⁵Mi caj j contrajiñetla. Mi caj c pul a bibi'lel ti babaq'uen ba c'ajc, cha'an mic junyajlel loc'san la' jontolil. ²⁶Mi caj c cha' aq'ueñet uts'at ba yumalob yic'ot toj ba xtoj'esayayob che' bajche' ti ñaxan. Che' jini mi caj i yalob: "Jiñach uts'at ba tejclum baqui mi' melob chuqui toj. Xuc'ul ba tejclum", che'ob.

²⁷Mi caj j coltan jini año' ba ti Jerusalén ti toj ba meloñel. Ti toj ba c pusic'al mi caj j coltan jini mu' ba i cha' sutq'uiñoob i ba tic tojlel. ²⁸Pero mi caj c bic'ti jisan jini xmulilob mu' ba i juch'tec'ob c t'an. Mi caj i jilelob pejtel mu' ba i cayoñob. ²⁹Mi caj la' wen ubin quisin cha'an tsa' la' ch'ujutesa dioste' tac ti yebal c'olol te'. Mi' caj ti chac'an la' wut cha'an tsa' la' ñusayon ya' ti jini pac'Abal tac tsa' ba la' mula. ³⁰Mi caj la' c'aytal che' bajche' jini c'olol te' laj tiquinix ba i yopol, yic'ot pac'Abal mach ba anix mi' mujlel ti ja'. ³¹Jini p'Atal ba winic lajal jax mi caj i majlel bajche' tiquin ba jam. Jini i melbal lajalach bajche ts'aplaw ba nich c'ajc mu' ba caj i jisan. Ma'anic majqui mi caj i yalp.

Mi caj i majlel i cha'an i yumantel Dios

(Mi. 4.1-3)

2 Jiñach tsa' ba i q'uele Isaías (i yalobil Amoz). Tsi' q'uele chuqui mi' caj ti ujtet ti Judá yic'ot ti Jerusalén: ²Ti jini tal to ba q'uin, jini wits ba' wa'chocobil i Templo

lac Yum, ñumen ñuc mi caj i yajñel che' bajche yan tac ba wits. Winicob ch'oyolo' ba ti pejtelel lum mi caj i tilelob ti ch'ujutesaya. ³Cabal winicob tilemo' ba ti yan tac ba tejclum mi caj i yalob: "La' letsiconla ti' wits lac Yum, ya' ti' Templo i Dios Jacob, cha'an mi' pasbeñonla toj ba i bijlel, cha'an mi mejlel lac tsajcan majlel. Come ya' ti Sion mi caj i cantesañonla. Ya'ach ti Jerusalén mi caj i loq'uel i t'an lac Yum", che'ob. ⁴Lac Yum mi caj i cha'len meloñel ti' tojlel pejtelel winicob x'ixicob cha'an mi' lajmel leto ti' tojlelob. Jini e'tijibal cha'an guerra mi caj i sujtel ti e'tijibal cha'an cholel. Ma'anix mi caj i chan cha'len contra jump'ejl tejclum ti' tojlel yamba. Ma'anix mi caj i chan ñopob guerra.

I tojol i mul xñusa t'an

⁵Conla winicob, i yalobiletla Jacob. La' lac cha'len xambal ti' saclel lac Yum. ⁶C Yum Dios tsa'ix i caya i cha'año' ba, i p'olbalob Jacob, come woli' jac'ob xwujtob tilemo' ba ti' pasibal q'uin mu' ba i to'ol ña'tañob chuqui tac mi' caj ti ujtcl. Che' ja'el woli' jac'ob winicob mu' ba i pejcañob xibajob che' bajche' mi' melob jini filisteojob. Woli' temob i t'an yic'ot jini ñajt ba ch'oyolob. ⁷An cabal oro yic'ot plata ti Israel, yic'ot cabal jax chuba'añal. An cabal caballo yic'ot carreta. ⁸An ja'el cabal dioste' tac ti' petol pañimil. Mi' ñocchocoñob i ba cha'an mi' ch'ujutesañob. I walac melbalob i c'ab. ⁹Lac Yum mi caj i choc tilel wocol cha'an mi' peq'uesañetla. Ma'anic mi caj i ñusabeñetla la' mul. ¹⁰Cucula ti ochel ti' ch'eñal colem ba xajlel. Mucu la' ba ti mal lum, come c'ax babaq'uen jax jini lac Yum, come cabal i c'ac'al yic'ot i ñuclel. ¹¹Jini winicob ñuc ba mi' q'uelob i ba, wersa mi caj i lijob i ba. Jini chan ba mi melob i ba wersa mi caj i peq'uesantelob. Ti jim ba q'uin jini jach lac Yum mi caj i q'uejlel ti ñuc.

Dios mi' peq'uesan jini chan ba mi' melob i ba

¹²Ti jim ba q'uin i Yum Panchan yic'ot Pañimil mi caj i tech meloñel ti' contra pejtelel jini ñuco' ba yic'ot jini chaño' ba yic'ot jini xñusa t'añob, cha'an mi' ju'sabeñob i pusic'al. ¹³Mi caj i jisabeñob i p'atalel pejtcl mu' ba i chañ'esañob i ba che' bajche' jini ch'ujte' am ba ti Líbano, yic'ot c'olol te' am ba ti Basán. ¹⁴Mi caj i tsictiyel ñumen ñuc Dios bajche' pejtelel

jini chan ba wits, yic'ot pejtelel chan ba bujtal. ¹⁵Mi caj i jem pejtelel jini chan ba ts'ajc, yic'ot jini ts'ajc am ba ti' joytalel colem tejclum. ¹⁶Mi caj i jisan pejtél jini colem barco ya' ti Tarsis, yic'ot jini wen i t'ojol tac ba barco ba' mi' challeñob xλmbal jini wen chumulo' ba. ¹⁷Mi caj i peq'uesan jini ñuco ba mu' ba i lon chañ'esañob i ba. Mi caj i jultesλbeñob i pusic'al winicob chan ba mi' melob i ba. Cojach lac Yum mi caj i q'uejlel ti ñuc che' ti jini q'uin. ¹⁸Mi caj i sacλ jilelob pejtél jini melbil tac ba diosob. ¹⁹Che' mi' tejchel wa'tal lac Yum ti' ñuclel yic'ot ti' c'ac'al cha'an mi' bac'tesan jini año' ba ti pañimil, mi caj i lon puts'elob ti ch'entun tac yic'ot ti mal japal ba xajlel. ²⁰Ti jim ba q'uin winicob mi caj i chocob ba'an tsuc yic'ot suts' jini dios tac tsa' ba i yajcayob, melbil ba ti oro yic'ot ti plata. ²¹Mi caj i yochelob ti puts'el ba' tocol tac i mal xajlel, yic'ot jajp tac ch'en ya' ti xajlelol, che' mi' tilel lac Yum ti' c'ac'al yic'ot ti' nuclel cha'an mi' bac'tesan jini año' ba ti pañimil. ²²Jini cha'an cλyax la' xuc'chocon la' pusic'al ti winicob. ¿Chuqui to mi caj i yaq'ueñetla? Jumuc' jach mi' japob ic' ti pañimil.

I tojol i mul Judá yic'ot Jerusalén

3 Awilan, i Yum Panchan yic'ot Pañimil mi caj i chilbeñob i chuba'an jini año' ba ti Judá yic'ot ti Jerusalén. Mi caj i chilbeñob chuqui mi' c'uxob yic'ot chuqui mi' japob. ²Mi caj i laj jisan jini wen ch'ejlo' ba, yic'ot yujilo' ba guerra, yic'ot xmelojelob, yic'ot x'alt'añob, mu' ba i bajnel ña'tañob chuqui tac jach mi' ña'tañob, yic'ot xñoxob, ³yic'ot i yumob soldadojob, yic'ot wen chumulo' ba, yic'ot xtoj'esayajob, yic'ot xwujtob yic'ot xtic'layajob. ⁴Mi caj i yaq'ueñob i yuman ch'itoñob. Jini alobob mi caj i challeñob yumal. ⁵Ya' ti' tejclumob mi caj i walac challeñob leto anquese i cλñayob i ba. Jini ch'iton winicob mi caj i contrajiñob jini xñoxob. Jini ts'a'lebil ba mi caj i contrajin jini mu' ba i q'uejlel ti ñuc.

⁶Juntiquil winic mi caj i suben i yeran: An cabal a pislel. Uts'at ma' wochel tic yum lojon. Ch'λmλyon lojon ti a wenta come pujch'emonix lojon, che'en. ⁷Pero i yeran mi caj i jac': Mach mejlic c ch'λm jini e'tel, come wa' ti cotot ma'anix chuqui mij c'ux yic'ot chuqui mic lap. Mach comic c cha'len yumal, che'en. ⁸Jini año' ba ti Jerusalén tsa'ix i jats'lyob i

yoc. Tsa'ix yajli Judá. Jochocña mi caj i cʎʎʎʎ. Come jontol tsi' cha'leyob t'an ti contra lac Yum, jontol i melbalob. Tsi' ts'a'leyob i ñuclel. Tsi' techbeyob i mich'ajel.

⁹Mach mejlic i mucob i mul. Tsiqil ti' wut. Mi' pam tsictesañob i mul che' bajche' Sodoma. Mach yujilobic quisin. ¡P'umpuñob jax! Woli jach i yʎc'ob i bʎ ti wocol. ¹⁰Pero uts'at mi caj i loq'uel pejtel chuqui mi' mel jini xuc'ul bʎ winic. Suben mi caj i taj i chobejtʎbal cha'an uts'at i melbal. ¹¹Pero ch'ijiyemob jax jini xjontolilob. Mach uts'atic mi caj i loq'uel chuqui mi' ña'tañob i mel, come Dios mi caj i yʎq'ueñob i toj ti ts'ʎʎʎ pejtel i mul. ¹²Alobob woli' wolts'iñob jini tejclum. X'ixicob woli' cha'leñob yumʎ. P'ump'uñetla c cha'añet bʎ la, come woli' lotiñetla jini mu' bʎ i lon toj'sañetla. Woli' pʎyetla majlel ba' mach uts'atic.

¹³Lac Yum tsa'ix i chajpa i bʎ cha'an mi' cha'len meloñel. Chajpʎbilix cha'an mi' yʎq'ueñob i toj i mul winicob x'ixicob. ¹⁴Lac Yum mi caj i pʎ jini xñoxob yic'ot i yumob tejclum tac cha'an mi' melob. Mi caj i subeñob: An la' mul ti' tojlel c cha'año' bʎ. Tsa'ix la' jisa c ts'usubil. Tsa' la' xujch'ibeyob i chubʎ'an jini p'ump'uño' bʎ. Lotolix ti la wotot. ¹⁵¿Chucoch mi la' tic'lan c tejclumob che' bajche' jini? P'ump'un jax, xʎjñʎc' t'uchtʎbilob ti' wut yilal, che'en lac Yum Dios, i Yum Panchan yic'ot Pañimil.

I tojol i mul x'ixicob ti Jerusalén

¹⁶Lac Yum tsi' yʎʎʎ ja'el: Jini x'ixicob ti Sion, wen ñuc mi' q'uelob i bʎ. Chan mi' letsañob i wut che' mi' cha'leñob xʎmbal. Mach yujilobic quisin. Lʎtslʎtsña mi' cha'leñob xʎmbal, ch'o'jch'oña i ch'ʎjlil i yoc. ¹⁷Jini cha'an lac Yum mi caj i yʎq'ueñob i tsoyil i jol. To'ol chʎcpirañob i jol mi caj i cʎʎʎʎ cha'an leco bʎ i tsoy. Lac Yum mi caj i yʎc'ob ti tic'ʎantel che' pits'ilob ti' wut pejtel pañimil. ¹⁸Ti jim bʎ q'uin che' mi' tejchel meloñel, lac Yum mi caj i chilbeñob pejtelel i ch'ʎjlil: I ch'ʎjlil i yoc, jiñi xotol tac bʎ ti' jol, ¹⁹i yuj, i yuya', yic'ot i mosil tac i jol, ²⁰yic'ot i ñejt'il tac i jol, yic'ot i cʎjchib i bic' i c'ʎb, yic'ot jini mu' bʎ i welwel cʎchob ti' ñʎc', i cajchiñʎc', yic'ot jini perfume jʎts'ʎcña tac bʎ i yujts'il, ²¹yic'ot mʎtc'ʎbʎʎ, yic'ot i ch'ʎjlil i ni', ²²yic'ot i t'o'jol jax bʎ i pislelob, yic'ot i tajsil yic'ot rebozo yic'ot i bolsajob, ²³i

yespejjob, yic'ot xelajal yic'ot seda pisil, yic'ot i pixol, yic'ot i mosil i wut.

²⁴Ti jim ba ora ma'anix xojocña ba i ts'acal i cuctal. Tuw mi caj i yubiñob. Ti' q'uexol jini cajchiñac' mi caj i clajchelob ti lazo. Mach chlan xibubilix i tsutsel i jol, chacpiran mi caj i sujtet. Ti' q'uexol fino ba i pisel mi caj i lapob coxtal. Ti' q'uexol i t'ojlawel, mi caj i ñotbentel jini ticaw ba tsucu taq'uin cha'an mi' yotsabentel i marcajlel i yum. ²⁵Jini a winicob mi caj i tsansantelob ti guerra. Jini wen yujilo' ba guerra mi caj i jisantelob cha'an i contrajob. ²⁶Jini xtejclumob mi' cajelob ti uq'uel. Mi caj i lapob i pisel meba'ob. Ch'ijiyem mi caj i claytal jini tejclum. Jejmenix i ti' tac.

4 Ti jim ba q'uin ma'anix jaytiquil mi' claytal winicob. Wuctiquil x'ixicob mi caj i cajatañob juntiquil winic. Mi caj i yalob: A wocolic payayon lojon. Ma'anic mi caj a wubin wocol come mi caj c walac mac'lan lojon c ba. Mi caj j q'uel lojon bajche' mic taj lojon c pisel. Payayon lojon come quisintic jax mi cubin lojon che' ma'anic c ñoxi'al lojon. Che' mi caj i yalob.

I ñuclel jini Mesías ti wi'il ba q'uin

²⁻⁴Ti jini wi'il ba q'uin mi caj i tsictiyel jini Mesías*, che' bajche' mi' ch'ocan i buts tsa' ba i pac'la lac Yum. Jini cuxulob to ba ti Israel i t'ojol jax mi caj i q'uelob. Jiñach i ch'ajlil yic'ot i ñuclel. Uts'at mi caj i yalq'ueñob i yonlel i wut jini lum. Jini cuxulob to ba tsa' ba coliyob ti wocol, tsa' ba caleyob ti Jerusalén, ochemo' ba i c'aba'ob ti' juñilel laj cuxtalel, mi caj i pejcantelob ti “Ch'ujulo' ba i cha'an lac Yum” che' ba tsa'ix i pulbeyob i bibi'lel. I yEspíritu lac Yum mi caj i loc'sabeñob i bibi'al i mul ya' ba' tsa' bejq'ui i ch'ich'el jini tsansabilo' ba. ⁵Lac Yum mi caj i yac' buts' yic'ot total che' ti q'uiñil cha'an mi' mos jini wits i c'aba' Sion yic'ot pejtet otot an tac ba ti Jerusalén. Tsiquil woli' cantañob. Che' ti ac'alel mi caj i yac' c'ajc che' bajche' total. I ñuclel lac Yum mi caj i yajñel ti' chañelal jini tejclum ba' mi caj i q'uejlel ti pejtelelob. ⁶Che' jini lac Yum mi caj i cantan i cha'año' ba ame tajlecob cha'an i contrajob. Ya'an puts'ib ba' mi caj i tajob axñal che' wen c'ux q'uin, ba' tijicña mi' yajñelob ti' yorajlel ja'al yic'ot ic' yic'ot chajc.

I lajintel Judá yic'ot ts'usubil

5 Mi caj j c'ayin jini c'ux ba mi cubin. Jiñach i c'ayintel i ts'usubil j cañal ba mu' ba j c'uxbin. An i ts'usubil ti jumpejt wen ba lum. ²Tsi' top'o jini lum, tsi' laj loc'sa jini xajlel tac. Tsi' pac'la jini wen c'oc' ba pac'. Ya' ti yojlil, tsi' wa'choco chan ba ts'ajc cha'an mi' cantan. Tsi' wan mele ja'el jump'ejl ajñibal ba' mi' yajts'el jini ts'usub. Che' jini tsa' caji i pijtan cha'an mi' yac' i wut jini ts'usubil, pero wen paj jach tsa' loq'ui i wut. Ma'anic tsaj ba i wut.

³Tsi' yala lac Yum: Jini cha'an, winicob ti Jerusalén yic'ot ti Judá, yom mi la' ña'tan majqui an i mul mi joñon o mi jini c ts'usubil. ⁴¿Chuqui to yom mic mel ya' tic ts'usubil? ¿Anto ba chuqui ma'anic tsac melbe? ¿Chucoch wen paj tsi' yac'la i wut? ¿Chucoch ma'anic tsi yal'ueyon tsaj ba i wut?

⁵Mi caj c subeñetla chuqui mi caj c tumben c ts'usubil. Mux caj c jemben i majquil cha'an mi' sujtet ti potrero. Alac'al tac mi caj i yochel i t'uchtan ba' tocol i ts'ajquil. ⁶Mux caj c junyajlel cly. Ma'anix mi caj c chan ac' ti porajintel mi ti ac'ñantel. La' to wats pim'ac ti ch'ixol yic'ot tsajatuñol. Mux caj c tic' jini tocal cha'an ma'anix mi' chan yasan ja'al ya' ti' tojlel. Che' tsi' yala lac Yum.

⁷Jini i ts'usubil i Yum Panchan yic'ot Pañimil, jiñach Israel yic'ot Judá. Jiñach i pac'ab c'uxbibil i cha'an. Lac Yum tsi' lon pijta cha'an mi' wen jac'beñob i mandar, pero laj stsansajob. Tsi' lon pijta chuqui tac uts'at. Tsa' jach i yubibeyob i yuq'uel jini tic'labilo' ba.

T'an ti' contra jini xjontolilob ti Judá

⁸Obol jax la' ba jatetla mu' ba la' man cabal la' wotot, mu' ba la' mactan cabal lum. Jini jach mi la' lon ña'tan chuqui yom la' bajñel pusic'al cha'an wen chumuletla ti pañimil.

⁹Lac Yum tsa'ix i tsictesabeyon: Jocholix jini colem otot wen uts'at tac ba. Ma'añobix i yumob. ¹⁰Mi caj i lon pac'ob uxp'ejl hectárea i ts'usubil, pero ya champ'ejl jach litro mi caj i loq'uel i ya'lel. Mi caj i lon pac'ob lujuncujch pac', pero ya juncujch jach mi caj i yac' i wut.

¹¹P'ump'un jax mi caj la' wubin jatetla, come seb to mi la' loq'uel majlel ti lembal. Che' ac'alelix mi la' sujtet. ¹²Mi la'

cha'len q'uiñijel yic'ot lembal, yic'ot música, guitarra, lajte', yic'ot aMAY. Pero ma'anic mi la' p'is ti wenta i t'an lac Yum.

¹³ Jini cha'an lac Yum mux caj i choquetla majlel ti cajchel ti ñajt bΛ pañimil, come ma'anic mi la' ch'Λmben isujm i t'an lac Yum. Mi caj la' chΛmel ti wi'ñal yic'ot tiquin ti' ti la' pejtelel, jini ñuc taco' bΛ yic'ot p'ump'uño' bΛ ja'el. ¹⁴ Jini i yajñib chΛmeño' bΛ woli' caw i yej yilal che' bajche' ajin, cha'an mi' masan jini tejclum yic'ot i chubΛ'an yic'ot pejtél jini tijicñayo' bΛ mu' bΛ i c'uxbiñob pañimil. ¹⁵ Ti jim bΛ ora mi caj i peq'uesΛntelob jini winicob mu' bΛ i chañ'esañoob i bΛ. Mi caj i ju'sΛbentel i pusic'al jini ñuc bΛ mi' q'uel i bΛ. ¹⁶ I Yum Panchan yic'ot Pañimil mi caj i pas i ñuclel ti toj bΛ meloñel. Jini Ch'ujul bΛ Dios mi caj i pas i bΛ ti ch'ujul come toj pejtél chuqui mi' cha'len. ¹⁷ Jini colem tejclum mi caj i sujtel ti' buc'ujib alΛc'Al ba' mi caj i cha'len buc'bal tiñΛme' yic'ot chivo.

¹⁸ Obol jax la' bΛ mu' bΛ la' chΛn cha'len jontolil, che' bajche' mi' tujc'an majlel lazo jini tat wacax. ¹⁹ Mi la' tse'tan jini Chujul BΛ i cha'an Israel. Mi la' lon al: Se'ñun a bΛ cha'an ma' wΛq'ueñoob lojon wocol ti ora, che'etla.

²⁰ Obol la' bΛ mu' bΛ la' lon q'uel ti uts'at jontolil. Mi la' wΛl jontol jini uts'at bΛ. Mi la' wΛl sac jini ic'yoch'an bΛ, mi la' wΛl ic'yoch'an jini c'ajc. Tsaj mi la' wubin jini ch'aj bΛ, pero ch'aj mi la' wubin jini tsaj bΛ. ²¹ P'ump'un jax mi caj la' wubin mu' bΛ la' lon ña'tan cabΛl la' ña'tΛbΛl. ²² Obol jax la' bΛ come ch'ejletla ti lemoñel. BΛxetla ti' melol lembal. ²³ Mi la' ch'Λm taq'uin cha'an mi la' mucben i mul xjontolil cha'an mi la' p'ump'un tic'lan jini mach bΛ anic i mul.

²⁴ Jini cha'an i Yum Panchan yic'ot Pañimil mi caj i meletla. Mi caj la' jilel che' bajche' mi' sac jilel ti c'ajc jini tiquin te' yic'ot tiquin yopol. Mi caj la' yajlel che' bajche' te' che' mi' yoc'mΛl i wi'. Che' bajche' i nich pimel mi caj la' sujtel ti ts'ubejn. Come tsa' la' ñusΛbe i t'an i Yum Panchan yic'ot Pañimil. Tsa'ix la' ts'a'le jini Ch'ujul BΛ i cha'an Israel. ²⁵ Jini cha'an mich'ix lac Yum ti' tojlel i cha'año' bΛ. Tsa'ix i sΛts'Λ i c'Λb cha'an mi' yaq'ueñoob i toj i mul. Jini wits tac mi' ñijcan i bΛ. P'ulul mi caj i cΛytΛlob jini ch'ujlelΛlob che' bajche' misujelΛl ti calle. Anquese cabΛlix i wocol, pero maxto lajmic i mich'lel lac Yum. Mu' to caj i chΛn aq'ueñoob wocol.

²⁶Che' jini lac Yum mi caj i letsan i bandera cha'an mi' pɔɔ tilel colem tejclum tac am bɔ ti ñajɬɬ. Ti' ch'uuyub jach mi caj i wets' tilel winicob año' bɔ ti jujunwejl pañimil. Ora jach mi caj i julelob. ²⁷Ma'anic mi juntiquilic c'un bɔ, yujil bɔ yajlel, yujil bɔ wɔɔyel. Tsats cɔchbilob i ñɔc'. Mach yujilic jejmel i ch'ajñal i zapato. ²⁸Wen jay tac i te'el i jalɔjb. Wen tsats xotbilob i jalɔjb cha'an mi' julob. Tsats i pacaralel i yoc caballo che' bajche' xajlel. Ajñel mi' majlel i carreta che' bajche' sutujt ic'. ²⁹Lajal muc'ob ti oñel bajche' bajlum che' yomix i chuc i we'el. Ma'anix majqui mi mejlel i chilben che' cats' c'uxulix i cha'an. ³⁰Ti jim bɔ q'uin ju'ucña mi' cajelob ti t'an ti la' contra che' bajche ju'ucña jini colem ñajb. Che' mi la' ñejñan pañimil, wen ic'yoch'an jax cha'an wocol. Mosbilix jini q'uin yilal cha'an cabɔl total.

Lac Yum tsi' pɔɔɔ Isaiás

6 Che' bɔ tsa' chɔmi jini rey Uzías, ti jini jach bɔ jab, tsaj q'uele lac Yum, buchul bɔ ti chan ti ñuc bɔ i ye'tel. I yoc jach i pislel tsi' laj but'u jini Templo. ²Ya' wa'alob serafiñob mu' bɔ i yajñelob yic'ot Dios ti panchan. Ti jujuntiquil añoob wɔcp'ejl i wich'. Cha'p'ejl mi' c'lañob i mosob i wut, cha'p'ejl mi' c'lañob i mosob i yoc, cha'p'ejl mi' c'lañob ti wejlel. ³Mi' jac'ob i bɔ ti c'ay: Ch'ujulet, wen Ch'ujulet Dios, i Yumet Panchan yic'ot Pañimil. But'ul pejtél pañimil ti a ñuclel, che'ob. ⁴Ti jujuntiquil tsi' cha'leyob t'an. Ti jujunyajl tsa' ñijcuyi i ts'ajquil tac otot cha'an i t'an che' woli ti c'ay. Tsa' bujt'i i mal otot ti but's'. ⁵Joñon tsa cɔɔɔ: Obol jax c bɔ come sajtemon. Come tsa'ix j q'uele tic wut c Rey, i Yum Panchan yic'ot Pañimil. Xmulilon, bibi' c t'an, tem chumulon quic'ot winicob bibi' bɔ i t'an, cho'on.

⁶Che' jini juntiquil serafín am bɔ tenaza ti' c'ɔb tsi' ch'ɔmɔ loq'uel i nich c'ajc ti pulɔntib. Tsa' wejli tilel ba' añoob. ⁷Tsi' tɔlbeyon quej jini nich c'ajc. Tsi' yɔɔɔ: Tsa'ix i tɔɔɔ a wej ili nich c'ajc. Loc'sɔbilix pejtél a jontolil. Ñusɔbilix pejtelel a mul, che'en. ⁸Che' jini tsa cubibe i t'an lac Yum woli bɔ i yɔɔ: ¿Majqui mi caj c choc majlel ba'an c cha'año' bɔ? ¿Majqui yom majlel i sub c t'an? che'en. Joñon tsac jac'ɔ: Um ba' añoob c Yum. Chocoyon majlel, cho'on. ⁹Tsi' subeyon: Cucu suben c cha'año' bɔ: “Anquese cabɔl mi la' wubibeñoob c t'an, ma'anic

mi caj la' ch'amben isujm. Anquese cabal mi la' q'uel i yejtal c p'at'alel, ma'anic mi caj la' ña't'aben i sujmler", che'en.

¹⁰Tsats'esabeñob i pusic'al ili winicob. Macbeñob i chiquin.

Macbeñob i wut, ame c'otic i wut, ame mi' yubiñob c t'an, ame mi' ch'ambeñob isujm cha'an mi' c'ayob i mul cha'an mic

lajmesañob, che'en. ¹¹Tsaj c'ajtibe: ¿Jala to, c Yum? cho'on.

Tsi' jac'beyon: Jinto laj jembilix i tejclum tac. Che' jocholix mi' c'aytal i yototob yic'ot i wumilelob, ¹²che' ba' tsa'ix c

playayob majlel ti ñajt ba' tejclum tac, jochol mi' caj i c'aytal i

lumal Israel ti pejt ti pejt. ¹³Mi tsa' c'ale junmojt loq'uem ba

ti lujunmojt, muc'ach i sejq'uel jubel ja'el che' bajche' c'olol te'. Pero che' bajche' mi' cha' colel i xujc'unte'lel che' sec'bilix,

che'ach ja'el jini ch'ujul ba' tejclum, che'en.

I t'an Isaías ti' tojlel Acaz

7 Ti jim ba' ora che' woli' cha'len yumal ti Judá jini rey Acaz (i yalobil Jotam, i buts Uzías) tsa' tili i contrajin Jerusalén jini rey Rezín ch'oyol ba' ti Siria yic'ot Peka jini rey ti Israel, i yalobilach Remalías. Pero ma'anic tsa' mejli i ch'ambob jini tejclum. ²Ti jim ba' ora tsa' c'oti t'an ba'an jini rey Acaz (loq'uem ba' ti' p'olbal David): Jini siriajob tsi' temeyob i t'an yic'ot israelob cha'an mi' contrajiñob Judá, che'en. Che' jini tsa' toj sajti i pusic'al jini rey yic'ot pejtelel i winicob. Tsa' cajiyoj ti tsiltsilñayel che' bajche' mi' ñijcan i ba' te'el che' an cabal ic' ya' ti wits.

³Lac Yum tsi' sube Isaías: Cucu ti ora ba'an Acaz. P'ayal a wic'ot Searjasub a walobil. Ya'an Acaz ti cojix ba' ts'ajc ba' c'acal i bijlel ja' ya' ti' bijlel jini jamil ba' mi' cha'leñob wuts'oñel. ⁴Suben: "Tsajilet. Yom ñach'alet. Mach yomic ma' cha'len baq'uen. Mach mi' toj sajtel a pusic'al cha'an tsats ba' i mich'ajel jini Rezín yic'ot jini siriajob yic'ot Peka. Lajalob bajche' cha'ts'ijit taj yomix ba' yajpel i c'ac'al. ⁵Jini siriajob yic'ot año' ba' ti Efraín yic'ot i yalobilob Remalías tsa'ix i temeyob i t'an cha'an mi' contrajiñet. Tsi' yalayob: ⁶La' laj contrajin jini año' ba' ti Judá. La' lac bac'tesañob. La' la cotsan ti rey i yalobil Tabeel cha'an mi' yumañob ya' ti Jerusalén, che'ob. ⁷Pero lac Yum Dios woli' yal: ¡Mach i malayobic mi junyajlic! ⁸Come jini colem tejclum ti Siria ba' mi' cha'len yumal Rezín jiñach Damasco. Ya' jach jaxal i yumantel.

Ma'anic mi caj i ñuc'an. Efraín ja'el mi caj i junyajlel jisantel che' ti yambλ jo'p'ejl i chanc'al jab. ⁹Jini colem tejclum ti Efraín ba' mi' cha'len yumλ Peka jiñach Samaria. Ya' jach jaxλ i yumantel. Ma'anic mi caj i ñuc'an. Mi mach xuc'ulic a pusic'al tic t'an, mach xuc'ulic mi caj a wajñel". Che'ach yom ma' suben Acaz, che'en lac Yum.

Emanuel

¹⁰Lac Yum tsi' sube Acaz: ¹¹C'ajtibañon i yejtal c p'atlel cha'an ma' ña'tan ti isujm a Dioson a Yumon. C'ajtin baqui jach a wom mic pas, mi ti pañimil mi ti panchan, che'en. ¹²Pero Acaz tsi' jac'λ: Mach comic, c Yum. Ma'anic mi caj quilabeñet a pusic'al. Mach comic c'ajtibañet i yejtal a p'atlel, che'en. ¹³Jini cha'an Isaías tsi' yalλ: Ñich'tan c t'an, Acaz, i p'olbalet λ David. Mach jinic jach woli a techbeñon c mich'ajel, pero wola' techben i mich'ajel c Dios ja'el. ¹⁴Jini cha'an lac Yum mi caj i wesa pasbeñet i yejtal i p'atlel. Juntiquil xch'oc mi caj i cantan alλ. Mi caj i yac' ti pañimil ch'iton. Mi caj i yotsaben i c'aba' Emanuel mu' λ i yal ti lac t'an, "Dios la quic'ot". ¹⁵Che' alλ to mi caj i jap lech yic'ot chab (jiñach i bal i ñac' reyob) ¹⁶jinto mi' julel i pusic'al cha'an mi' yajcan chuqui uts'at, cha'an mi' juch'tec' chuqui jontol. Che' maxto cyalic i cha'an i chu', awilan jini cha'tiquil reyob woli λ a bac'ñan mi caj i junyajlel jisantelob yic'ot pejtelel i lumal. ¹⁷Lac Yum mi caj i chocbeñet tilel cabλ wocol ti a tojlel yic'ot ti' tojlel a pi'lob yic'ot pejtelel año' λ ti a tejclum. Ma'anic ba' ora q'uelel a cha'an wocol che' bajche' iliyi c'λλ che' λ tsi' t'oxo i λ Israel yic'ot Judá. Jini rey am λ ti Asiria mi caj i tilel yic'ot i soldadojob.

¹⁸Ti jim λ ora lac Yum mi caj i wets' tilel che' bajche' jaj jini winicob año' λ ti Egipto yic'ot año' λ ti Asiria. Jomjomña mi caj i tilelob che' bajche' i chañil chab. ¹⁹Wen bajc'lob mi caj i tilelob. Mi caj i pam pujquelob ti pejtelel a lumal c'λλ ya' ti colem λ i tiquiñal pañimil, yic'ot ya' ba' tocol tac i mal colem xajlel, yic'ot ya' ba' pim wats'an ch'ixol, yic'ot ya' ti wumilel tac ja'el. ²⁰Ti jim λ ora lac Yum mi caj i c'λn jini rey ti Asiria che' bajche' jump'ejl jay λ e'tijibal mambil λ tilel, yic'ot jini ch'oyolo' λ ti junwejl colem ja' i c'aba' Eufrates, cha'an mi' laj chilbeñet winicob

x'ixicob yic'ot pejtelel i chubla'an yic'ot pejtel tsa' ba i pɔc'ayob. ²¹Che' ujtemix jini wocol, tijicña jini winic am ba i cha'an juncojt ña' wacax yic'ot cha'cojt ña' tiñame'. ²²Mi caj i sujtel ti potrero tac pejtelel Judá. Jini mu' ba i cɔytɔlob tijicña mi caj i japob lech yic'ot mantequilla. Cha'an i yonlel lech yic'ot chab jasɔl mi caj i japob, mi caj i c'uxob ti pejtelo.

²³Ti jim ba ora jini wen uts'at ba ts'usubil letsem ba i tojol mi caj i sujtel ti ch'ixol yic'ot ti stsajatuñol. ²⁴⁻²⁵Pejtelel jini lum ya' ba' tsi' top'oyob ti azadón mi caj i sujtel ti potrero. Ma'anix majch mi caj i chan majlel ya'i cha'an i bac'ñantel jini ch'ixol yic'ot stsajatuñol. Muc' jach i majlelob winicob ti julba.

I c'aba' juntiquil i yalobil Isaías

8 Lac Yum tsi' cha' subeyon: Yajcan junq'uel ñuc ba tabla cha'an ma' ts'ijban ti ñuc ba letra tac: Mi caj i yilan pañimil a walobil, jiñach Mahersalal Hasbaz. An i sujmllel i c'aba': Mach jalix mi caj i jisantel la' contrajob. ²Tsac pɔya tilel cha'tiquil testigo, Urías jini motomaj yic'ot Zacarías i yalobil Jeberequías. Xuc'ulob ti cha'ticlel. Tsi' q'ueleyoñob che' ba tsac ts'ijba jini jun che' maxto cantabilic i cha'an i yalobil quijñam. ³Che' jini tsa' c'otiyon ba'an quijñam, jiñach x'alt'an ja'el. Tsa' caji' cantan i yalobil. Che' ba tsa'ix i yila pañimil, lac Yum tsi' subeyon: Yom ma' wotsaben i c'aba' jini alɔl ti Mahersalal Hasbaz. P'isi ti wenta i sujmllel i c'aba'. ⁴Come che' maxto yujilic t'an cha'an mi' pejcan i tat yic'ot i ña' jini ch'iton, jini rey ch'oyol ba ti Asiria mi caj i malben Damasco yic'ot Samaria. Mi caj i chilbeñob pejtelel i chubla'an, che'en.

⁵Lac Yum tsi' cha' pejcayon: ⁶Jini chumulo' ti Jerusalén tsi' cɔyayonob. Mach yomobic mij cantañob. Yomob i c'ajtin i coltantel ti' tojlel jini rey Rezín, yic'ot jini rey Peka. ⁷⁻⁸Jini cha'an ti' caj i mul mi caj c choc tilel winicob che' bajche' but'ja', ch'oyolo' ba ti junwejl colem ja i c'aba' Eufrates. C'ax bɔbɔq'uen jax mi caj i q'uelob. Jini rey ti Asiria yic'ot cabal soldadojob mi caj i tilel ti' contra Jerusalén. Mi caj i c'ɔlɔl c'otel ti Judá che' bajche' but'ja' mu' ba i letsel ti' bic' winicob. Jini soldadojob mi caj i ñumelob ti pejtelel a lumal Emanuel (Dios la quic'ot), che'en lac Yum.

⁹⁻¹⁰Sirijacob yic'ot israelob, melela chuqui jach la' wom ti' contra Judá, pero mach mājlic la' cha'an. Nich'tañonla ti la' pejtelel. Much'quin la' bΛ cha'an mi la' contrajiñon lojon, pero mi caj la' jilel. Tempan la' bΛ. Laja la' t'an, pero mi caj la' jisantel, come wΛ'an Dios quic'ot lojon.

¹¹Lac Yum tsa'ix i subeyon ti tsats bΛ t'an: Mach a jac'beñob jini año' bΛ ti Judá yom bΛ i yΛc'ob i bΛ ti' wenta Siria yic'ot Israel. ¹²Mach ma' puts'el ti baq'uen che' bajche' yaño' bΛ. Yom xuc'ul ma' nop Dios. Mach yomic mi' toj sajtel a pusic'al ti' tojlel Siria yic'ot Israel. ¹³Yom jach ma' bac'ñan i Yum Panchan yic'ot Pañimil. Cojach jini yom bac'ñantel ti pejtelel ora. ¹⁴⁻¹⁵Lac Yum jiñach xuc'ul bΛ otot yilal ba' mi caj a coltan a bΛ, pero ti' tojlel Israel yic'ot Judá jiñach Xajlel ba' mi' jats'ob i yoc, come mach yomobic mi' cΛntantelob cha'an lac Yum. CabΛob mi' cajelob ti yajlel. Mi' cajelob ti chujquel che' bajche' ti yac. CΛchal mi caj i cΛytabob.

¹⁶Otsan cΛytab c t'an ti' pusic'al c cha'año' bΛ, che'en lac Yum. ¹⁷Mi caj c pijtan lac Yum mu' bΛ caj i coltañonla anquese tsi' mΛya i wut cha'an mach mi' q'uelonla. Cojach jini mi caj c pijtan. ¹⁸Awilan, joñon quic'ot calobilob tsa' bΛ i yaq'ueyon Dios, wa'chocobilon lojon cha'an mic tsictesΛben Israel i ñuclel lac Yum chumul bΛ ti wits i c'aba' Sion. Jiñach i Yum Panchan yic'ot Pañimil. ¹⁹¿Chucoch mi la' lon c'ajtibeñob xwujtob chuqui tac mi caj i yujtel? Mi' cha'leñob t'an che' bajche' te'lemut. Mach tsiquilic i sujmllel. Mach mi la' ñich'tabeñob i t'an. Jini cuxulo' bΛ ¿yom ba mi' cha' pejcañob jini chameñobix bΛ? ¿Mejl ba i coltañob? Mach mejlic. ¿Mach ba yomic mi la' c'ajtiben Dios? ²⁰Ña'tanla chuqui ts'ijbubil ti' T'an Dios. Ubinla i t'an: Majqui jach mi' contrajin c t'an jiñach payxo x'alt'an. Mach chocbilic tilel c cha'an, come ma'anic i c'Λc'al. Mach i sujmic i t'an. ²¹Jini c cha'año' bΛ mi caj i pΛjyelob majlel. Mi caj i yubiñob wocol yic'ot wi'ñal. Mi caj i yochelob ti to'ol jach bΛ e'tel. Che' wi'ñayobix mi' cajelob ti mich'. Mi caj i letsañob i wut ti chan cha'an mi' p'ajob jini Rey i Dios. ²²Awilan, baqui jach mi' q'uelob an cabΛ wocol yic'ot i'ic' bΛ pañimil yic'ot i ch'ijiyemlel. Mi caj i chojquelob ti ic'yoch'an bΛ pañimil. Che' tsi' yΛΛ lac Yum.

Mi caj i yilan pañimil Mesías

9 Pero mi caj i lajmel jini wocol. Anto lac pijtaya. Isujm, Dios mi caj i choc tilel castigo ba'an Galilea, i lum Zabulón yic'ot i lum Neftalí, pero ti wi'il ba q'uin tac mi caj i ñuc'an jini lum Galilea ti junwejl Jordán ja' c'ɔɔɔɔ ti' ti' colem ñajb.

²Jini winicob tsa' ba ajniyob ti ic'yoch'an ba pañimil mi caj i q'uelob colem c'ajc. Mi caj i c'ɔɔɔɔ c'otel i c'ac'al ba' chumulob winicob woliyo' ba ti baq'uen ame chamicob ti ic'yoch'an ba pañimil. ³C Yum lojon, mi caj a cha' otsan Israel ti ñuc. Mi caj a cha' aq'ueñoob i tijicñayel i pusic'al. Tijicña mi caj i yubiñoob che' bajche' winicob ti' yorajlel c'ajbal, che' bajche' winicob mu' ba i t'oxbentelob chub'añal che' mi' mlob ti guerra.

⁴⁻⁵Come Dios mi caj i ts'oc jini cadena tac mu' ba i c'ach i cha'año' ba. Mi caj i c'as jini asiyal mu' ba i jats'ob che' bajche' tsi' jisabe i p'atlel Madián ti' tojlel Gedeón. Come wen tijicña mi caj i yajñel pañimil ba' ora mi' lajmel guerra. Mi caj i laj jilel ti c'ajc pejtelel e'tijibal cha'an guerra, yic'ot pejtelel i pislelob pajq'uenticax ti ch'ich'. ⁶Come mi caj i yilan pañimil ala ch'iton cha'an mi' coltañonla. Dios mi caj i yalq'ueñoonla i yalobil. Mi caj i yotsabentel i c'aba': C'ax Ñuc Ba, Caj Cantesa, P'atal ba Dios, Lac Tat Am Ba ti Pejtelel Ora, Xlajmesa leto mu' ba i cha'len yumal. ⁷Mi caj i ñuc'an i yumantel David. Mach jilic i yumantel ti pejtelel ora. Ñoj ñach'al i yumantel. Xuc'ul mi caj i yajñel come uts'at mi caj i cha'len yumal ti pejtelel ora. Mi caj i p'ojlesan chuqui uts'at yic'ot chuqui toj ti pejtelel pañimil. I Yum Panchan yic'ot Pañimil mi caj i jolotesan che' bajche' tsi' yala.

Mi caj i jisantel Samaria

⁸⁻¹⁰Lac Yum tsa'ix i choco majlel i t'an ti' tojlel israelob. Tsa' c'oti i taj jini chumulo' ba ti Samaria, jiñach Efraín. Mi caj i jultesabeñoob i pusic'al cha'an ti' caj tsi' chañ'esayob i ba. Woli' lon alob: Anquese tsa'ix yajli jini otot tac, anquese jisabilix lac lumal, ñumen uts'at mi caj lac cha' wa'chocon. Tsa'ix sejq'ui jini sicómoro te', pero mi caj lac cha' p'ac' puru ch'ujte' ti' q'uexol sicómoro, lon che'ob. ¹¹⁻¹²Jini cha'an lac Yum mi caj i pay tilel siriajob ch'oyolo' ba ba' mi' pasel q'uin, yic'ot

filisteojob ch'oyolo' bΛ ba' mi' bΛjlel q'uin. Mi caj i jisañob israelob. Anquese cabΛ mi caj i yubiñob wocol jini israelob, maxto lajmic i mich'ajel Dios. Sats'Al to i c'Ab cha'an mi' contrajiñob.

¹³Anquese cabΛ i wocol, ma'anic mi caj i peq'uesañob i bΛ cha'an mi' sutq'uiñob i bΛ ba'an i Yum Panchan yic'ot Pañimil. ¹⁴⁻¹⁵Jini cha'an ti jump'ejl jach q'uin lac Yum mi caj i jisan jini año' bΛ i ye'tel ti Israel yic'ot jini payxo bΛ x'alt'añob che' bajche' mi' sejq'uel te' yic'ot pejtel i c'Ab. ¹⁶Come jini yumΛob cabΛ mi' socob winicob x'ixicob. Mi' yac'ob ti asiyel jini gobierno. ¹⁷Jini cha'an lac Yum ma'anic mi' p'untan jini ch'iton winicob. Ma'anic mi' p'untan meba' x'ixicob yic'ot meba' alΛlob, come ti pejtelelob mi' cha'leñob lot. Leco jax i t'an. Jini cha'an maxto lajmic i mich'ajel lac Yum. Sats'Al to i c'Ab cha'an mi' contrajiñob.

¹⁸Lac Yum mi caj i jisan ti c'ajc pejtelel jontolil che' bajche' mi' pulel ch'ixol yic'ot stsajatuñol yic'ot mate'el. BΛbΛq'uen i buts'il jini c'ajc. ¹⁹⁻²⁰Jini pañimil mi caj i yic'an cha'an i mich'ajel i Yum Panchan yic'ot Pañimil. Mi caj i jilelob ti c'ajc winicob x'ixicob. Ma'anic majch mi' p'untan i pi'Al. Ti pejtelelob mi' contrajiñob i bΛ. Mi' chilbeñob i bΛ i waj, pero mach ñaj'acob. Mi caj i c'uxbeñob i bΛc'tal i yalobilob cha'an wi'ñayob. ²¹Manasés yic'ot Efraín mi caj i contrajiñob i bΛ. Ti cha'mojtlet mi caj i contrajiñob Judá. Anquese cabΛ mi' p'ojlet i wocol, mach lajmic i mich'ajel lac Yum. Sats'Al to i c'Ab cha'an mi' tic'lañob.

10 Obolob i bΛ jini winicob mach bΛ tojic mi' cha'leñob meloñel yic'ot jini mu' bΛ i ts'ijbañob ley tac mach bΛ tojic. ²Mi' tic'lañob jini p'ump'uño' bΛ yic'ot meba' x'ixicob yic'ot meba' alobob. Mi' xujch'ibeñob chuqui an i cha'an. ³¿Chuqui mi caj la' mel ti' q'uiñilel wocol che' mic choc tilel wocol tilem bΛ ti ñajtal? ¿Majqui mi caj la' pejcan cha'an mi' coltañetla? ¿Baqui mi mejlel la' cΛntan la' chubΛ'an? ⁴Ma'anic mi caj j coltañetla. Mi caj la' mucul wutstAl yic'ot xñujp'elob. Mi caj la' yajlel yic'ot jini tsΛnsΛbilo' bΛ. Anquese cabΛ la' wocol mach lajmic i mich'ajel lac Yum. Sats'Al to i c'Ab cha'an mi' chΛn tic'lañetla.

Dios mi caj i jisan Asiria

⁵⁻⁶Jini Asiria i wentajach asiyal tij c'Ab cha'an mic jats' Judá tic mich'ajel. I wentajach barate' tij c'Ab. Tsa'ix c choco majlel ti contra Judá ti' caj i mul cha'an tsi' c'ayA i Dios. Tsa'ix c sube asiriajob cha'an mi' yac'ob ti to'ol e'tel yic'ot wocol. Mi caj i chilbeñob i chub'lan. Mi caj i juch'tec'ob che' bajche' oc'ol ti bij. ⁷Pero mach che'ic woli' ña'tan jini rey am bA ti Asiria. Mach yujilic mi chocbil majlel c cha'an, cha'an mi' jac' c mandar. Mi' lon ña'tan woli' bajñel tech guerra cha'an mi' majlel i cha'an ti' tojlel cabal tejclum tac ti' petol pañimil. ⁸Mi' lon al: Mux caj cotsan ti rey calobilob cha'an mi' cha'leñob yumal ti colem tejclum tac. ⁹Mi caj c jisan Calno che' bajche' Carquemis. Lajal mi caj i jilel Hamat che' bajche' Arfad. Mi caj c jisan Samaria che' bajche' Damasco. ¹⁰Tsa' majli c cha'an ti cabal colem tejclum tac ba' mi' c'uxbiñob dioste' tac ñumen ñuc bA bajche' i diosob Jerusalén yic'ot Samaria. ¹¹Che' bajche' tsac melbe Samaria yic'ot i dioste' tac mi caj c melben Jerusalén yic'ot i dioste' tac, lon che'en.

¹²Pero lac Yum woli' c'An Asiria cha'an mi' mel i ye'tel ya' ti Sion wits yic'ot ti Jerusalén. Ti jim bA ora che' ujtemix i ye'tel mi caj i yal'queñob castigo jini asiriajob, come chan mi' melob i bA. Mi' bajñel sub i ñuclel jini rey. ¹³Come tsi' yalA: Pejtelel chuqui tac tsac mele tsa' mejli c mel cha'an c bajñel p'Atalel yic'ot c ña'tabal. Jini cha'an tsac jisa winicob ti cabal tejclum tac. Tsac chilbeyob i chub'lan. Che' bajche' tat wacax mi' ñijcan loq'uel pejtél chuqui mi' mactan ti majlel, tsac tats'esa jini año' bA i ye'tel. ¹⁴Tic p'Atalel tsa'ix c chilbeyob i chub'lan ya' ba' lotol. Che' bajche' winicob mi' ch'Amob tumut am bA ti c'u', joñon tsac ch'AmA tejclum tac ti pejtelel pañimil. Ma'anic majch tsa' mejli i mactañon. Mi' jats' i wich' jini mut che' mi' lon cantan i yal, che' ja'el ma'anic majch tsa' mejli ti t'an yic'ot uq'uel. Che' mi' lon al jini rey ti Asiria.

¹⁵Lac Yum woli' yal: ¿Mu' ba mejlel i sub i ñuclel jini jacha che' woli' c'ajñel ti' c'Ab i yum? ¿Mejl ba i sub i bA ti ñuc jini sierra che' woli' p'el te' i yum? Jini te' ¿mejl ba i cha' sujtel i jats' jini woli bA i chuc majlel? Asiria jiñach te' am bA i c'lañol tij c'Ab, che'en. ¹⁶Cha'an cabal tsi' chañ'esa i bA jini rey ti Asiria, i Yum Panchan yic'ot Pañimil mi caj i yal'queñob i

c'amajel pejtel soldadojob. Jini ch'ejlo' bΛ mi caj i c'uñ'añob ti c'ajc. ¹⁷Jini Ch'ujul BΛ ti Israel mu' bΛ i yac'ueñob i saclel israelob jijnach i nich c'ajc mu' bΛ caj i pul jini asiriajob. Ti jump'ejl jach q'uin mi caj i pulob che' bajche' ch'ixol yic'ot stsajatuñol. ¹⁸Lajalob jini soldadojob asiriajob bajche' colem te'el, pero pejtelel jini te'el tac mi caj i laj jilel ti c'ajc. Lac Yum mi caj i jisan asiriajob. ¹⁹Ma'anix jaytiquil i soldadojob Asiria che' mi' yujtel. Juntiquil alob mi mejlel i tsicob.

²⁰Ti jim bΛ ora jini mu' bΛ i cΛytllob ti Israel yic'ot ti Judá mi caj i ñopob lac Yum, jini Ch'ujul BΛ ti Israel. Ma'anix mi caj i c'ajtiñob i coltΛntel ti' tojlel asiriajob. ²¹Lamital mu' bΛ i cΛytllob mi caj i sutq'uiñob i bΛ ba'an jini p'Λtal bΛ Dios. ²²Anquese cabalob jini israelob che' bajche' i ji'il ñajb, cojach lamital mi caj i sujtelob. Come Dios tsi' wΛn ña'ta i jisan i cha'año' bΛ, come toj i pusic'al, toj pejtel i melbal. ²³Jini cha'an tsa'ix i yac'Λ i t'an lac Yum, i Yum Panchan yic'ot Pañimil. Mux caj i jisañob.

²⁴Jini cha'an ubinla i t'an lac Yum, i Yum Panchan yic'ot Pañimil: C winicob chumulet bΛ la ti Sion, mach la' bΛc'ñan jini asiriajob che' mi' tilelob i jats'etla che' bajche' jini egiptojob ti wajali. ²⁵Jumuc' jax mi caj la' wubin wocol cha'an c mich'ajel. Ti ora mi caj i jilel i p'Λtalēl. Che' jini mi caj c mich'len jini asiriajob, che'en. ²⁶I Yum Panchan yic'ot Pañimil mi caj i choc tilel i yángel cha'an mi' jisan jini asiriajob che' bajche' Gedeón tsi' jisa Madián ya' ti t'ejl xajlel i c'aba' Oreb, che' bajche' lac Yum tsi' jisa egiptojob ya' ti Chachac bΛ Ñajb. ²⁷Ti jim bΛ ora Dios mi caj i loc'sañetla ti to'ol jach bΛ e'tel. Mi caj i ch'Λmbeñetla la' cuch che' mi' coltañetla jini yajcabil bΛ i cha'an.

²⁸⁻²⁹Awilan wΛ'ix añob jini soldadojob ch'oyolo' bΛ ti Asiria. Tsa'ix ñumiyob ti Ajat. C'otemobix ti Migrón. Woli' cΛyob lamital i ye'tijib ti Micmas. Woli' c'axalob ti wits cha'an mi' jijlelob ti Geba. Woli' toj sajtelob i pusic'al ti bΛq'uen jini año' bΛ ti Rama. Jini año' bΛ ti Gabaa (i tejclum Saúl) woliyob ti puts'el. ³⁰Jini cha'an woliyetla ti c'am bΛ oñel añet bΛ la ti Galim. C'am yom mi la' tsictesan c'ΛlΛl ti Laisa. P'ump'uñetla ya' ti Anatot. ³¹Tsa' puts'iyob jini año' bΛ ti Madmena. Jini año' bΛ ti Gebim mi caj i puts'elob ja'el. ³²WΛle to mi caj i c'ΛlΛl c'otelob asiriajob ti Nob ba' mi caj

i jijlelob. Chan mi' melob i ba ti' tojlel Jerusalén ya' ti Sion wits.

³³Awilan lac Yum, i Yum Panchan yic'ot Pañimil, woli' laj jisan jini soldadojob yic'ot yumalob ti cabal i p'atlel che' bajche' mi lac sec' jubel chan ba te' yic'ot pejtelel i c'ab. Mi' jultesabeñob i pusic'al jini chaño' ba. ³⁴Mi caj i laj jisan laj contrajob che' bajche' mi lac sec' colem te' an tac ba ti Líbano. Asiria mi' caj ti yajlel ti' p'atlel jini Ñuc ba Yumal.

I yumantel Mesías

11 Mi caj i chilbentel i ye'tel i p'olbal David che' bajche' mi' sejq'uel colem te'. Pero mi' cajel ti pasel junts'ijt i Buts te'. Mi caj i yac' juntejc i C'ab. ²Mi caj i yajñel Ch'ujul ba i Ch'ujlel Dios ti' tojlel jini Winic. Mi caj i yalq'uentel wen ba i ña'tabal yic'ot cabal i pusic'al, yic'ot i ye'tel ti cantesa yic'ot i p'atlel, yic'ot wen ba i c'ajñibal, yic'ot i bac'ñantel lac Yum. ³Mi caj i mulan i jac'bentel lac Yum. Mach jelchojq'uc mi caj i mel winicob. Ma'anic mi caj i ñop u'yaj t'an yic'ot lot. ⁴Mi caj i coltan jini p'ump'uño' ba yic'ot jini utso' ba mu' ba i tic'lantelob. Ti' t'an jach mi caj i jisan jini tsatso' ba i pusic'al yic'ot xjontolilob. ⁵Mi caj i cha'len yumal ti toj yic'ot ti' xuc'tilel i pusic'al. ⁶Ti jim ba ora jini bate'el ts'i' mi caj i yajñel yic'ot tiñame'. Jini bajlum mi caj i tem p'actal yic'ot chivo. Temel mi' yajñel ala wacax yic'ot jujp'em ba wacax yic'ot jini bajlum. Mi caj i laj jac' i payol ti alal ch'iton. ⁷Jini wacax yic'ot jini jontol ba bate'el temel mi' cajel ti buc'bal. Temel mi caj i yajñel i yal. Jini bajlum mi caj i c'ux jam che' bajche' wacax. ⁸Jini alal woli to ba ti chu' mi' cajel ti alas ya' ba'an jini lucum. Jini alob yujil ba xambal mi caj i yotsan i c'ab ti' c'u' lucum. Mach i tajayic wocol. ⁹Ya' ti ch'ujul ba wits c cha'an ma'anix chuqui mi' lojwel, ma'anix chuqui mi' yac' ti asiyel. Che' bajche' mi' bujt'el i ch'eñal lum ti ja' lajal mi caj i bujt'el pañimil ti winicob x'ixicob mu' ba i cañob lac Yum.

¹⁰Ti jim ba q'uin mi caj i wa'tal i p'olbal David mu' ba caj i cha'len coltaya ti pejtelel pañimil. Cabal winicob x'ixicob mi caj i jac'ob. Wen uts'atax mi caj i q'uelob i lumal jini Ñuc Ba. ¹¹Ti jim ba ora lac Yum mi caj i cha' sats' i c'ab cha'an mi' pay tilel i cha'año' ba tsa' ba caleyob ti Asiria, yic'ot ti Egipto, yic'ot ti Patros, yic'ot ti Etiopía, yic'ot ti Elam, yic'ot ti Sinar,

yic'ot ti Hamat, yic'ot ti lum tac joyol ba ti colem ja' ti' ñajtilel pañimil.

¹²Jini winicob x'ixicob mach ba anic tsi' cañayob Dios mi caj i c'otelob ba'an Mesías. Mi caj i cha' tempañob tilel jini israelob yic'ot i pi'lob ti Judá pujquemo' ba ti pejtelel pañimil. ¹³Israel yic'ot Judá mi caj i c'ayob leto. Muc'ach i lajmel tsaytsayña ba i pusic'alob. Ma'anix mi caj i contrajiñob i ba. Efraín ma'anix mi caj i mulaben i ñuclel Judá. Judá ma'anix mi caj i tic'lan Efraín. ¹⁴Temel mi caj i majlel i jisañob jini filisteojob ya' ti' lumal ba' mi' bajlel q'uín. Temel mi caj i jisañob jini año' ba ti lum tac ba' mi' pasel q'uín. Mi caj i cha' ch'amob i lum tsa' ba i chilbeyob Edom yic'ot Moab yic'ot Amón. Mi caj i yumantelob i cha'añob. ¹⁵Lac Yum mi caj i tiquesan jini Chachac ba Ñajb am ba ti Egipto. Mi caj i sats' i c'ab ya' ti colem ja' i c'aba' Eufrates cha'an mi' t'oxtal ti wucts'ijit i xac' jini ja', cha'an mi' c'axelob winicob. ¹⁶Lac Yum mi caj i yac' colem bij cha'an mi' cha' tilelob jini israelob tsa' ba c'aleyob ti Asiria che' bajche' tsi' jambeyob i bijlel i ñojte'elob che' ba tsa' loq'uuyob israelob ti Egipto.

Wocolix i yala Dios cha'an laj coltanel

12 Ti jim ba ora mi caj a wal: C Yum, mic subeñet wocolix a wala. Isujm tsa' can mich'leyon, pero ti ili ora tsa'ix lajmiyet ti a mich'ajel. Tsa'ix a cha' ñuq'uesabeyon c pusic'al. ²Awilan, Dios jiñach caj coltaya. Xuc'ul mi caj c ñop. Ma'anix chuqui mi caj c bac'ñan, come c Yum Dios jiñach c p'atlel. Jiñach mu' ba j c'ayin come caj coltayajach. ³Jini cha'an tijicña mi caj lac jac' la caj Coltaya cha'an mi lac taj lac wenlel ti' tojlel, che' bajche' mi lac luch ja' ti' loq'uib ja' che' tiquin lac ti'. ⁴Ti jim ba q'uín mi' caj la' wal: Wocolix i yala lac Yum. Uts'atax i c'aba'. Suben winicob ti pejtelel pañimil cabal mi' c'uxbiñonla. Cabal jax i p'atlel. ⁵C'ayinla lac Yum, come wen ñuc i melbal. La' c'ajnic ti pejtelel pañimil. ⁶Winicob chumulet ba la ti Jerusalén, yom mi la' pam sub ñumel ti' tijicñayel la' pusic'al. Come ñucatax ti la' tojlel jini Ch'ujul Ba ti Israel.

Mi caj i jisantel Babilonia

13 Dios tsi' pasbe Isaiás (i yalobil Amoz) ti espíritu chuqui mi caj i tumben Babilonia. Tsi' yalá: ²Ya' yom mi la' letsan bandera ya' ti' chañelel bujtal. C'am yom mi la' wotan tilel soldadojob. Lich'c'abanla tilel cha'an mi' yochelob ti' ti' tejlum yic'ot ti' yotot tac jini ñuco' ba winicob ti Babilonia. ³Joñon Yumalon. Tsa'ix c yajca c winicob cha'an mi' melob che' bajche' tsac ña'ta c mel tic mich'ajel. Tsa'ix c paya tilel jini p'atalo' ba soldadojob. Chan mi' melob i ba cha'an mach yujilobic baq'uen, che'en.

⁴⁻⁵Ubinla, ju'ucñayob ti t'an bajc'al soldadojob ya' ti wits. Jiñach i t'an cabal colem tejlum tac woliyo' ba ti xambal. I Yum Panchan yic'ot Pañimil tsa'ix i payayob tilel loq'uemo' ba ti colem tejlum tac ti ñajtal. Jiñobach i ye'tijib lac Yum mu' ba caj i c'an ti la' contra añet ba la ti Babilonia. Mi caj i jisan pejtél la' lumal ti' mich'lel.

⁶Cha'lenla oñel cha'an babaq'uen jax jini p'atal ba Dios, come lac'alix i yorajlel mi caj i jisañetla. ⁷Tsiltsilñayetla ti baq'uen ti la' pejtelel. C'uñobix jini ch'ejlo' ba i pusic'al. ⁸Babaq'uen jax mi la' wubin. Cabal mi la' mel la' pusic'al. Mi la' cha'len bajq'uel che' bajche' x'ixicob. Mi la' lon q'uel la' ba, chachac la' wut cha'an quisin. Mi' toj sajtel la' pusic'al.

⁹Come talix i q'uiñilel lac Yum. Jiñach babaq'uen ba q'uin che' mi' pas i mich'ajel. Mi caj i jisan pejtél chuqui an ti pañimil yic'ot xjontolilob ja'el. ¹⁰Ma'anix mi caj i pas i c'ac'al ec' tac mi jinic q'uin mi jinic uw. Ic'atax jini panchan. ¹¹Mi caj caq'ueñob i toj i mul jini año' ba ti pañimil. Mi caj i tojob i mul jini jontolo' ba. Mi caj c jisabeñob i p'atalél jini chan ba mi' pasob i ba yic'ot i ch'ejlel i pusic'al jini yujilo' ba jisaya. ¹²Che' ba tsa'ix c jisayob, ma'anix jaytiquil mu' ba i c'aytalob. Wocol ti tajol che' bajche' oro, che' bajche' jini fino ba oro letsem ba i tojol, tilem ba ti Ofir. ¹³Come mi caj cac' ti ñijcayel panchan yic'ot pañimil cha'an cabal c mich'ajel. ¹⁴Jini soldadojob tilemo' ba ti Babilonia mi caj i lujbañob ti puts'el che' bajche' me' mu' ba la' wajñesan. Mi caj i pam pujquelob che' bajche' tiñame' mach ba anic i yaj cantaya. ¹⁵Pejtelel mu' ba i tajtalob mi caj i tsansantelob ti espada. Mi caj i yajlelob. ¹⁶Ti' tojel i wutob mi caj i

chojquelob jubel ti lum i yalobilob. Mi caj i tsansantelob. Mi caj i chilbentelob i chuba'an ti' yotot. Mi caj i tic'lantelob i yijñam.

¹⁷Awilan mi caj c xic' tilel jini medojob cha'an mi' contrajiñob. Ma'anic mi caj i jac'ob i payol ti taq'uin mi plata mi oro. ¹⁸Jini medojob ma'anic mi caj i p'untañob jini ch'itoñob ti Babilonia mi xch'ocob mi alalob. ¹⁹Jini colem tejclum Babilonia, am ba cabal i ñuclel ti pañimil, jini i t'ojol jax ba ti q'uelol, junlajal mi' caj ti ajñel che' bajche' Sodoma yic'ot Gomorra ba' ora Dios mi' jisan. ²⁰Ma'anix mi' cajelob ti chan chumtlob winicob ti Babilonia mi i yalobilob, mi i butsob ti pejtelel ora. Jini xñumelob ma'anic mi caj i jijlelob ya'i. Jini xcanta tiñame' ma'anic mi caj i pay tilel i tiñame'. ²¹Mi caj i yajñel bate'el ya' ti jochocña ba otot. Ya'i mi caj i yajñel jini ja'al pech. Xibajob mi caj i cha'leñob son ya'i. ²²Jini bate'el ts'i' yic'ot jontol ba bate'el mi caj i yajñel ti' yotot tac jini yumalob ti Babilonia. Lac'alix jini q'uin. Mach jalix mi' caj ti ujtel pejtel iliyi ti' tojlel Babilonia, che'en lac Yum.

T'an ti' contra rey ti Babilonia

14 Lac Yum mi caj i p'untan jini israelob. Mi caj i cha' yajcan i cha'año' ba. Mi caj i cha' payob ochel ti' lumal. Cabal mach ba i pi'lobic mi caj i tilelob cha'an temel mi' yajñelob yic'ot israelob. ²Jini winicob año' ba ti colem tejclum tac ti ñajtal mi caj i coltañob sujtel. Jini mu' ba i c'otelob ti tem chumtal yic'ot israelob mi caj i melbeñob i ye'tel. Jini winicob tsa' ba i tic'layob mi caj i yumañob. Jini tsa' ba i calchayob mi caj i caljchelob i cha'an.

³Ti jim ba ora lac Yum mi caj i yalq'ueñetla la' c'aj la' wo che' lajmenix pejtelel i ch'ijiyemlel la' pusic'al yic'ot baq'uen yic'ot to'ol e'tel. ⁴Jatetla mi caj la' tse'tan jini rey ti Babilonia. Mi caj la' suben: A wujil jax jontolil. Wale wolix a toj a mul. ¿Bacan a mich'ajel? ⁵Come lac Yum tsa'ix i jisabeyet a p'atlal yic'ot a jontolil. Tsa'ix i chilbeyet a yumantel, che'etla. ⁶Calax jax tsa' tic'la winicob x'ixicob ti a mich'ajel. Ti' caj a mich'ajel tsa' wersa otsa cabal colem tejclum tac ti a yumantel. Tsa' p'ump'un tic'layob. Ma'anic tsa' tiq'ui a ba.

⁷Wale cha' ñalch'alix pejtelel pañimil. Ma'anix wocol. Pejtelel año' ba ti pañimil woliyob ti c'ay. ⁸Woli ti c'ay

ja'el jini cipreste' yic'ot jini ch'ujte' an tac ba ti Líbano. Mi' yalob: Jisabilix a p'at'alel. Ma'anix majqui mi' sec'on lojon. Ñach'alonix lojon.

⁹Jini año' ba ti' yajñib chameño' ba woli' pijtañet. Mi caj a tajob che' ma' c'otel ya'i. Jiñobach ñuc ba reyob ti pañimil tsa' ba chamiyob ti wajali. ¹⁰Ti pejtelel mi' pejcañetob ti c'am ba t'an: Junlajalonixla. C'uñetix che' bajche' joñon lojon, che'ob. ¹¹Sajtemix a ñuclel. Mucbilix a wic'ot. Tsa'ix lajmi música ti a wotot. Tsa'ix sujti a wayib ti mucoñibal. Tajsibilet ti motso'.

¹²Ti yamba ora lajalet bajche' jini ñoj ec' che' ic' to pañimil. Wen p'at'alel ti' tojlel colem tejclum tac ti pañimil. Pero tsa'ix yajliyet che' bajche' ta' ec' mu' ba i c'ala c'otel ti lum. ¹³Come tsa' lon ña'ta ti a pusic'al: Mi caj c letsel ti panchan cha'an mic cha'len yumal. Mi caj c ch'am jini c'ax ñuc ba buchlibal. Mi caj c cha'len yumal ti' tojlel pejtelel diosob. ¹⁴Mi caj c letsel majlel ti' chañelal total, cha'an mic mel c ba lajal bajche' jini Ñuc ba Dios, che'et. ¹⁵Pero wale chocbiletix jubel ti' yajñib chameño' ba ti' ch'eñal i yebal pañimil. ¹⁶Pejtelel mu' ba i q'uelet mi caj i wa'talob ti a tojlel cha'an mi' wen cañetob. Mi caj i yalob: ¿Jim ba ili winic bac'ñabil ba ti' tojlel winicob ti pañimil, jini tsa' ba i jisa cabal yumalob? ¹⁷¿Jim ba tsa' ba i yac'a ti pujch'el cabal lum? Tsi' jisa cabal winicob ti pañimil. Jocholix tsa' cale tac jini colem tejclum. Ma'anic tsi' yac'a ti cha' coel jini cac'halo' ba, che'ob. ¹⁸Jini reyob ñuc mi' q'uejlelob ti pañimil ba' ñololob ti' yotlel tac ch'ujlelal. ¹⁹Pero ma'anic a ñuclel. Chocbilet che' bajche' ts'i' am ba i chamel, ts'a'lebil cha'an winicob. Latschocobilob ti a pam i cuctal ch'ujlelalob tsa' ba yajliyob ti guerra, jec'bilob ba ti espada. Ya' ba' tsa' yajliyet ti bij tsi' t'uchtayet caballo. ²⁰Ma'anix majqui mi caj i muquet. Ma'anix mi caj a chan ña'tantel, come tsa'ix a jisa a lumal a wic'ot a pi'alob. Ts'a'lebilob a p'olbal ti' tojlel winicob. ²¹La' tsansanticob cha'an jontol jax i tat. La' jilicob ame cajic i ch'ambeñob i yumantel, ame cajic i cha' wa'chocoñob jini tejclum tac, come ts'a'lebil jini rey ti Babilonia.

²²I Yum Panchan yic'ot Pañimil woli' yal: Mi caj j contrajin Babilonia. Mi caj c junyajlel jisan i yalobilob yic'ot i p'olbalob. ²³Mi caj c sujtesan Babilonia ti ch'ixol yic'ot ti ja' lumil. Mi caj j c'an c wejlajib cha'an mic wets'ob majlel. Mi caj c junyajlel jisañob, che'en.

Mi caj i jisantel Asiria

²⁴I Yum Panchan yic'ot Pañimil woli' chan al: Mi caj i ts'actayel che' bajche' tsac ña'ta. Mi' caj ti ujtel chuqui tac tsac wan chajpa. ²⁵Mi caj c junyajlel jisan jini asirijob año' ba ti Israel. Mi caj c t'uchtañob ti coc ya' tic wits. Jini c cha'año' ba ma'anix mi caj i chan c'ajchelob ti' tojlel. Mi caj i loq'uelob ti' p'at'alel. ²⁶Jiñach wan ña'tabil ba c cha'an mu' ba caj c mel ti pañimil ti cabal ba c p'at'alel, che'en lac Yum. ²⁷Che'ach tsi' wan ña'ta i Yum Panchan yic'ot Pañimil. ¿Majqui mi mejlel i tic'? Sats'alix i c'ab cha'an mi' jisan pañimil. ¿Majqui mi mejlel i mactan?

T'an ti' contra Filistea

²⁸Tsa' tili ili t'an tic tojlel ti jini jach ba jab che' ba tsa' chami jini rey Acaz: ²⁹Ubinla, filisteojob. Mach yomic tijicña la' pusic'al cha'an chamenix jini rey tsa' ba i tic'layet. Come ñumen wocol mi caj i tic'lañetla i yalobil. Lajal i c'uxel che' bajche' jontol ba lucum. ³⁰Joñon mi caj j cantan jini p'ump'uño' ba. Ñach'al mi caj i ñoltalob c cha'año' ba che' bajche' tiñame'. Pero mi caj c jisañetla ti wi'ñal yic'ot ti guerra. ³¹Winicob añet ba la ti jujump'ejl tejclum ti Filistea, cha'lenla uq'uel, come mi caj la' jisantel. Mi caj i jisantel jini colem ba la' tejclum. Talob wen chajpabilo' ba soldadojob loq'uemo' ba ti norte cha'an mi' contrajñetla. ³²¿Chuqui mi mejlel la' suben jini suboñelob ñajt ba ch'oyolob, chocbilo' ba tilel? Lac Yum tsa'ix i wa'choco Jerusalén. Ya'i mi caj i tajob i coltantelob i cha'año' ba. Tsa'ix ñumi i wocol.

T'an ti' contra Moab

15 Jiñach t'an tsa' ba i subu Dios ti' contra Moab: Ti jump'ejl jach ac'alel mi caj i jisantel jini tejclum tac i c'aba' Ar yic'ot Quir am ba ti Moab. Laj jisabilix la' lumal yic'ot la' p'at'alel. ²Majlemobix ti' yotlel i dios jini chumulo' ba ti Dibón cha'an mi' yuc'tañob jini chumulo' ba ti Nebo yic'ot Medeba. Mi' tsepob i jol yic'ot i tsucti' cha'an i ch'ijiyemlel i pusic'al. ³Lapal i cha'añoob coxtal, mi' ñumelob ti calle. Ñajt tsiquil i t'an jini woliyo' ba ti uq'uel ti jujump'ejl otot yic'ot ti parque. ⁴Jini chumulo' ba ti Hesbón yic'ot Eleale c'am

mi' cha'leñob uq'uel. Ya' tsiquil c'Alal ti Jahaza. Woliyob ti baq'uen jini wen ch'ejl ba soldadojob ti Moab. Jini cha'an mi' cha'leñob c'am ba oñel. ⁵Wen ch'ijiyem mi cubin cha'an i wocol jini año' ba ti Moab. Mi' puts'elob majlel c'Alal ti Zoar yic'ot ti Eglat. We'ecñayob mi' letselob majlel ya' ti' witsilel Luhit. Tsiquil i yuq'uel ti i bijlel Horonaim, come talob jini yujilo' ba jisaya. ⁶Tsa'ix tiqui jini ñoja' i c'aba' Nimrim. Laj tiquinix jini jam yic'ot pimele. ⁷Jini woliyo' ba ti puts'el mi' cuchob majlel i chuba'an letsem tac ba i tojol. Mi' c'axelob ti junwejl ja' ya' ba'an tsu'um te'. ⁸Tsiquil ti pejtelel i lumal Moab i yuq'uel jini año' ba ti Moab, c'Alal ti Eglaim yic'ot ti Beer Elim. ⁹Cabalix ch'ich' ti ñoja' am ba ti Dimón. Pero mi caj c chocheñob majlel yan tac ba wocol ya' ti Dimón. Mi caj c choc majlel bajlum tac cha'an mi' jisañob jini tsa' ba puts'iyob yic'ot jini tsa' ba caleyob ti' lumal Moab.

16 Jini tsa' ba puts'iyob loq'uel ti Moab cha'an mi' majlelob ti Sela woli' chocheñob majlel al tiñame' tac jini rey ti Judá i wenta tojoñel. ²Che' bajche' mi' lon cha'len wejlel jini mut mach ba anix i c'u', che'ach ja'el mi caj i ñumelob jini x'ixicob moabob ya' ti c'axib ja' am ba ti colem ja' i c'aba' Arnón. ³Jini winicob tsa' ba i ch'amayob majlel tiñame' ya' ti Jerusalén woli' yalob: A wocolic aq'ueñon lojon c puts'ib. Coltañon lojon. Mach a wac'on lojon ti' c'ab j contra lojon. ⁴⁻⁵La' ajnicob ti a tojlel c pi'lob lojon mach ba añobix i yotot ti Moab. Yom ma' coltan jini woli ba i tic'lantelob. Dios mi caj i yal'ueñet a chobejtabal, mi tsa' wal'ueyon lojon ba' mic chumtal lojon jinto mi' lajmel c tic'lantel. Che jini Dios mi caj i wa'chocon i yumantel David cha'an mi' yajñel ti pejtelel ora. Juntiquil xuc'ul ba, jini toj ba, mi caj i ch'amben i ye'tel David, che'ob jini ch'oyolo' ba ti Moab.

⁶Tsa'ix la cubi chan mi' melob i ba jini moabob. Ts'a' mi' q'uelonla. Mi' p'ajonla. ⁷Pero mach ch'an che'ix. Wolix i cha'leñob uq'uel jini moabob. Woli la' wuc'tan jini año' ba ti Kirharet cha'an ma'anix mi' melbeñetla jini dulce xabal ti ts'usub. C'uñix la' pusic'al. ⁸Woli la' cha'len uq'uel come caybilix la' chol ya' ti Hesbón yic'ot la' ts'usubil ya' ti Sibma. I yumob soldadojob tsa'ix i jisayob jini wen uts'at ba ts'usubil. Tsa'ix c'oti i jisañob ts'usubil c'Alal ti Jazer am ba ti' tiquiñal pañimil yic'ot c'Alal ti colem ñajb. ⁹Jini cha'an mij caj ti

uq'uel cha'an Jazer yic'ot cha'an Sibma. Ma'anix i ts'usubilob. Mi caj c muletla ti' ya'lel c wut winicob añet ba la ti Hesbón yic'ot ti Eleale, come tsa' jisanti i wut la' te' yic'ot la' c'ajbal ti guerra. ¹⁰Ma'anix i tijicñayel la' pusic'al. Ma'anix majqui mi' cha'len c'ay ti ts'usubil. Ma'anix majqui mi' chan yats' i ya'lel ts'usub ya' ti' yajñib, come tsa'ix cac'la ti jilel i tijicñayel la' pusic'al.

¹¹Jini cha'an wen ch'ijiyem c pusic'al mi cubin cha'an Moab. Mic p'untan jini año' ba ti Kirharet. ¹²Jini año' ba ti Moab mi caj i melob oración ti wocol t'an ti' tojel i diosob ya' ti bujtal tac. Pero lolom jach. Mach i jac'ayobic. ¹³⁻¹⁴Jiñach i t'an lac Yum tsa' ba i yala cha'an Moab. Pero wale lac Yum wolix i yal uxp'ejl to jab mi caj i jilel i ñuclel Moab. Ts'ita jax jini winicob x'ixicob mu' ba caj i clytlob. Ma'añobix i ñuclel.

T'an ti' contra Damasco

17 Jiñach i t'an Dios ti' contra Damasco jini colem tejlum ti Siria: Awilan, wolix ti pujch'el Damasco. Pucu jejmenix jini tejlum. Mux i sujtet ti mate'el. ²Clybilix i tejlum tac Aroer. Tsa' sujti ti jamil ba' mi' cha'len buc'bal tiñame'. Ma'anix majch mi' bac'tesañob che' mi' ñoltlob ti wayer. ³Mi caj i sac jilel i p'atlel Israel yic'ot i yumantel Damasco yic'ot i colojbal winicob ti Siria. Che' bajche' mi caj i jilel i ñuclel Israel, che' ja'el mi caj i jilel i ñuclel Siria, che'en i Yum Panchan yic'ot Pañimil.

T'an ti' contra Israel

⁴Ti jim ba q'uin mi' cajelob ti wiñal israelob. Mi' caj ti jilel i ñuclel. ⁵Mi caj i clytal Israel che' bajche' cholet che' lotbilix i wut, che' bajche' juntejc cha'tejc ixim ya' ti joctal i c'aba' Refaim che' ujtemix c'ajbal. ⁶Ts'i'ta jax mi caj i clytlob winicob che' bajche' ts'i'ta jax mi' clytal i wut olivote' che' ujtemix ti tujq'uel, wajal p'acal jax, che'en lac Yum i Dios Israel.

⁷Ti jim ba ora mi caj i ña'tañob i Dios tsa' ba i meleyob. Mi caj i q'uelob ti ñuc jini Ch'ujul Ba ti Israel. ⁸Ti jim ba ora mach chan clyalix i pusic'al ti pulantib tac tsa' ba i wa'chocoyob mi ti jini diosob tsa' ba i meleyob. Mach chan c'uxix mi caj i yubiñob i yejtal tac Asera mi i yejtalic q'uin.

⁹Jochocña mi caj i clytal jini ts'ajquibil ba tejclum tac, che' bajche' xchumtla tac ya' ti wits che' puts'emix i yum. Che'ach tsa' cAle i tejclum tac amorreojob che' ba tsi' puts'tayob jini israelob tsa' ba tiliyob ti' contra. Jini israelob ja'el mi' caj i jisantelob. ¹⁰Israelob, tsa' ñajayi ti la' pusic'al jini Dios tsa' ba i coltayetla. Jini cha'an mi' caj ti ujtcl pejtcl iliyi. Tsa' la' clyal jini xajlel yilal mu' ba i joy mactañetla. Tsa' la' mele parque cha'an dioste' che' bajche' mi la' mulan. Tsa' la' pac'la jini pac' ñajt ba ch'oyol. ¹¹Ti' yorajlel pac' mi la' wen cantan. Seb to mi' caj ti pasel. Mi' cajel ti ñich ti jini jach ba q'uin, pero ma'anic mi caj la' tuc'ben i wut. Ma'anic mi caj la' taj jini tsa' ba la' lon ña'ta. Mi caj la' taj cabal la' tsic pusic'al yic'ot la' c'uxel mach ba i ñopoyic ts'ac.

¹²Ubinla i t'an cabal soldadojob. Ju'ucñayob ti xambal. Talob ti ajñel cha'an mi' yochelob ti' lumal Israel. ¹³Anquese ju'ucñayob che' bajche' colem ñajb, Dios mi caj i tic'ob. Mi caj i puts'elob majlel che' bajche' ts'ubejn mu' ba i wejlan ic' ya' ti pam wits. ¹⁴Che' ti ic'an cabalix i baq'uen jini israelob, pero che' ti sac'an ma'añobix i contrajob. Che'ach mi caj i jisantelob jini mu' ba i tic'lañonla yic'ot jini mu' ba i xujch'ibeñonla lac chub'an.

T'an ti' contra Etiopía

18 P'ump'un jini lum ya' ti ñajtal ba' mi' tejchel colem ja' i c'aba' Nilo. Ya' mi' cha'leñob xambal barco tac lich'il ba i pislel mu' ba i choc majlel ic'. ²Chocbilob majlel suboñelob mi' pam ñumelob ya' ti colem ja'. Sujtenla ti ora, suboñelob, ya' ba' chumulob winicob wen chaño' ba, wen bac'ñalabilo' ba, mu' ba i cha'leñob jisaya ti lac'al yic'ot ti ñajtal. T'oxbil i lumal ti colem ja'.

³Winicob chumulo' ba ti pejtelel pañimil, q'uelela che' mic letsan i señailel guerra ya' ti wits. Che' mic wus trompeta, ubinla cha'an mi la' tempan la' ba. ⁴Come lac Yum tsi' subeyon: Wa' ba' chumulon mi caj c ñajti q'ueletla. Ñach'alon che' bajche' jini sac'tojan ba i sac'lel q'uin che' ba tsa'ix ñumi ja'al, yic'ot che' bajche' i yowix lum che' ti' yorajlel ticwal. ⁵Pero che' yomix cajel c'ajbal, che' yajlemix i nich, che' wolix i c'añ'an jini ts'usub, mi caj c bac' jisan la' contrajob che' bajche' mi la' porajin jini ts'usubil che' mi la' tsepben loq'uel

i c'Ab. ⁶Mi caj i chojquelob la' soldadojob ya ba'an te'lemut yic'ot ba'an bate'el cha'an mi' c'uxob. Jini xta'jol mi caj i c'uxbeñob i bac'tal che' ti' yorajlel ticwal. Jini bate'el tac mi caj i c'uxbeñob i baquel che' ti' yorajlel tsañal, che'en lac Yum.

⁷Ti jim ba ora mi caj i ch'amben tilel i majtan lac Yum jini chaño' ba winicob, jini bac'ñabilo' ba, chumulo' ba ti yan tac ba lum ti lac'al yic'ot ti ñajtal. An cabal i p'atalel. T'oxbil i lum cha'an colem ja'. Mi caj i ch'ambeñob tilel i majtan lac Yum wa' ti Jerusalén ti wits Sion ba' mi' c'uxbintel i c'aba' lac Yum.

T'an ti' contra Egipto

19 Jiñach i t'an Dios ti' contra jini año' ba ti Egipto. Ti ora mi caj i tilel lac Yum c'achal ti' pam total.

Tsiltsilñayob ti baq'uen i diosob egiptojob. Mi' toj sajtelob i pusic'al jini chumulo' ba ti Egipto. ²Lac Yum tsi' yala: Mi caj caq'ueñob i walac contrajiñob i ba jini egiptojob. Jujuntiquil mi caj i contrajin i yeran yic'ot i pi'al ti chumtal. Jujump'ejl tejclum mi caj i contrajin yamba. Jini am ba i yumantel mi caj i contrajin yamba yumal. ³Mi caj i sac sojquelob i pensar pejtél jini egiptojob, come mi caj c jisabeñob i ña'tabal. Che' jini mi caj i lon majlelob ba'an i dioste' tac yic'ot ba'an jini xwutob, yic'ot ba'an xpejca cruzob yic'ot ba'an payxo ba x'alt'añob. ⁴Mi caj cac' jini egiptojob ti' wenta jontol ba yumal yujil ba tic'laya. Wersa mi caj i yumañob, che'en i Yum Panchan yic'ot Pañimil.

⁵Mi' caj ti tiquin jini colem ja'. Mi' caj ti sajp'ejl, jinto mi' laj tiquin pejtelel jini ja'. ⁶Jini pimel yujil ba pasel ti ja' mi' caj ti oc'mal. Mi' cajel ti tuw'an. ⁷Pejtelel jini pac'abal tac am ba ti' ti'il ñoja', yic'ot ba' mi' loq'uel tilel i jol jini ja', yic'ot ti' joytalé jini ñoja' mi caj i laj tiquin. Jini ic' mi caj i wejlan majlel. ⁸Jini xchuc chayob ja'el mi caj i yubiñob i ch'ijiyemlel come ma'anix i ye'tel. Ma'anix i c'ajñibal lucojib mi chim. ⁹Mi' cajelob ti quisin jini mu' ba i ñoq'uiñob i puyil lino, mu' ba i jalob fino ba pisil. ¹⁰Mi caj i jisantel i p'atalel jini yumalob. Ch'ijiyemob i yaj e'telob, come ma'anix i tojol cha'an i ye'tel.

¹¹Tontojob jax jini yumalob ti Zoán. Tonto i t'an jini xcantesajob mu' ba i subeñob Faraón bajche' yom melol. Mach chan mejlic i chañ'esañob i ba cha'an cabal i na'tabal i tatob

ti oñiyi, come mach lajalobic yic'ot i tatob. Ma'anix i c'ajñibal ti' tojlel Faraón. ¹²Jac'Λ, Faraón, ¿baqui an a winicob año' ba i ña'tΛbal? Mi an i ña'tΛbal, la' i tsictesΛbeñet chuqui mi caj i cha'len Dios ti Egipto. ¹³Tsa'ix ochiyob ti tonto jini yumΛlob ti Zoán. Tsa'ix i ñopoyob lot jini yumΛlob ti Menfis. Jini año' ba i ye'tel ti Egipto tsi' lotiyob i pi'Λlob. Ti jump'ejl i pusic'al tsa' sajtuyob. ¹⁴Lac Yum tsi' sobeyob i pensar. Mi' majlelob ti xΛmbal che' bajche' jini xlembal che' woli ti xej. ¹⁵Ma'anic majqui mi mejlel i coltan Egipto, mi jinic ñuco' ba, mi ch'o'ch'oco' ba, mi i tatob, mi i yalobilob, che'en lac Yum.

¹⁶Ti jim ba ora jini egiptojob mi caj i yubiñob baq'uen che' bajche' x'ixicob. Tsiltsilñayob ti baq'uen ti' tojlel i Yum Panchan yic'ot Pañimil mu' ba caj i ñijcañob ti' mich'lel. ¹⁷Jini año' ba ti Egipto mi caj i bac'ñañob Israel. Pejtel winicob mu' ba i ña'tañob Judá mi' cajelob ti baq'uen cha'an i ye'tel lac Yum ti' tojlel, come mux caj i ts'actesan pejtel chuqui tsi' wan ña'ta i mel i Yum Panchan yic'ot Pañimil. ¹⁸Ti jim ba ora mux i tajtal ti Egipto jo'p'ejl tejclum mu' ba caj i cha'leñob t'an ti' t'an israelob. Mi caj i tajob ti t'an i Yum Panchan yic'ot Pañimil. Jump'ejl tejclum i c'aba' Herez. Añach i sujmler i c'aba', “Jiñach i tejclum lac ch'ujutat”.

¹⁹Ti jim ba ora mi caj i wa'chocontel jump'ejl pulantib i cha'an lac Yum ya' ti' yojlil Egipto, yic'ot jump'ejl oy i cha'an lac Yum ya' ba' jaxal i lumal ²⁰cha'an mi' yac' ti c'ajtesantel lac Yum. Jini cha'an ba' ora mi' cha'leñob oñel jini egiptojob che' tic'lΛbilob, lac Yum mi caj i choc tilel xcoltaya cha'an mi' coltañob. ²¹Ti jim ba ora lac Yum mi caj i yac' i ba ti cΛjñel ti Egipto. Jini egiptojob mi caj i cΛñob lac Yum. Mi caj i ch'ujutesañob. Mi caj i yΛq'ueñob tsansabil ba i majtan yic'ot ofrenda, yic'ot pejtel chuqui tsi' yΛlyob che' ba tsi' wa'chocoyob i t'an. ²²Lac Yum mi caj i yΛq'ueñob wocol jini egiptojob, pero mi caj i lajmesabeñob i wocol che' mi' sutq'uiñob i ba ti' tojlel. Mi caj i ñich'tΛbeñob i yoración. Mi caj i cha' lajmesañob.

²³Ti jim ba ora mi caj i melob colem bij c'ΛlΛl ti Egipto c'ΛlΛl ti Asiria. Jini año' ba ti Asiria mi caj i c'otelob ti Egipto. Che' ja'el jini egiptojob mi caj i c'otelob ti Asiria. Temel mi caj i ch'ujutesañob lac Yum. ²⁴Ti jim ba ora jini israelob mi caj i temob i t'an yic'ot jini egiptojob yic'ot jini asirijob. Mi caj

i tajib i wenlel ti' tojlel pejtél año' bΛ ti pañimil. ²⁵Come i Yum Panchan yic'ot Pañimil mi caj i yaq'ueñoob i yutslel i t'an Egipto yic'ot Asiria che' uts'atix mi' tem ajñelob yic'ot Israel. Come tsi' yΛΛ: Muc'ach i tajib i yutslel c t'an jini egiptojob come c cha'añoob, yic'ot jini chumulo' bΛ ti Asiria come c melbalob, yic'ot israelob come tsac yajcayob, che'en.

Mi caj i jisantel Egipto yic'ot Etiopía cha'an jini asirijob

20 Jini rey ti Asiria i c'aba' Sargón tsi' choco tilel ñuc bΛ yumΛ ti Asdod cha'an mi' wersa chil jini tejclum i cha'an filisteojob. Ti jini jach bΛ jab tsi' ch'ΛmΛ ti' wenta. ²Lac Yum tsa' caji i pejcan jini x'alt'an i c'aba' Isaías (i yalobil Amoz) cha'an mi' lamital joch i pislel yic'ot i warach. Tsi' mele Isaías che' bajche' tsi' sube lac Yum. Tsi' lamital jocho i pislel yic'ot i warach.

³Lac Yum tsi' yΛΛ: Uxp'ejlix jab lamital pits'il c winic Isaías. Ma'anic i warach ti' yoc cha'an mi la' ña'tan che'ach ja'el mi caj i yubiñoob wocol jini año' bΛ ti Egipto yic'ot jini año' bΛ ti Etiopía. ⁴Jini rey ti Asiria mi caj i cΛch majlel egiptojob, yic'ot pejtelel jini ch'oyolo' bΛ ti Etiopía tsa' bΛ puts'iyob, ch'itoñoob yic'ot xñoob. Pits'ilob mi caj i majlelob. Ma'añoob i warach. CabΛ mi caj i yubiñoob quisin jini egiptojob. ⁵⁻⁶Che' jini mi caj i toj sajtelob i pusic'al jini filisteojob cha'an i rey Asiria. Tsi' lon ña'tayob i taj i colantel ti' wenta jini año' bΛ ti Etiopía yic'ot ti Egipto. Mi caj i yuc'tañoob: “Awilan che'ach tsa' lon jili lac pijtaya cha'an tsa' lac lon xuc'choco lac pusic'al yic'ot jini egiptojob. ¿Majqui mi caj i coltañoonla wale?” che'ob. Che' tsi' yΛΛ lac Yum.

Medo-Persia tsi' mΛΛ Babilonia

21 Jiñach tsa' bΛ pasbenti Isaías ti' contra Babilonia: Che' bajche' jini sutujt ic' mi' tilel ti sur, che' ja'el mi caj i loq'uel tilel wocol ti tiquiñal pañimil ba' bΛbΛq'uen jax pañimil. ²C'ax bΛbΛq'uen jax jini tsa' bΛ j q'uele. Jini yujil bΛ i chon i pi'Al woli' chijtan. Jini yujil bΛ jisaya woli ti jisaya. Mi caj la' jisantel. Talob i contrajiñetla jini elamob yic'ot jini medojob. Mi' caj ti jejmél i p'ΛtΛlel Babilonia. Mi' caj ti lajmél i yajcan jini cΛchΛlo' bΛ año' bΛ ti' wenta Babilonia. ³CabΛ woli cubin wocol che' bajche' x'ixic che' woli ti bajq'uel. Mi'

toj sajtel c pusic'al cha'an jini wocol tsa' bΛ cubi tsa' bΛ j q'uele. ⁴Ma'anix c pusic'al yubil. C'uñatax pañimil. Cabal woliyon ti bΛq'uen. Che' ti ic'ajel tsiltsilñayon mach mejlic j c'aj co. ⁵Chajpabeñob i bal i ñac' jini yumalob. La' i cha'leñob we'el uch'el. Ch'ojoyenla ti ora. Chajpan la' bΛ ti guerra, come ix tilel la' contraj.

⁶Lac Yum tsi' subeyon: Cucu wa'chocon xclañan cha'an mi' q'uel chuqui woli' yujtel. ⁷Che' mi' q'uel winicob woliyo' bΛ ti xΛmbal majlel ti carreta yic'ot c'achlalo' bΛ mu' bΛ i majlelob ti cha'cha'cojt caballo, yic'ot motocña bΛ winicob c'achlalo' bΛ ti burro yic'ot ti camello, muc'ach i ña'tan jiñach woli bΛ cal, che'en lac Yum. ⁸Jini cha'an tsac wa'choco xclanta tejclum ti chan bΛ q'ueloñib. Tsa' caji ti t'an jini xclañan: Cabal q'uin yic'ot cabal ac'alel wΛ'ix añon ti que'tel. Woli j q'uel pañimil. ⁹Q'uele ya' tsoltsolña tilel winicob c'achlalo' bΛ ti caballo ti cha'cha'cojt yic'ot motocña bΛ i pi'lob, che'en. Che' jini juntiquil tsa' caji' yal: Xyajli, xyajli Babilonia. Laj c'Λsqijemix i diosob, pam pujquem tac ti lum, che'en. ¹⁰C pi'lob tic'Λbilo' bΛ, lajal tsa' la' ñusa wocol che' bajche' trigo mu' bΛ i jajts'el. Pero tsa'ix c tsictesΛbeyetla pejtet chuqui tsa cubi ti lac Yum. Jiñach i Yum Panchan yic'ot Pañimil, i Dios israelob.

T'an ti' contra Edom

¹¹Jiñach i t'an Dios ti' contra Edom. Ya'an winic ti Seir wits woli' chan c'ajtibeñon: “Xclantaya, ¿jayp'ejl to ora mi' sac'an? ¿Jayp'ejl to ora mi' sac'an?” che'en. ¹²Jini xclantaya tsi' jac'be: “Talix jini sac'ajel (jiñach i coltanel winicob mu' bΛ i tsajcañob lac Yum). Talix ac'alel ja'el (jiñach i jilibal yaño' bΛ). Saclan la' Yum. Yom mi la' cha' tilel cha'an mi la' cha' c'ajtin”, che'en.

T'an ti' contra Arabia

¹³Jiñach i t'an Dios ti' contra jini ch'oyolo' bΛ ti Dedán c'achlalo' bΛ ti camello ya' ti Arabia. Wersa mi caj la' cay bij cha'an mi la' mujcun la' bΛ ti' tiquiñal pañimil ya' ti Arabia. ¹⁴La'la, winicob chumulet bΛ la ti Tema. Ch'Λmbeñob tilel waj yic'ot ja' jini woliyo' bΛ ti puts'el. ¹⁵Come woli' puts'tañob jini espada yic'ot jini sats'bil bΛ jalajb, yic'ot jini bΛbΛq'uen bΛ guerra. ¹⁶Tsi' yalΛ lac Yum: Jump'ejl jab mi caj la' wubin

wocol ti' c'Ab la' contra. Che' jini mi caj i jilel i p'Atal Cedar yic'ot pejtetel i ñuclel, che'en. ¹⁷Che' jini ma'anix jaytiquil mi' c'aytal ti Cedar yujilo' bA julbal ti jalajb. Mux i c'aytal cha'tiquil uxtiquil jach. Che' tsi' yAlA lac Yum i Dios Israel.

T'an ti' contra Jerusalén

22 Jiñach i t'an Dios ti' contra Jerusalén. ¿Chuqui woli la' bac'ñan cha'an tsa' letsiyetla ti pam la' wotot, winicob yic'ot x'ixicob? ¿Chuqui woli la' q'uel? ²Come ti la' pejtelel ju'ucñayetla ti t'an, tsuctsucñayetla ti bij. Mi la' lon chañ'esan la' bA. Pam pujquem ch'ujlel ti tejclum. Tsansabilob cha'an c'amajel, mach ti espadajic, mach ti guerrajic. ³Temel tsa' puts'iyob la' yumob ti pejtelelob. Ma'anic tsi' wis coltayob i bA. Ma'anic tsi' coltayetla. Junlajal tsa' c'ajchiyetla yic'ot jini tsa' bA puts'iyob. ⁴Jini cha'an tsa c'AlA: Loq'uenixla tic tojlel come wolic cha'len uq'uel cha'an jisabilobix c pi'Allob. Wen ch'ijiyem c pusic'al. Mach la' lon ña'tan la' tijicñesañon, cho'on. ⁵Come i yorajlelix uq'uel yic'ot i ch'ijyemlel lac pusic'al yic'ot wocol. Lac Yum, i Yum Panchan yic'ot Pañimil tsi' choco tilel. Wolix ti jejmél i ts'ajquil tac Jerusalén. Jini chumulo' bA ti tejclum woli' c'ajtiñob i coltantel ya' ti wits. ⁶⁻⁷Jini elamob tsi' ch'Amayob tilel jalajb. Jini siriajob mi' ñijcañob tilel carreta tac. Jini año' bA ti Kir mi' ch'Amob i mac'ajib. Mi' laj but'ob jini joctal tac tsa' bA la' pac'Al. Mi' c'otelob c'Alal ti' trancajlel la' tejclum.

⁸Ma'anix mi' coltañetla Dios. Mi la' lon cha'len ajñel cha'an mi la' taj e'tijibal cha'an guerra ya' ti' yotlel melbil bA i cha'an Salomón. ⁹⁻¹¹Woli la' wen q'uel i ts'ajquil tac Jerusalén cha'an mi la' cha' mel ti uts'at ya ba' tocol. Woli la' wen tsajin jini otot tac mu' bA caj la' jem cha'an mi la' cha' wa'chocon jini chan bA ts'ajc. Ti' yojlil jini chan bA ts'ajc mi la' melben i yajñib la' wa'al mu' bA la' ch'Am tilel c'Alal ti' loq'uib ja'. Pero ma'anix c'ajal la' cha'an lac Yum tsa' bA i yaq'ueyetla jini ja' che' bajche' tsi' wan ña'ta wajali. ¹²Jini cha'an lac Yum, i Yum Panchan yic'ot Pañimil, tsi' p'ayayetla cha'an mi la' mel la' pusic'al ti' tojlel yic'ot uq'uel, cha'an mi la' set' i tsutsel la' jol yic'ot cha'an mi la' lap coxtal. ¹³Pero ti jim bA ora ma'anic tsa' la' jac'Al. Tsa' jach caji la' cha'len q'uin ti' tijicñayel la' pusic'al. Tsa' caji la' tsansan wacax yic'ot tiñame'. Tsa' la' c'uxu we'el,

tsa' la' japa vino. Tsa' la' lon ala: La' lac cha'len we'el uch'el, come ijca'Al mi caj lac chamel, che'etla. ¹⁴I Yum Panchan yic'ot Pañimil tsi' yala: Ma'anic mi caj i ñusabentel la' mul ti pejtelel ora. Jinto mi la chamel mi caj la' toj, che'en i Yum Panchan yic'ot Pañimil.

Eliaquim tsi' ch'ambe i ye'tel Sebna

¹⁵⁻¹⁶Woli' yal lac Yum, i Yum Panchan yic'ot Pañimil: Cucu suben Sebna jini xq'uel e'tel ya' ti' yotot rey: “¿Chuqui wola' mel ilayi? ¿Majqui tsi' subeyet cha'an ma' toc majlel mucoñibal ti chan ba xajlel ba' a wom mujquel che' chameñet? ¹⁷Lac Yum mi caj i wersa choquet loq'uel. Anquese wen p'atlet, p'ump'un mi caj i tic'lañet. ¹⁸Ti ora mi caj i choquet loq'uel che' bajche' mi' chojquel majlel pelota ti campo. Ma' cajel ti chamel ti yamba lum ti ñajtal. Pejtelel a carreta mi caj i jilel a wic'ot. Quisintic jax mi caj i yubin a yum cha'an ti' caj jatet. ¹⁹Come joñon mi caj c choquet loq'uel ti a we'tel. Mi caj c peq'uesañet. ²⁰Mi caj c pay c winic Eliaquim (i yalobil Hilcías) cha'an mi cotsan ti a q'uexol. ²¹Jini mi caj i xoj a pislel mu' ba caq'uen. Mi caj i c'ach i ba ti a cajchiñac'. Mi caj caq'uen ti' wenta a we'tel cha'an mi' yochel ti' tat jini chumulo' ba ti Jerusalén yic'ot ti Judá. ²²Mi caj caq'uen i yumantel ti' buchlib David. Che' an chuqui mi' ñup', ma'anic majqui mi' jam. Che' an chuqui mi' jam, ma'anic majqui mi' ñup'. ²³⁻²⁴Mi caj c wa'chocon jini Eliaquim che' bajche' tsats ba joc'lib cha'an xuc'ul mi' cha'len i ye'tel ti' buchlib i tat ti' tojlel c cha'año' ba. Ya' c'ayal ti' tojlel Eliaquim i cantantel pejtel i pi'lob yic'ot i chub'an ti pejtelel i lumal. Mi caj i yac' ti c'uxbintel i c'aba' i tat". Che'ach yom ma' suben, che'en lac Yum. ²⁵Mi caj i yujtel chuqui tsi' yala i Yum Panchan yic'ot Pañimil. Mi caj i loc'san jini yamba joc'lib ya' ba' lon chucul, jiñach Sebna. Mi caj i chilben pejtelel an tac ba ti' wenta. Come che'ach tsi' yala lac Yum.

T'an ti' contra Tiro

23 Jiñach i t'an Dios ti' contra Tiro. Obol jax i ba jini barco tac loq'uemo' ba ti Tarsis, come jisabilix Tiro yic'ot pejtel i yotot. Ma'anix i yajñib barco tac ya' ba' i tilel mi' c'otelob. Isujm jini t'an tsa' ba pam subentiyob ti Cipro.

2-3 Winicob año' ba ti' joytalel Tiro yom mi la' ñajch'el. Jini xchoñoñelob ti Sidón yic'ot jini yujilo' ba xambal ti ñajb mu' ba i saclañoob ñumel chubla'añal tsi' ch'ambeyetla tilel la' chubla'an tsa' ba la' taja. Ya' ti ñoja' i c'aba' Nilo tsa' la' cha'le mañoñel choñoñel ti pejtelel pañimil. 4 Mux caj la' wubin quisin winicob añet ba la ti Sidón ti' ti' ñajb come tsa' jili Tiro. Meba'etixla yubil che' bajche' ma'anic tsa' la' cosa la' walobilob. 5 Jini año' ba ti Egipto ch'ijiyem mi caj i yubiñoob cha'an tsa' sac jili Tiro. 6 Cucula, saclan la' wotot ti Tarsis, winicob chumulet ba la ti' ti' ñajb. Cha'lenla uq'uel cha'an la' lumal. 7 Jisabilix jini tejclum ba' wen tijicña jax tsi' yubiyob c'alal ti wajali. Cablob tsa' loq'uiyob ti Tiro cha'an mi' majlelob ti chumtal ti yan tac ba tejclum.

8 Jiñach tejclum tsa' ba i yaq'ueyob i ye'tel reyob ti pañimil. Cabal tsa' p'ojliyob rico ba xchoñoñelob. ¿Majqui jini tsa' ba i ña'ta i jisan jini Tiro? 9 I Yum Panchan yic'ot Pañimil tsi' ña'ta i peq'uesan jini año' ba ti Tiro yic'ot yumlob año' ba i ñuclel ti pejtelel pañimil. 10 Winicob añet ba la ti Tarsis, librejetixla come ma'añobix la' yum ya' ti Tiro. 11 Lac Yum tsa'ix i p'asa i p'atlel ti colem ñajb. Tsa'ix i chilbeyob i ye'tel yumlob. Tsa'ix i yac'la i t'an ti' contra Tiro cha'an mi' jisabentel i p'atlel. 12 Lac Yum tsi' yla: Winicob añet ba la ti Sidón, ma'anix mi caj la' cha'len yumal ti' chanlel la' pusic'al. Yom mi la' puts'el ti Quitim, pero mach la' tajayix ba' mi la' c'aj la' wo. 13 Q'uelela bajche' tsa' jili Tiro. Jiñoach babiloniajob tsa' ba i jisayob, mach jinic asiriajob. Tsi' wa'chocoyob chan ba ts'ajc cha'an mi' letselob ochel ti tejclum. Tsi' lu' jochtesabeyob i yotot yumlob. 14 Obol i ba jini barco tac loq'uem ba ti Tarsis, come jisabilix i yajñib ba' mi' c'otel ya' ti Tiro.

15-16 Lujump'ejl i chanc'al jab, che' bajche' i jabilel winic, mi caj i ñajiyel Tiro. Che' ñumenix lujump'ejl i chanc'al (70) jab, mux i cha' tejchel jini tejclum che' bajche' xmoja mu' ba i cha'len c'ay ti calle tac. Mi' ch'am música, mi' pam ñumel ti bij cha'an mi' cha' saclan i pi'lob tsa' ba i calayob ti yamba ora. 17 Che' ñumenix lujump'ejl i chanc'al jab, lac Yum mi caj i cha' coltan Tiro. Pero jini año' ba ti Tiro lajal mi caj i cha'leñoob che' bajche' ti ñaxan. Mi caj i cha' pi'leñoob ti jontolil yumlob ti pejtelel pañimil. 18 Pero tal jini ora che' mi caj i

sutq'uiñoob i ba ba'an lac Yum. Che' jini mi caj i yaq'ueñoob lac Yum i ganar mu' ba i tajob ti choñoñel. Ma'anix mi caj i bajñel lotob. Mi caj i yaq'ueñoob i winicob lac Yum cha'an mi' mañoob wen ba i bal i ñac' yic'ot i t'ojol jax ba bujcal.

Dios mi caj i cha'len meloñel ti pañimil

24 Awilan lac Yum mi caj i jisan a lumal, Judá. Mi caj i ya' ti sujtel ti mate'el. Mi caj i puc majlel winicob ti pejtelel pañimil. ²Junlajal mi caj i yochelob ti meloñel motomajob yic'ot winicob x'ixicob, mozojob yic'ot yumalob, criadajob yic'ot i co'ob, xmañoñoelob yic'ot xchoñoñoelob, xbet taq'uiñoob yic'ot jini mu' ba i c'ajtiñoob taq'uin. ³Mi caj i laj jochtiyel a lumal. Ma'anic chuqui mi caj i c'aytal. Lac Yum tsa'ix i ya'c'a i t'an. ⁴⁻⁵Pujch'emix pañimil cha'an i mulob winicob x'ixicob. Tiquinix jini pa'c'abal tac, ma'anix ja'al. Cabal mi' p'ojlel jontolil. Jini ñuco' ba tsa'ix i sobeyob i mandar Dios. Tsa'ix i c'ayayob jini xuc'ul ba i t'an mu' ba i yajñel ti pejtelel ora. ⁶Jini cha'an Dios tsi' jisabe i c'ajñibal lum. Tsi' ya'c'a ti wocol jini ya' ba chumulob. Wen jamal jax pañimil. Ma'anix jaytiquil mu' ba i c'aytalob.

⁷Ch'ijiyem i pusic'al. Mach yujilobix c'ay yic'ot son, come ma'anix mi' ya'c' i wut jini ts'usubil. Mach jastiyix i ya'lel ts'usub. ⁸Ma'anix tsiquil i t'an música mu' ba i jajts'el, mi i t'an arpa. Ma'anix tijicña ba q'uin. ⁹Ma'anix mi' cha'leñoob c'ay. Ma'anix mi' japob vino, come ch'ijiyemob. Mi' c'ajtesañob i tijicñayel ti wajali. ¹⁰Jisabilix jini tejclum. Ñet'bil tac ti candado pejtelel otot ame ochicob xujch'. ¹¹Motocñayob winicob ti calle, woli' wersa c'ajtiñoob vino. Ma'añoobix i tijicñayel i pusic'al. ¹²Jisabilix jini tejclum. Jejmenix i puertajlel tac. ¹³Lajal mi caj i yujtel ti' tojlel winicob che' bajche' ti olivojil che' ujtemix i tuc'ob. Ts'ita jax mi caj i c'aytalob winicob.

¹⁴Pero jini mu' ba i c'aytalob mi' cajelob ti c'ay, tijicñayob i pusic'al. Jini ya' ba añoob ba' mi' bajlel q'uin mi caj i c'ayñoob i ñuclel Dios. ¹⁵⁻¹⁶Jini año' ba ba' mi' pasel q'uin mi caj i subob i ñuclel Dios. C'alal ti ñajtal tsiquil i t'an i c'ay tac jini woli' ba i c'ayñoob i ñuclel jini Toj Ba.

Pero ch'ijiyemon, come anto jontolil yic'ot lot ti petol pañimil. ¹⁷Babaq'uen tac ba yic'ot tojmulil woli to i pijtan jini

chumulo' bΛ ti pañimil. ¹⁸Che' mi la' puts'el cha'an bΛq'uen, mi caj la' yajlel ti ch'en. Mi tsa' loq'uuiyetla ti ch'en, mi caj la' yajlel ti yambΛ wocol, come tal wocol ti la' contra chocbil tilel ti panchan. Mi' ñijcΛyel pañimil ba' añet. ¹⁹Mi caj i γasiyel pañimil. Ma'anix chuqui wen. Ma'anix chuqui xuc'ul. CΛΛΛx jax mi caj i ñijcΛyel lum. ²⁰TicΛbexel mi caj i yajñel pañimil che' bajche' xγΛc'Λjel. Mi caj i ñijcΛyel che' bajche' pisil bΛ otot ti p'ΛtΛl bΛ ic'. Mi caj i jejmel. Ma'anix mi caj i cha' tejchel cha'an wen alatax i mul winicob.

²¹Ti jim bΛ q'uin lac Yum mi caj i γΛq'ueñob i toj i mul jini sajtemo' bΛ ángelob año' bΛ ti chan yic'ot jini yumΛlob año' bΛ ti pañimil. ²²Mi caj i much'quiñob tilel che' bajche' xñujp'elob cha'an mi' yotsañob ti ch'en jinto che' i yorajlelix meloñel. ²³Lac Yum am bΛ cabΛl i ñuclel mi caj i cha'len yumΛl ti Jerusalén ya' ti Sion wits. Jini ñoxo' bΛ mi caj i q'uelob i ñuclel. Mi caj i yajpel yilal i c'Λc'al jini q'uin yic'ot jini uw cha'an i sΛclel i ñuclel lac Yum.

Mi' sujbel i ñuclel lac Yum

25 C Yum, c Dioset. Mi caj c sub a ñuclel. Mi caj c tsictesan i ñuclel a c'aba', come tsa'ix a cha'le ñuc tac bΛ. Chuqui tac wΛn ña'tΛbil a cha'an c'ΛΛlΛl wajali wolix i yujtel. ²Tsa'ix a jisa jini colem tejclum yic'ot wen p'ΛtΛl tac bΛ otot. Jejmenix i ts'ajquil jini ñuc tac bΛ otot, wen i t'ojol jax bΛ. Ma'anix mi' chan mejlel ti pejtelel ora. ³Jini cha'an jini p'ΛtΛlo' bΛ mi caj i bac'ñañetob. Jini yujilo' bΛ jisaya mi caj i jac'beñetob. ⁴Come tsa' colta jini c'uño' bΛ yic'ot jini woliyo' bΛ ti wocol. I puts'ibet jini p'ump'uño' bΛ ba' ma'anic mi' jats'ob jini p'ΛtΛl bΛ ic'. I wentajet axñal ti' yorajlel ticwal. Ma' mΛctan jini jontolo' bΛ che' talob i tic'lan jini p'ump'uño' bΛ che' bajche' p'ΛtΛl bΛ ja'al mu' bΛ i poc jubel i pat otot. ⁵Che' bajche' mi' tsΛñ'an pañimil cha'an tocal, che' ja'el mi' lajmel wocol che' ma' ju'sΛben i chanlel i pusic'al jini jontolo' bΛ yujilo' bΛ tic'laya.

⁶I Yum Panchan yic'ot Pañimil mi caj i chajpan q'uiñijel wΛ' ti Jerusalén ti Sion wits. Mi caj i pΛy tilel jini ñajt bΛ ch'oyolob cha'an mi' c'uxob sumuc bΛ i bΛl i ñΛc' yic'ot yajcΛbil bΛ we'elΛl, cha'an mi' japob vino am bΛ i jabilel. ⁷Lac Yum mi caj i jisΛbeñob i mΛjquil am bΛ ti' pusic'al pejtel mach bΛ

anic mi' cañob. Wa' mi caj i cañob ti ili wits. ⁸Lac Yum mi caj i junyajlel jisan jini p'atla ba mu' ba i yac'onla ti chamel. Che' jini ma'anix majqui mi caj i chamel ti pejtelel ora. Lac Yum Dios mi caj i sujcubeñonla i ya'lel lac wut. Ma'anix mi caj i ts'a'lentelob i cha'año' ba. Mi caj i yac'ob ti ñuc ti' tojlel pejtelel winicob ti pejtelel pañimil. Lac Yum tsa'ix i yac'la i t'an.

⁹Ti jim ba q'uin mi caj i yalob: Jiñach lac Dios mu' ba lac ñop. Tsa'ix lac pijta. Tsa'ix juli mu' ba caj i coltañonla. La' ñuc'ac lac pusic'al. Yom tijicñayonla cha'an wolix i coltañonla, che'ob. ¹⁰Lac Yum mi caj i yalq'ueñob i wenlel jini año' ba ti Sion. Pero mi caj i t'uchtan jini año' ba ti Moab. Mi' cajelob ti oc'mal che' bajche' ti ta'jibal. ¹¹Anquese mi' ñopob i coltañob i ba che' bajche' xñuxijel mu' ba i ñijcan majlel i c'ab, pero lolom jach. Lac Yum mi caj i ju'sabeñob i ch'ejlel i pusic'al. ¹²Mi caj i laj jisan jini chan ba ts'ajc am ba ti' joytilel Moab. Mi caj i choc jubel ti lum cha'an mi' sujtel ti ts'ubejn.

C'ay cha'an i tijicñayelob i pusic'al

26 Ti jim ba q'uin mi caj i c'ayañob ili c'ay ya' ti Judá: Añach lac cha'an p'atla ba tejclum. Joyolonla cha'an lac Yum mu' ba i coltañonla, che'ob. ²Jambeñob i ti' tac tejclum cha'an mi' laj ochelob jini tojo' ba mu' ba i c'uxbiñob lac Yum. ³Jatet c Yum ma' cantaben i pusic'al jini mu' ba i ñopet cha'an ñach'al mi' yajñel mu' ba i chan ña'tañet. ⁴Ñopo lac Yum ti pejtelel ora, come lac Yum Dios a p'atlelelch ti pejtelel ora. ⁵Lac Yum mi' ju'sabeñob i pusic'al jini chan ba mi' melob i ba ya' ba' chumulob ti chañilel wits. Mi' jisan i p'atlelel jini tejclum. Mi' yac' ti sujtel ti lum. ⁶Jini p'ump'uño' ba yic'ot jini tic'labilo' ba mi caj i t'uchtañob.

⁷Tojach i bijlel jini toj ba winic. Come tojet Dios mu' ba a patbeñob majlel. ⁸C Yum lojon, com lojon c mel chuqui a wom. Com lojon c tsictesan i ñuclel a c'aba' cha'an ma' ña'tantel. ⁹Ti ac'alel mic saclañet c'alal mi' sac'an pañimil. Ti pejtelel c pusic'al mic cha'len wersa cha'an mic tajet. Cujil che' ma' tilel ti meloñel mi caj i cayob i jontolil jini año' ba ti pañimil. Mi caj i ñopob chuqui toj.

¹⁰Anquese ma' pasbeñob i yutslel a pusic'al jini jontolo' ba, mi' chan cha'leñob jontolil. Ma'anic mi' p'isob ti' wenta che' tijicñayob i pusic'al. ¹¹Ma'anic mi' jac'ob che' ma' tic'ob. La' i

q'uelob bajche' ma' c'uxbin a cha'año' bΛ. La' i yubiñoob quisin. Yom ma' choc tilel c'ajc lotol bΛ a cha'an, cha'an mi' pulel a contrajob. ¹²C Yum, aq'ueñoñ lojon i ñach'tilel lojon c pusic'al, come tilem ti jatet pejtcl c melbal lojon. Tsa' jach mejliyon lojon cha'an tsa' coltayon lojon. ¹³C Yum lojon Dios, ti yambΛ ora tsac yuma lojon yambΛ yumΛlob, pero mach chan che'ix wale. Jatet jach wolic yumañet lojon. ¹⁴Ma'anic mi' ch'ojoyelob jini chameñoobix bΛ tsa' bΛ c yumayob ti yambΛ ora. Tsa' jisayob. Tsa' wac'ayob ti ñajiyel. Ma'anix majch mi' chan ña'tañoob.

¹⁵Wolix a q'uejlel ti ñuc, c Yum. Tsa'ix a ñuq'uesa a tejclum. Tsa'ix a tats'Λ majlel i cayajonlel cha'an ñuc mi' majlel. ¹⁶C Yum, che' bΛ tsi' yubiyob wocol winicob, tsi' saclayetob. Che' bΛ tsa' ju'sabeyob i pusic'al, tsi' mucul pejayetob ti oración. ¹⁷Che' tats'Alon lojon ti a tojlel, tsa cubi lojon wocol che' bajche' x'ixic woli bΛ ti bajq'uel che' lac'Alix mi' yilan pañimil i yalobil. ¹⁸Joñoñ lojon ja'el tsac cha'le lojon bajq'uel yubil pero lolom jach. Ma'anic majch tsi' taja i coltAntel. Ma'anic tsa' coltAnti lac lumal. ¹⁹Pero xuc'ul mic ñop lojon iliyi: Jini chameño' bΛ mu' bΛ i ñopetob mi caj i cha' cuxtiyelob. Mi caj i cha' ch'ojoyelob. La' ch'ojoyicob jini walyalo' bΛ ti lum. La' i cha'leñoob c'ay ti' tijicñayel i pusic'al, come mi caj a tilel che' bajche' ye'eb tic tojlel lojon. Mi caj a wac'ueñoob i cuxtalel jini chameño' bΛ a cha'an.

²⁰Sujtenla, c pi'Allob. Ñup'benla i ti' tac la' wotot. Yom mi la' poj mujcun la' bΛ jinto mi' lajmel i mich'ajel lac Yum. ²¹La' wilan, tal lac Yum ti panchan cha'an mi' yac'ueñoob i toj i mul jini año' bΛ ti pañimil. Ma'anix mi mejlel i mucob i bΛ jini stsansajob. Mux i tsictiyel i mul.

Mi caj i loq'uelob ti libre jini israelob

27 Ti jini tal to bΛ ora lac Yum mi caj i c'An jini bΛbΛq'uen bΛ espada am bΛ ti' c'Ab cha'an mi' tic'lan jini jontolo' bΛ. Mi caj i majlel i cha'an.

²⁻³Ti jim bΛ q'uin la' i cha'leñoob c'ay jini año' bΛ ti Judá che' loq'uemobix ti' p'Atalel i contra. La' i c'ayñoob i ts'usubil lac Yum: "A Dioson YumAlon. Wolij cantan Israel che' bajche' ts'usubil. Mic mul ti ja' ti jujump'ejl q'uin. Ti q'uiñil ti ac'alel mic wets' loq'uel j contrajob ame anic chuqui mi' tumbeñet. ⁴⁻⁵Ma'anix c mich'ajel ti contra Israel. Muq'uc i pim'an c

ts'usubil, mi caj c'ac'ñan. Mi caj c choc ti c'ajc jini mach ba wenic. Mi yom i c'ajtibeñon i colt'antel, la' tilic i cha' mel i ba quic'ot". Che'ach yom mi' cha'leñob c'ay. ⁶Tal i yorajlel che' mi caj i wen ac' i wi' jini p'ac'ab Jacob. Che' wen chucul ti lum i p'olbal Jacob, mi caj i loq'uel i nich. Mi caj i pam pujquel i wut ti pañimil.

⁷⁻⁸I Dios israelob tsi choco majlel ti c'ajchel i cha'año' ba, pero mach lajalic tsi' yaq'ueyob i yubin wocol israelob bajche' yan tac ba tejlumob, i contrajob israelob. P'isbil jach tsi' tsansayob. Come lac Yum tsi' yaq'ueyob i toj i mul che' ba tsi' chocoyob majlel ti c'ajchel ti ñajtal. Tsi' p'asa i ba ti' contra che' ba tsi' wets'eyob majlel ti' mich'ajel che' bajche' p'atal ba ic' loq'uem ba ba' mi' pasel q'uin. ⁹Che'ach tsi' pocbeyob loq'uel i mul Jacob. Tsi' jisa pejtelel jini dioste' yic'ot pulantib, yic'ot oy tac ba' tsi' ch'ujutesayob q'uin, cha'an ma'anix mi' chan cha'leñob jini quisintic jax ba. Tsi' yac'la ti bic'tiyel jini xajlel am ba ti pulantib cha'an ma'anic mi' chan ch'ujutesañob. ¹⁰Che' jini ñach'alix jini colem tejlum joyol ba ti ts'ajc. Claybilix jini otot tac. Pimix i pam otot. Woliyob ti buc'bal wacax. Ya' mi' w'ayelob. ¹¹Lajal jini tejlum che' bajche' yajlem ba te', tiquinix ba. Talob x'ixicob i xot'ob. Mi' tempañob cha'an si'. Ma'añobic i pusic'al jini winicob x'ixicob. Ma'añobic i ña'tabal. Jini cha'an Dios tsi' clayyob. Dios tsa' ba i meleyob ma'anic mi caj i p'untañob. Anquese Dios tsi' meleyob ma'anic mi caj i pasbeñob i yutslel i pusic'al.

¹²Pero ti jini tal to ba ora lac Yum mi caj i cha' tempan tilel i cha'año' ba. Mi caj i yajcañob tilel ti jujuntiquil c'alal ti colem ja' i c'aba Eufrates c'alal ti Egipto. Mi caj i yajcañob che' bajche' mi lac yajcan trigo ya' ba' mi' jajts'el loq'uel i bac'. ¹³Ti jim ba q'uin mi caj i wustal trompeta. Mi caj i colt'antelob jini woliyo' ba ti wocol ti Asiria yic'ot ti Egipto. Mi caj i cha' p'ajyelob tilel jini ts'a'lebilo' ba cha'an mi' ch'ujutesañob lac Yum ti ch'ujul ba wits i c'aba' Jerusalén.

T'an ti' contra Samaria

28 Obolob i ba jini año' ba ti Samaria, jini joctal ba tejlum ya' ba' chumul i yum israelob. Mi' chañ'esañob i ba jini x'ac'ajelob. Mi' ch'alob i ba yic'ot nichim. Mi' boñob i jol ti perfume. Mi' cha'leñob q'uiñijel. Mi caj i

jilel i ñuclél yic'ot i ch'ajlil. ²Awilan, lac Yum mi caj i choc tilel p'atál ba soldadojob loq'uemo' ba ti Asiria cha'an mi' contrajiñetla. Talob che' bajche' tuñija' yic'ot cabal ic'. ³Mi caj i t'uchtantel jini tejclum Samaria ba' mi' chañ'esañoob i ba jini xyac'ajelob israelob. ⁴Ti ora jach mi caj i jilel i ñuclél yic'ot i t'ojlawel jini wen ba joctál. Lajal mi caj i jilel che' bajche' i pan wut higuera che' an majch mi' tuc' cha'an mi' bac' c'ux.

⁵Ti jim ba ora i Yum Panchan yic'ot Pañimil mi caj i yac'ueñoob i ñuclél yic'ot i t'ojlawel i cha'año' ba mu' ba i clytalob. Lac Yum i wentajach i ch'ajlil i jol. ⁶Mi caj i yac'uen toj ba i pusic'al jini mu' ba i cha'len meloñel. Mi caj i yac'ueñoob i ch'ejlel i pusic'al jini soldadojob mu' ba i cantañob i ti' tejclum ame ochicob i contrajob.

⁷Pero wale tactacñayob ti xambal cha'an yacob. Jini motomajob yic'ot x'alt'añoob wen yujilob lembal. Wo'ob jax ti lembal. Sojquemob i jol. Mach mejlix ti meloñel. ⁸Jini we'te' i cha'añoob pajqu'em jax ti xejal yic'ot ti' bi'bi'lel. Ma'anic sac ba. Lu' bibi'.

⁹Mi' yalob: ¿Chucoch mi' lon pejcañonla Isaías che' bajche' jini? ¿Mu' ba i lon ña'tan mi alalon to la? Ma'anic mi juntiquilic mu' ba mejlel i ch'amben isujm. ¹⁰Come c'unte' c'unte' mi' ñojpel mandar. Mach sojlic ti jump'ejl q'uin laj cantesantel. Ti' tsolom tac mi la cubin, ts'ita' ilayi, yamba ts'ita' ixi, che'ob. ¹¹Pero ma'anic mi' p'isob ti' wenta i T'an Dios. Dios mi caj i payob majlel ti yamba lum ba' yamba i t'an winicob. Mi caj i ju'sabeñoob i pusic'al che' mi' pejcañob ti' tojlel jini parte ba i t'an. ¹²Diosach tsa' ba i wan subeyob: Ubinla c t'an come jiñach i ñach'tilel la' pusic'al. Che' jini mux caj la' c'aj la' wo, che'en Dios. Pero mach yomobic. Ma'anic tsi' jac'ayob. ¹³Jini cha'an c'unte' c'unte' mi caj i chan subeñoob i mandar lac Yum. Ti jujump'ejl q'uin mi caj i ts'ita' cantesañob. Ti' tsolom tac mi caj i yubiñob ts'ita' ilayi, yamba ts'ita' ya'ya'i. Pero anquese wen tsiquil i cantesabal, mi caj i tats'ob i ba. Mi caj i jats'ob i yoc. Mi caj i yajlelob. Mi caj i cajchelob majlel.

T'an ti' contra Jerusalén

¹⁴Jini cha'an winicob chumulet ba la ti Jerusalén, ñich'tabenla i t'an lac Yum jatetla mu' ba la' cha'len wajal. ¹⁵Come chan mi la' pas la' ba. Mi la' wal: Tsa'ix c challe lojon trato cha'an ma'anic

mi lac chamel. Tsa'ix c laja lojon c t'an yic'ot jini xiba cha'an mi' tilel i coltañon lojon ti' tojlel asirijab. Mach majlix i cha'añob. Tijicñayon lojon cha'an tic lot. Mach c tojoyic c mul. Xuc'ulon cha'an sojquem ba c t'an, lon che'etla. ¹⁶Jini cha'an lac Yum Dios woli' ya!: Awilan mi caj c choc tilel ti Sion juntiquil winic lajal ba bajche' jump'ejl Xajlel, xuc'ul ba, yajcabil ba, i t'ojol jax ba. Jini Xajlel i c'aclibach pejtél wa'chocobil ba. Tijicña jini mu' ba i ñop come xuc'ul mi' majlel ti wen ba bij. ¹⁷Pero mi caj c mel jini winicob yujilo' ba lot. Toj mi caj c melob. Tsa' wa'choco lot che' bajche' otot cha'an xuc'ul ma' wajñel. Pero tal tuñija' cha'an mi' jisan a wotot ba' lon xuc'ulet. Tal but'ja' i cuch majlel. Che' jini ma'anix ba' ma' mujcun a ba, che'en. ¹⁸Mi' caj ti jejmél jini trato tsa' ba la' mele yic'ot xiba cha'an ma'anic mi la' chamel. Che' tal wocol i jisañetla ma'anic la' coltanel. Talob la' contrajob che' bajche' but'ja'. Mi caj i tujc'añetla majlel. ¹⁹Ti q'uiñil yic'ot ti ac'alel, jayyal jax mi' ñumel, mi caj i wets'etla majlel jinto mi la' ña'tan isujm c t'an woli ba c subeñetla. BAbAq'uen jax jini wocol mu' ba caj ti ujtél.

²⁰Tsa' la' mele la' wayib, pero mach mejlic la' sats' la' ba. Mach mejlic la' mos la' ba ti la' tsuts come ch'och'oc jax i chiquin. ²¹Lac Yum mi caj i tilel i pas i mich'ajel che' bajche' tsi' pas ya' ti wits i c'aba' Perazim yic'ot ti joctal i c'aba' Gabaón. Mi caj i mel i ye'tel, jini leco ba i ye'tel mach ba cambilic la' cha'an. Mi caj i jisan i cha'año' ba. ²²Jini cha'an mach yomix mi la' chan cha'len wajleya, ame utsi p'ojlic la' wocol, come tsa'ix i subeyon Dios bajche' mi caj i meletla i Yum Panchan yic'ot Pañimil. WAn ña'tabil i cha'an bajche' mi caj i jisañetla.

²³⁻²⁴Ñich'tanla c t'an. Yom mi la' wen p'is ti wenta. Jini mu' ba i cha'len e'tel ti lum, ¿mu' ba i chan pic majlel jini lum ti pejtelel ora? ¿Mach ba muq'uic i cha'len pac' che' mi' yujtel i pic? ²⁵Che' ts'amal lum mi' cha'len pac' ti chajp ti chajp che' bajche yom. ²⁶Yujil bajche' yom melol, come Dios tsi' cantesa. ²⁷Mach junlajalic mi lac loc'san i bac' pejtelel mu' ba i colel. Mi laj c'an chojom cha'an mi' lac cha'len ixom. Mi laj quel cajpe' ti máquina. ²⁸Mi laj cuj trigo yic'ot te!. Che' mi' yujtel ti cujtal jini trigo, ma'anix mi lac chan cuje!. ²⁹Wen uts'at mi' cantesañonla i Yum Panchan yic'ot Pañimil. Wen cabal i ña'tabal. Wen yujil cantesa.

I mul Jerusalén

29 Tsi' y^ΛΛ lac Yum: Obolob i b^Λ jini año' b^Λ ti Jerusalén, i tejclum David. Melbeñob i yejtal tac jini diosob. Ti jujump'ejl jab mi la' cha'len q'uiñijel. Mi' yujtel jump'ejl, mi la' mel yamb^Λ. ²Mi caj c choc tilel wocol ti la' tojlel. J^Λc'j^Λc'ñayetla mi la' cajel ti uq'uel. Mi caj la' wubin i ch'ijiyemlel la' pusic'al. Mi caj i sujtel Jerusalén ti' yajñib c'ajc che' bajche' pul^Λntib p^Λj^Λq'uem b^Λ ti ch'ich'. Jini cha'an mic pejcañet ti Ariel, come jiñach yamb^Λ i c'aba' Jerusalén. ³Mi caj j contrajiñet. Mi caj cochel ti a contra. Mi caj c joy mactan Jerusalén ti p'^Λt^Λ b^Λ e'tijibal cha'an mic jisan ti guerra. ⁴Che' jini mi caj a cha'len t'an ti yebal lum. Wocol mi caj i yubintel ti pañimil cha'an pim jini lum. Lajal yubil che' bajche' i t'an ch'ujlel^Λ mucul b^Λ ti tam b^Λ lum. ⁵Mi caj i b^Λc' sujtelob a contrajob che' bajche' jini ic' mi' wets' majlel i suj^Λ trigo. ⁶Joñon i Yumon Panchan yic'ot Pañimil, mi caj c tilel ti' tojlelob yic'ot i t'an chajc, yic'ot i yujquel lum, yic'ot sutujt ic', yic'ot c'ajc. ⁷Pejtel woliyo' b^Λ ti guerra ti' contra Jerusalén mi caj i sac jilelob che' bajche ñajal. ⁸Che' wen an i wi'ñal winic mi' ñajlen i b^Λ i ñ^Λc', pero mach lajmic i wi'ñal. Che' an i tiquin ti' mi' ñajlen ja', pero c'un to pañimil mi' yubin che' mi' ch'ojoyel. Che' ja'el la' contrajob mi' lon ña'tañob i m^Λlob ti guerra, pero mux caj i jilelob.

Cha'p'ejl i pusic'al israelob

⁹Ñopox lot mi a wom a soc a b^Λ. Otsan a b^Λ ti xpots' mi a wom ajñel ti ic'ch'ipan b^Λ pañimil. Y^Λquetla pero mach cha'anic vino. T^Λc^Λlbexel mi la' majlel, pero mach cha'anic lembal. ¹⁰Come tsa'ix c^Λc'lyetla ti tam b^Λ w^Λyel. T^Λac muts'beyob i wut jini x'alt'añob yic'ot jini año' b^Λ i ña't^Λbal mu' b^Λ i c^Λntesañetla. ¹¹Jini cha'an ma'anic mi' sojlel ili t'an ti a pusic'al. Lajal^Λch ili tac mu' b^Λ caj ti ujtel bajche' ñup'ul b^Λ jun am b^Λ i sellojlel. Mi tsa' w^Λq'ue i q'uel jun juntiquil yujil b^Λ i q'uelol, mi caj i jac': "Mach mejlicon come ñup'ul", ¹²o mi tsa' w^Λq'ue jini mach b^Λ yujilic jun mi caj i y^Λl: "Mach cujilic jun", che'en.

¹³Jini cha'an lac Yum woli' y^Λl: Jini winicob x'ixicob mi' pejcañoñob ti' yum, pero ma'anic mi' yumañoñob. Mi' lon

ch'ujutesañoñob ti' t'an, che ñajt añoñob i pusic'al. Woli jach i ñopob i cantesalbal winicob. ¹⁴Jini cha'an ña'tanla. Mi caj cac' ti sajtel jini winicob x'ixicob cha'p'ejl jax ba i pusic'al cha'an mi' tojob i mul. Mi caj cac' ti jilel i ña'talbal jini wen yujilo' ba, che'en lac Yum.

¹⁵Obolob i ba jini mu' ba i mucob i ba ti' tojlel Dios, mu' ba i melob jontolil ti ac'alal. Mi' lon ña'tañob ma'anic mi' q'uejlelob, mach cambilobic. ¹⁶Tontojob. ¿Mach ba ñuquic jini Xmel P'ejt? Pero jini p'ejt mach ñuquic. I melbal jach i yum. Che' ja'el jini winicob i melbalob Dios. ¿Chucoch mi' lon chañ'esañoñob i ba ti' tojlel i yum tsa' ba i meleyob? Mi' lon alob mach i melbalobic Dios. Mi' ts'a'leñoñob i yum che' mi' lon alob mach yujilic.

Mi caj i coltanel Israel

¹⁷Mach jalix mi caj i sujtél ti pac'albal jini te'el am ba ti Líbano. Ya' ba'an pac'albal mi caj i cha' coel te'el. ¹⁸Ti jim ba q'uin jini xcojcob mi caj i yubiñoñob ili t'an ts'ijbubil ba. Mi caj i cha' c'otelob i wut jini xpots'ob añoñob' ba ti ic'ch'ipan ba pañimil. ¹⁹Tijicña mi caj i yubiñoñob ti lac Yum jini pec' ba mi' melob i ba. Jini pobrejo' ba mi caj i tajob i ñuclél ti jini Ch'ujul Ba i cha'an Israel. ²⁰Mi caj i jilel jini xtic'laya yic'ot jini yujil ba wajal. Mi caj i tsansantelob pejtelel woli ba i ña'tañob jontolil, ²¹mu' ba i cha'leñoñob leto. Mi' jop'beñoñob i mul i pi'alob. Mi' chijtañoñob jini mu' ba i yaq'ueñoñob i toj i mul. Mi' jop'ob t'an cha'an mi' ma'c'añoñob jini toj ba.

²²Jini cha'an che'ach woli' ya' lac Yum tsa' ba i ma'ña loq'uel Abraham ti mulil: Mach chan muq'uix ti baq'uen Jacob. Mach muc'obix ti quisin c cha'añoñob' ba. ²³Come che' mi' q'uelob bajche' wolij coltañoñob tij c'ab, mi caj i bac'ñañoñob. Mi caj i ch'ujutesañoñob. Mi caj i subob i ñuclél jini Ch'ujul Ba ti Israel. Mi caj i bac'ñañoñob come i Dioson Israel. ²⁴Jini tsa' ba lotintiyob mi caj i ch'ambeñoñob isujm. Jini tsatso' ba i pusic'al mi caj i jac'ob i cantesantel. Che' tsi' ya'la lac Yum.

Lolom jach mi' c'ajtiñoñob i coltanel ti Egipto

30 Lac Yum tsi' ya'la: Obol la' ba calobilob mu' ba la' chañ'esan la' ba. Mi la' mel trato mach ba tilemic tic pusic'al. Mi la' laj la' t'an yic'ot jini mu' ba i contrajiñoñob

quEspíritu. Che' jini mi la' p'ojlesan la' mul. ²Mi la' bɔc' majlel ti Egipto cha'an mi la' saclan la' coltɔntel. Tsa'ix la' c'ajtibe Faraón la' coltɔntel. Ma'anic mi la' c'ajtibeñon. ³Pero mi caj la' wubin quisin cha'an tsa' la' c'ajti ti' tojlel Faraón. Mux caj la' toj la' mul che' mi' yɔq'uetla ti wocol come mach mejlic i coltañetla. ⁴Anquese mi' jac'beñob i t'an c'ɔlɔl ti Zoán c'ɔlɔl ti Hanes, ⁵pero mach muq'uic i coltañetla. Mi caj i yɔq'uetla ti quisin.

⁶La' wilan c winicob woli' p'ɔtob majlel i chuba'an ti burro tac yic'ot ti camello tac. Mi' majlelob ti bɔbɔq'uen bɔ bij mu' bɔ i ñumel ti jini colem bɔ pañimil ba' wen tiquin lum. Mi' ñumelob ba'an bajlum yic'ot jontol bɔ lucum. Mi' majlelob ti Egipto cha'an mi' mañob i coltɔntel. Pero ma'anic chuqui mi' yɔq'uentelob ti' q'uexol. ⁷Come lot jach i t'an jini año' bɔ ti Egipto. Tsa'ix cɔq'ue i c'aba', "Ajín mach bɔ yomic i wis ñijcan i bɔ".

⁸Wale yomix ma' ts'ijban ti jun jini tsa' bɔ cɔlɔ cha'an jini mu' bɔ i lon ac'ob i pusic'al ti Egipto cha'an mi' q'uelob jini israelob yic'ot i yalobilob ti pejtelel ora. Ya' mi' tajob i tic'ol. ⁹Machic ma' ts'ijban, mi caj i lon alob ma'anic tsac tiq'uiyob, come tsatsob i pusic'al. ¹⁰⁻¹¹Mi' subeñob jini x'alt'añob c cha'an: "Mach chɔn comix cubin lojon la' t'an. Mach la' subeñon lojon jini isujm bɔ. Subeñon lojon jini uts'at bɔ, jini lot bɔ. Mach comic lojon jini toj bɔ bij, jini ch'ijiyem bɔ. Mach mi la' chɔn pejcañon lojon cha'an jini Ch'ujul Bɔ ti Israel", che'ob.

¹²Jini cha'an jini Ch'ujul Bɔ ti Israel woli' yɔl: Woli la' ts'a'len jini mu' bɔ c subeñetla. Woli la' cha'len lot yic'ot tic'laya. Ma'anic mi la' sutq'uin la' bɔ. ¹³Jini cha'an mi caj i bɔc' tajetla wocol. Mi caj i yujtel ti la' tojlel che' bajche' chan bɔ i bojte'lel otot am bɔ i jajp. Ti ora jach mi' c'uch i bɔ. Mi' yajlel. ¹⁴Dios mi caj i bic'ti top'etla che' bajche' p'ejt. Ma'anic mi caj i cɔytɔl mi junxejt'ic cha'an ma' lech i ñich c'ajc, mi cha'an ma' luch ja'. ¹⁵Come lac Yum Dios, jini Ch'ujul Bɔ ti Israel, woli' yɔl: Sutq'uin a bɔ ba' añon, ñopox c t'an. Che' jini ñach'ɔl mi caj a wajñel. Mi caj a taj a p'ɔtɔlel yic'ot i xuc'tilel a pusic'al. Pero woli jach a ñusabeñon c t'an. ¹⁶Wola' wɔl: "Mach comic lojon. Mi caj c taj lojon j coltɔntel ti Egipto. Mi caj i yɔq'ueñoñob ch'ejl bɔ caballo tac cha'an guerra", che'etla.

Pero mi caj i yajñesañetla la' contrajob. ¹⁷Juntiquil a contra mi caj i yajñesan jump'ejl mil ti la' tojlel. Jo'tiquil mi caj i yajñesañetla jinto pam pujquemetla ti jujuntiquiletla. Lajal mi caj la' cʌʏʌl che' bajche' wʌjʌcña bʌ te' ti pam wits.

Dios mi caj i yʌq'uen i yutslel i t'an Israel

¹⁸Pero lac Yum woli to i pijtañetla jinto mi la' sutq'uin la' bʌ, cha'an mi' pʌsbeñetla i yutslel i pusic'al. Yom i p'untañetla, come tojʌch lac Yum Dios. Tijicñayob pejtelel mu' bʌ i pijtañob lac Yum. ¹⁹Winicob x'ixicob c cha'año' bʌ ti Jerusalén, ma'anix mi caj la' chʌn cha'len uq'uel. Mi caj i pʌsbeñetla i yutslel che' mi' yubin la' wuq'uel. Mi caj i jac'beñetla.

²⁰Anquese tsi' yʌq'ueyetla wocol yic'ot mel pusic'al, pero ma'anix mi caj i chʌn mujcun i bʌ la' waj cʌntesa. Mi caj i yajñel la' wic'ot cha'an mi' cʌntesañetla. Mi caj la' q'uel ti la' wut. ²¹Che' mi la' ts'ita' xoy la' bijlel mi ti la' ts'ej mi ti la' ñoj, mi caj la' wubin T'an ti la' pat mu' bʌ i yʌl: Mach ya'ic yom. Wʌ jach an jini bij. Wʌ' yom mi la' cha'len xʌmbal, che'en.

²²Mi caj la' bi'len pejtelel la' dioste' tac melbil bʌ ti sasʌc taq'uin yic'ot ti oro. Mi caj la' choc loq'uel che' bajche' tsucul bʌ pisil wen bibi' bʌ. Mi caj la' wʌl: Aj, mach a tʌl, che'etla.

²³Che' jini Dios mi caj i yʌq'ueñetla ja'al che' ti' yorajlel pac'. Cabʌl mi caj i yʌq'ueñetla i bʌl la' ñʌc' yic'ot cabʌl jam cha'an la' wacax. ²⁴Jini wacax yic'ot burro woliyo' bʌ ti e'tel mi caj i c'uxob trigo loc'sʌbilix bʌ i sujʌl, wen melbilix bʌ yic'ot i yʌts'mil. ²⁵Dios mi caj i tsʌnsan la' contrajob ti jim bʌ q'uin che' mi' yajlel jini chan bʌ tsa'jc. Mi caj i yʌq'ueñetla cuxul bʌ ja' ti jujump'ejl wits yic'ot ti jujump'ejl bujtʌl. ²⁶Lajal mi caj i majlel i saclel uw che' bajche' i saclel wucp'ejl q'uin ti jini ora che' mi' tilel lac Yum cha'an mi' lajmesan i cha'año' bʌ. Jini colem bʌ i lojwel tsa' bʌ i yʌq'ueyob Dios mi caj i cha' lajmesan.

Lac Yum mi caj i mel Asiria

²⁷La' wilan, talix lac Yum am bʌ ti ñajʌl. Wen mich'. Wen pim jini buts' woli bʌ i letsel ti' joytilel. Mi' cha'len t'an ti' mich'ajel. Lajal i yiq'uilel i yej che' bajche' c'ajc yujil bʌ jisaya. ²⁸Lajal i mich'ajel bajche' colem but'ja' mu' bʌ i c'otel ti lac bic'. Mi caj i laj misun majlel tejclum tac. Dios mi caj i

yotsabeñob freno ti' yej jini winicob mu' ba i chañ'esañob i ba. Mi caj i payob majlel ba' mi' tojob i mul.

²⁹Pero i cha'año' ba Dios mi' cajelob ti c'ay ti' tijicñayel i pusic'al che' bajche' ti ac'alel che' woliyob ti ch'ujul ba q'uiñijel. Mi caj i ñuc'an i pusic'al che' bajche' ti' yorajlel marcha che' mi' yubintel i t'an corneta. Tijicñayob mi' majlelob ti Jerusalén ya' ti' wits lac Yum, i Xajlel Israel. ³⁰Lac Yum mi caj i pas i ba ti ñuc ba yumal. Mi caj i yac' ti ubintel i t'an am ba i ñuclel. Ti' mich'ajel mi caj i jats' i contrajob ti cabal i p'at'alel. Mi caj i jisañob ti c'ajc yic'ot p'at'at' ba ic' yic'ot colem ba tuñija'. ³¹Mi' cajelob ti cabal baq'uen jini asirijob che' mi' yubibeñob i t'an lac Yum, come mi caj i jats'ob cha'an i mul. ³²Lac Yum mi caj i jats'ob ti guerra che' woliyob ti c'ay yic'ot música tac cha'an i tijicñayel i pusic'al. ³³Anix ora chajpabil jini c'ajc ba' mi' cajelob ti pulel jini asirijob. Chan latsbil si'. Lac Yum mi caj i c'an i yiq'uilel i yej cha'an mi' tsuc'.

Winicob jach jini egiptojob

31 Obolob i ba mu' ba i majlel i saclañob i colt'antel ti Egipto. Mi' yac'ob i pusic'al ti ch'ejl ba caballo yic'ot carreta. Ma'anic mi' ñopob jini Ch'ujul Ba ti Israel. Ma'anic mi' c'ajtiñob i tojes'antel ti lac Yum. ²Laj ña't'abil i cha'an lac Yum. Wersa mi caj i tojob. Lac Yum ma'anic mi caj i q'uextan i t'an. Mi caj i contrajin pejtél xjontolilob yic'ot pejtél mu' ba i coltañob. ³Come winicob jach jini egiptojob. Mach Diosobic. Jixcu i caballojob, caballo jach. Mach lajalic bajche' espíritu. Che' mi' wox i c'ab lac Yum cha'an mi' contrajiñob, mi caj i p'ajcas jats'ob i yoc. Mi caj i yajlelob yic'ot jini tsa' ba i c'ajtiyob i colt'antel ti' tojlel. Lajal mi caj i jilelob.

⁴⁻⁵Lac Yum tsi' subeyon: Jini bajlum, che' mi' tsansan tiñame, mi' cha'len t'an che' chucul i colojm ti' yej. Ma'anic mi' bac'ñan xcanta tiñame' anquese motocñayob ti' contra. Anquese cabal mi' cha'leñob oñel, ma'anic mi' cay i c'ux. Che'ach ja'el lac Yum. Mi caj i tilel ti guerra wa' ti Sion wits. Mach yujilic baq'uen i Yum Panchan yic'ot Pañimil. Che' bajche' joyocña mi' cha'len wejlel mut ti' chañelal i c'u', che' ja'el lac Yum mi caj i joyotan Jerusalén cha'an mi' coltan. Mi caj i yac' ti colel. Mi caj i cantan.

⁶Jini cha'an, c pi'lob, anquese jontoletla, la'la sutq'uin la' ba ba'an Dios. ⁷Ti jim ba q'uin che' mi la' sujtet ti jujuntiquiletla, mi caj la' choc majlel la' dios tac tsa' ba la' mele ti oro yic'ot ti plata cha'an ti' jontolil la' pusic'al. ⁸Mi caj i jilelob ti espada jini asirijob, pero mach i cha'anic winicob. I cha'añlach Dios. Mi caj i puts'tañob espada. Jini ch'iton ba soldadojob mi caj i chujquelob cha'an mi' yochelob ti mozo. ⁹I yumob asirijob mi' cajelob ti baq'uen. Mi caj i puts'elob che' mi' q'uelob i bandera tac jini israelob. Jiñlach i t'an lac Yum mu' ba i pas i c'ac'al ti Sion. Chajpabil i cha'an horno ti Jerusalén.

Jini toj ba Rey

32 La' wilan, tal jini Rey mu' ba caj i cha'len yumantel ti toj ba i pusic'al. Toj ja'el mi caj i cha'leñob yumal jini ñuco' ba año' ba i ye'tel mu' ba i tilelob i coltan jini Rey. ²Jini Winic i wentajach puts'ibal cha'an ñuqui ic', i wentajach ch'entun mu' ba i mactan sutujt ic'. Lajalach bajche' samacña ba ja' ti tiquin ba pañimil yic'ot lech'el ba xajlel mu' ba i yac' i yaxñalel che' c'unix pañimil cha'an c'ux q'uin. ³Tal i yorajlel mux i cajñel i wut israelob. Mi caj i q'uelob lac Yum. Mi caj i yubibeñob i t'an. ⁴Jini tontojo' ba mi caj i ch'ambeñob isujm jini t'an. Jini xbes t'añob uts'atix mi caj i loq'uelob i t'an. ⁵Ma'anix mi caj i chan alob ti uts'at jini mach ba uts'atic. Ma'anix mi caj i chan alob ti p'ejw jini xujch'ob. ⁶Mi' caj ti wen cajñel jini jontol ba winic come jontol i t'an. I melbal jini cha'p'ejl ba i pusic'al mi' yac' ti cajñel. Mi' cha'len lotiya. Mi' socben i t'an Dios. Mi' chilben i bal i ñac' jini am ba i wiñal. Mi' chilben i ya'al jini am ba i tiquin ti'. ⁷Wen babaq'uen i maña jini xjontolil. Mi' wan ña'tan i jisan ti lo'loya jini p'ump'un ba ya' ti melobajal. Mi' yutsi tic'lan anquese toj. ⁸Pero jini xuc'ul ba mi' ña'tan i mel chuqui uts'at. Ti pejtelel ora uts'at chuqui mi' mel.

I toj'esantel jini x'ixicob ti Jerusalén

⁹X'ixicob mu' ba i to'ol ñusañob q'uin, tejchenla cha'an mi la' wubin c t'an. Xch'ocob mach ba anic mi' jac'ob t'an, p'isila ti la' wenta chuqui mic subeñetla. ¹⁰Come ti junjab to mi caj la' cha'len baq'uen. Ma'anix mi caj la' to'ol ñusan q'uin. Come ma'anic mi caj i yac' i wut la' ts'usubil. Ma'anic chuqui mi

caj la' c'aj. ¹¹Cha'lenla baq'uen x'ixicob mu' ba la' to'ol ñusan q'uin. Yom mi' toj sajtel la' pusic'al chan ba mi la' mel la' ba. Cha'lenla uq'uel. Jochola i t'ojol jax ba la' pislel cha'an mi la' la'p coxtal. ¹²Tsats mi caj la' jats' la' tajn cha'an uq'uel che' ma'anix chuqui mi' loq'uel ti lum, che' ma'anix mi' yac' i wut ts'usub. ¹³Ya' ti' lum c winicob, mi' caj ti colel ch'ixol yic'ot yopol te' mu' ba ti c'ux. Jochol mi caj i c'aytal la' wotot ya' ti ojlil tejclum ba' tijicñayetla wale. ¹⁴Mi caj i jochtiyel jini colem ba i yotot rey ba' wen chumulob. Jini chan ba q'ueloñib am ba ti ojlil tejclum mi caj i sujtel ti ch'en. Ya' i mi caj i pam cha'leñob buc'bal burro yic'ot chivo, ¹⁵jinto mi la c'aq'uentel jini Espíritu tilem ba ti panchan. Che' jini, jini mate'el mi caj i cha' ochel ti pac'ab'al. Jini lum mi caj i cha' ac' i wut. ¹⁶Toj mi caj i yujtel meloñel baqui jach an winicob, mi ti jochol ba lum mi ti cholel. ¹⁷Che' toj mi' melob winicob ñach'al mi caj i yajñelob. Cha'an ti' caj mi' cha'leñob chuqui toj, tijicñayob mi caj i c'ajob i yo. Ma'anix baq'uen ti pejtelel ora.

¹⁸Xuc'ul mi caj i chumt'lob c cha'año' ba. Xuc'ul i yotot. Ma'anic majqui mi caj i contrajiñob. ¹⁹Pero mi caj i jisantelob jini asirijob yic'ot pejtel i tejclum. ²⁰Tijicña mi caj la' wajñel mu' ba la' cha'len pac' ti' ti' pejtelel jini pa' tac. On mi caj la' c'aj. Mi caj i cha'len buc'bal la w'alac' ti potrero.

Lac Yum mi' coltañonla

33 Obol la' ba asirijob mu' ba la' cha'len jisaya anquese ma'anic majch tsi' wis tic'layetla. Mi la' wac' la' pi'lob ti' c'abob i contra. Che' ba tsa'ix la' jisayob mi caj la' jisantel. Che' ba tsa'ix la' choñoyob mux caj la' chojñel. ²C Yum, p'untañon lojon, come tsa'ix c pijtayet lojon. C p'at'aleletach lojon ti jujump'ejl q'uin. Coltañon lojon che' ti' yorajlel wocol. ³Mi' puts'elob jini asirijob che' ma' cha'len t'an, c Yum. Mi' pam pujquelob pejtel tejclumob che' ma' wa'tal. ⁴Che' bajche' jini sajc' mi' laj c'ux pac'ab'al, che' ja'el jini año' ba ti Jerusalén mi caj i chilbeñob i chub'an jini asirijob. Mi caj i bac' tijp'ejl majlel i ch'amob. ⁵Wen ñuc lac Yum am ba ti panchan. Mi caj i cha' toj'esan Jerusalén. Che' jini uts'at mi caj i melob. ⁶Tilem ti lac Yum i coltantel winic, yic'ot i ña't'ab'al, yic'ot uts'at ba i pensar. Wen chumul jini mu' ba i bac'ñan lac Yum. I wentajach i chub'an letsem ba i tojol.

⁷Ubin, c'am woliyob ti t'an jini suboñelob i cha'an Judá. Jini tsajni ba i pejcañob asirijob woliyob ti uq'uel, come ma'anic tsi' jac'Λ i cΛyob guerra. ⁸Jejmenix jini bij tac. Ma'anic majch mi' ñumel ya'i. Jini asirijob tsi' juch' teq'ueyob jini xuc'ul ba t'an. Ma'anic mi' p'isob ti' wenta yan tac ba tejclum. Chan mi' melob i ba ti' tojlel yaño' ba. ⁹C'ax ch'ijiyemob jax jini año' ba ti Israel. Tiquinix jini te'el Líbano. Jini Sarón tsa'ix sujti ti tiquin ba lum. Tsa'ix laj p'ajti i yopol te' ya' ti Basán yic'ot Carmelo.

¹⁰Woli' ya' lac Yum: Mux caj c tejchel ch'o'jyel cha'an mij q'uejlel ti ñuc. Mi caj c pas c p'ΛtΛlel. ¹¹Asirijob, lolom jach pejtel mu' ba la' ña'tan la' mel. Jini c'ajc tsa' ba la' tsuc'u mi caj i wΛΛc puletla. ¹²Pejtelel jini tejclum tac mi caj i sujtel che' bajche' pulo' tan. Mi caj i pulel che' bajche' ch'ix chocbil ba ochel ti c'ajc. ¹³Jatetla ñajt ba chumuletla ñich'tanla c t'an, yic'ot jini lac'Λl ba añob ti Israel. Yom mi la' wen can c p'ΛtΛlel, come mi caj cΛq'ueñetla wocol. ¹⁴Mi' toj sajtelob i pusic'al jini xmulilob ti Jerusalén. Tsiltsilñayob ti baq'uen jini tilel bixel ba i pusic'alob. Mi' ya'lob: “¿Majqui mi mejlel i cuch jini c'ajc yujil ba jisaya? ¿Majqui mi mejlel i ñusan jini c'ajc mach ba yujilic yajpel?” che'ob. ¹⁵Lac Yum tsi' jac'Λ: Jini mu' ba i mel chuqui uts'at, mu' ba i cha'len toj ba t'an, jini mach ba yujilic xujch', mach ba anic mi' ch'Λm majtañΛl tac cha'an chuqui tac mi' mel, jini mach ba yomic i yubin leco ba t'an, jini mach ba anic mi' coltan stsansa, jini mach ba anic mi' jac'ob i payol ti mulil. ¹⁶Jini mi caj i chumtal ti' pam xajlel ya' ba' xuc'ul. Ya' mi caj i taj i coltantel. Mi caj i yaq'uentel i bal i ñac' yic'ot i ya'al. Ma'anic chubΛ yom i cha'an, che'en.

¹⁷Che' jini mi caj a q'uel i t'ojol jax jini Rey. Mi caj a q'uel jini ñuc ba i lumal mu' ba caj i tilel ti chan. ¹⁸Mux caj a c'ajtesan jini bΛbaq'uen ba tsa'ix ba ñumi che' ba tsa' c'otiyob jini asirijob ba'an chan ba ts'ajc cha'an mi' ñejñañob, cha'an mi' ña'tañob mi wen cΛntΛbil, cha'an mi' q'uelob bajche' c'amel an a chub'Λan. ¹⁹Pero ma'anix mi caj a chan q'uel jini xjontolilob parte ba i t'an tsa' ba i bac'tesayet. Ma'anic tsa' ch'Λmbe isujm jini bes ba i t'añob. ²⁰Q'uele jini Sion, jini tejclum baqui mi lac ch'ujutesan Dios. Mi caj a q'uel Jerusalén che' ñach'Λl, che' xuc'ul lac chumlib, che' tijicña pañimil. Ma'anix mi caj i chan jejm. Mach yujilic oc'mal i yoyel.

²¹Come ya' mi caj i yajñel lac Yum la quic'ot. Mi caj i cha'len ñuc ba yumal. Lajal mi caj i joy mactañonla che' bajche' ñoja' ba' mach c'axicob laj contrajob. ²²Come lac Yum jiñach lac Juez, lac Rey, jiñach x'ac' mandar. I bajñel jach mi caj i coltañonla. ²³Pero ya' ti' tojlel laj contrajob tsa'ix i lojo i ba i ch'ajñal barco. Mach tsats c'achalix i te'el colem barco. Mach wen lich'bilix i pislel mu' ba i wejlan ic'. Jini cha'an mi caj i t'oxtal i chub'an. I winicob Dios mi caj i ch'amob. Jini mach ba weñobic i yoc ja'el mi caj i ch'amob. ²⁴Ti' tojlel jini israelob ma'anix mi juntiquilic mu' ba caj i yal: "C'amon", che'en. Come lac Yum mi caj i laj ñusabeñob i mul.

Dios tsi yal'ue wocol jini colem tejclum tac

34 Lac'tesan la' ba winicob ti pejtelel pañimil cha'an mi la' wubin c t'an. La' i ñich'tañob jini chumulo' ba ti pejtelel pañimil, yic'ot pejtelel i p'olbal ti jujump'ejl lum. ²Come lac Yum wolix i mich'len pejtelel mach ba anic mi' c'añob Dios yic'ot jini xguerrajob ti mojt ti mojt. Mi caj i laj jisañob. Mi caj i yac'ob ti tsansantel. ³Jini tsansabilo' ba mi caj i chojquelob loq'uel. Mi caj i letsel i tuwel c'alal ti chan ba wits. Mi' caj ti' ts'ajmel jubel i ch'ich'el ya' ti wits. ⁴Jini yujil tac ba ulmal ti panchan mi caj i sac jilel. Jini panchan mi caj i bajlel che' bajche' jun. Jini ec' tac mi caj i yajlel che' bajche' tiquinix ba i yopol te' mu' ba i p'ajtel ti lum yic'ot c'un ba i wut higuera.

⁵Che' ba tsa'ix c chajpa quespada ti panchan, mi caj c choc tilel guerra ti' contra Edom. ⁶Come ya' mi' caj i tojob i mul. Bombilix i yespada lac Yum ti' ch'ich'el yic'ot ti' lewil tiñame' yic'ot chivo tac. Ya' ti Edom mi caj i tsansabentel cabal i majtan lac Yum. ⁷Junlajal mi caj i jilelob i yalac' yic'ot i yumob, jini p'at'alo' ba yic'ot ch'itoñob to ba yic'ot xñoxob. Mi caj i laj ts'ajmel ti ch'ich'. Jini ts'ubejn mi caj i xac' i ba ti lew. ⁸Jiñach i q'uiñilel lac Yum che' mi' q'uextan jontolil. I yorajlelix mi' tojob i mul ti Edom cha'an tsi' contrajiyob Sion. ⁹Mi' caj ti jisantel Edom che' bajche' mi' pulel i yetsel taj. Mi' caj ti sujtel ti azufre jini ts'ubejn.

¹⁰Mach yajpic ti q'uiñil mi ti ac'alal. Ti pejtelel ora jomocña mi caj i letsel i butsil. Ma'anix majqui mi caj i chan ñumel ya'i. ¹¹Jini jach jojmay yic'ot ch'ix'uch mi caj i yajñel ya'i. Jini

xjoch' mut yic'ot x'ac'xi' mi caj i melob i c'u'. Lac Yum mi caj i yac' ti asiyel jini lum. Mi caj i junyajlel jisabben i c'ajñibal.

¹²Ma'anix ñuc ba winicob ya'i. Ma'anix majqui mi' chan wa'chocontel ti rey. Mux i sac jilelob jini yumallob.

¹³Mux i coled ch'ixol ba' jejmenix i yotot yumallob. Mux i coled ts'abab yic'ot stsajatun ba' jejmenix ts'ajc. Ya' mi' caj ti p'ojlel mate'el ts'i' yic'ot ja'al pech. ¹⁴Temel mi caj i cha'leñob xalmbal jini wax yic'ot mate'el ts'i'. Jini chivo tac mi caj i p'ayob i ba. Ya' mi' caj i yajñel xibajob mu' ba i cha'leñob bac'tesaya ti ac'lalel. Jiñach i yajñib ba' mi' c'ajob i yo.

¹⁵Ya' mi' caj i mel i c'u' jini xjoch' mut. Mi caj i cha'len tun, mi caj i tojpejl i yal. P'ulucña mi caj i cantan. Ya' mi' caj i tempañob i ba xiye'. Ti jujuncojt an i pi'ál. ¹⁶Q'uelela i jun lac Yum. Mi' caj i ts'actiyel i t'an. Ya' mi' caj i yajñel pejtél ili bate'el yic'ot i ña'al. Come che'ach tsi' ña'ta lac Yum. Mi' caj i wets' tilel pejtelel ili bate'el ti' yiq'uilel i yej. ¹⁷Tsa'ix i yal'ueyob i yajñib ti chajp ti chajp. Yic'ot i c'ab tsi' pasbeyob i lumal. Ya' mi' caj i yajñelob yic'ot i yal ti pejtelel ora.

I ñuclel Jerusalén ti wi'il ba ora

35 Ti jim ba ora jini tiquin ba lum mi caj i yubin i tijicñayel. Mi' caj ti nich ya' ba' jochol jini lum.

²Cabal mi' caj ti nich. Ya' mi' caj i tajtal tijicña ba. Mi' caj i cha'leñob c'ay. Mi' caj i cha' t'ojlawel jini tiquin ba lum che' bajche' Líbano yic'ot jini potrero tac am ba ti Carmelo yic'ot Sarón. Mi' caj i tsictiyel i ñuclel lac Yum, i yutslél lac Dios.

³Ñuq'uesaben i pusic'al jini ch'ijiyem ba. La' p'atác i c'ab yic'ot i pix jini c'uño' ba. ⁴Subeñob jini woliyo' ba ti baq'uen: La' ñuc'ac la' pusic'al. Mach mi la' ch'allen baq'uen, come la' wilan talix lac Dios. Tal i jisan la' contrajob. Mi' caj i tilel Dios cha'an mi' coltañetla, che'etla.

⁵Mi' caj i cha' c'otel i wut jini xpots'ob. Mi' caj i jajmel i chiquin jini xcojacob. ⁶Jini q'uichq'uichña ba i yoc mi' caj i tijp'el. Mi' caj ti c'ay jini x'uma'. Ya' ti tiquin ba lum mi' caj ti wajlel loq'uel ja'. Yolocña mi' caj ti ajñel. ⁷Ya' ba' ticaw ji', on mi' caj i tilel tsawan ja'. Ya' ba' ma'anic ja' mi' caj ti wajlel loq'uel. Mi' caj i sujtel ti jamil yic'ot amayol jini jochol ba lum ba' mi' yajñel bate'el.

⁸Ya'i mi caj i ñumel colem bij. Jini bij mi caj i yotsabentel i c'aba' Ch'ujul ba bij. Come ma'anic mi caj i xañob jini año' ba i mul. Lac Yum mi caj i cha'len xambal a wic'ot ti jini bij. Ma'anic mi caj i chan sajtetel jini mu' ba i cha'len xambal ya'i anquese ma'anic i ña'tabal. ⁹Ma'anic bajlum ya'i. Ma'anic jontol tac ba bate'el. Cojach winicob x'ixicob mambilo' ba i cha'an lac Yum mi caj i cha'leñob xambal ya'i. ¹⁰Wen tijicñayob i pusic'al mi caj i sujtelob jini mambilo' ba i cha'an lac Yum. Cha' talob ti jini bij cha'an mi' majlelob ti Sion. Ti pejtelel ora tijicña mi caj i yubiñob. Mi' cajelob ti c'ay. Mi caj i lajmel wocol yic'ot c'amajel.

Senaquerib tsi' cha'le guerra yic'ot Ezequías

(2 R. 18.13-37; 2 Cr. 32.1-19)

36 Che' ti chanlujump'ejl (14) jab che' woli ti yumantel Ezequías, tsa' tili jini rey Senaquerib loq'uem ba ti Siria cha'an mi cha'len guerra ti' contra Judá. Tsi' laj ch'amal jini p'atal tac ba tejclum ti Judá. ²Che' ya'an jini yumal Senaquerib ti Laquis, tsi' choco majlel suboñel yic'ot cabal soldadojob ti contra Ezequías ya' ti Jerusalén. Ya' tsa' wa'leyob ti' t'ejl jini estanque am ba ti chan ti' t'ejl jini bij mu' ba i ñumel ba' mi' saq'uesantel pisil.

³Tsa' tili i tajob Eliaquim (i yalobil Hilquías) jiñach yumal woli ba i coltan jini rey ti Judá yic'ot Sebna jini secretario, yic'ot Joa (i yalobil Asaf) jini secretario. ⁴Jini suboñel ch'oyol ba ti Asiria tsi' subeyob: Cucula, subenla Ezequías: "Jini ñuc ba rey ti Asiria mi' yal tontojet, come woli a lon ña'tan mux caj i coltañet yamba rey. ⁵¿Nuc ba ma' q'uel i t'an Faraón? ¿Mejl ba i yalq'ueñet a p'atallel ti guerra? ¿Majqui mi mejlel i coltañet cha'an ma' tilel a contrajiñon? Lon xuc'ul a pusic'al. ⁶Awilan ma' lon ña'tan mi caj i coltañet Egipto, pero lajal Egipto bajche' xujlem ba amay. Mi' jec'ben i c'ab jini mu' ba i xij't'iban majlel. Che'lach ja'el jini Faraón, i rey Egipto, ti' tojlel jini mu' ba i lon c'ajtiben i coltantel. ⁷Mi wola' wal: Joñon lojon mic ñop lojon c Yum Dios, che'et, ¿mach ba jinic tsa' ba ts'a'lenti cha'an Ezequías, che' ba tsi' jembe i pulantib am ba ti bujtal tac? Tsi' wersa subeyob jini año' ba ti Jerusalén yic'ot ti Judá cha'an ya jach mi la cha'len ch'ujutesaya ti jump'ejl jach ba pulantib. ⁸La' mele a ba yic'ot c yum am ba

ti Asiria. Mux caj i mel trato a wic'ot. Mi cAl ma'anix jaytiquil soldadojob a cha'an, mi cha'p'ejlic mil. Aniqui mi cAlq'ueñet ti a wenta cha'p'ejl mil caballo. Quilala mi muc'ach a taj winicob mu bA i c'achtañob. ⁹Mach mAjlic a cha'an ti' contra i winicob c yum come ma'anic mi caj i coltañet Egipto. ¹⁰Yom ma' ña'tan ja'el jiñach a Dios tsa' bA i subeyon tilel cha'an mic ch'Am ili lum. Tsi' subeyon: Cucu contrajin jini tejclum cha'an ma' jisan, che'en". Che' yom mi la' suben Ezequías, che'en jini suboñel.

¹¹Eliaquim yic'ot Sebna yic'ot Joa tsi' subeyob jini comandante tilem bA ti Asiria: A wocolic yom mi la' pejcañon lojon ti arameo, come cujil lojon t'an ti arameo. Mach ma' pejcañon lojon ti hebreo*, i t'an jini winicob año' bA ti' pam ts'ajc, come woli' ñich'tañob, che'ob. ¹²Pero jini comandante tsi' yAlA: Tsi' chocoyon tilel c yum cha'an mic subeñob ili t'an ja'el, mach cha'anic jach mic subeñetla yic'ot la' rey. Wersa mi' yubiñob jini winicob mu' bA caj i tem mAc'ob i ta' yic'otetla. Temel mi caj la' jap la' pich, che'en.

¹³Tsa' caji ti c'am bA t'an jini comandante. Tsi' yAlA ti hebreo: Ubinla chuqui woli' yAl jini wen ñuc bA rey ti Asiria: ¹⁴"Mach la' wAc' la' bA ti lotintel cha'an Ezequías. Come mach mejlic i coltañetla. ¹⁵Mach mi la' ñop la' Yum che' bajche' mi' subeñetla Ezequías. Mi' lon ñuq'uesAbēñetla la' pusic'al. Mi' yAl: Isujm, lac Yum mi caj i coltañetla. Ma'anic mi caj i yAlq'uetla ti' c'Ab jini rey ti Asiria, lon che'en. ¹⁶Mach yomic mi la' jac'ben i t'an Ezequías. Come jini rey ti Asiria woli' yAl: Ac'Ax la' bA tic wenta cha'an ñach'al mi la' wajñel quic'ot. Che' jini mi caj la' c'ux i wut la' ts'usubil. Mi caj la' mAc'ben i wut higerate' tsa' bA la' pAc'A. Mi caj la' jap jini ja' am bA ti la' pozo, ¹⁷jinto mic tilel c pAyetla majlel ti jump'ejl lum lajal bA bajche' la' lumal, ya' ba' yujil colel trigo yic'ot vino, ba' cabAl lac waj yic'ot ts'usubil. ¹⁸ChAc'A q'uele la' bA cha'an ma'anic mi' chAn lotiñetla Ezequías che' mi' subeñetla: Lac Yum mi caj i coltañetla, lon che'en. Añoob i diosob yan tac bA tejclum ja'el. ¿Tsa' ba mejli i coltañob loq'uel ti' p'AtAllel jini rey ti Asiria? ¹⁹¿Baqui an i dios Hamat yic'ot i dios Arpad? ¿Baqui an i dios jini Sefarvaim? ¿Tsa' ba mejli i coltan Samaria cha'an mi' loq'uel tic p'AtAllel lojon? ²⁰¿Am ba juntiquil dios tsa' bA mejli i coltan loq'uel i tejclum ti' p'AtAllel Asiria? A wila to

mach mejlic i coltan Jerusalén a Yum”. Che' tsi' yalá jini rey ti Asiria, che'en jini comandante.

²¹Ñach'al tsa' c'leyob, come che'ach tsi' yac'á mandar jini rey cha'an ma'anic mi' jac'beñob. ²²Che' jini tsa' majli Eliaquim (i yalobil Hilquías) jini am ba ti' wenta i yotot jini rey, temel yic'ot jini secretario i c'aba' Sebna, yic'ot Joa (i yalobil Asaf), jini am ba i ye'tel ti consejero. Tsi' jet' tsiliyob i bujc. Tsa' majli i subeñob jini rey Ezequías pejtel chuqui tsi' yalá jini comandante tilem ba ti Asiria.

Dios tsi' contraji Senaquerib

(2 R. 19.1-37; 2 Cr. 32.20-23)

37 Jini rey Ezequías tsi' laj ubi. Tsi' jet' tsili i bujc. Tsi' lapa coxtal che' bajche' i tilel jini ch'ijiyemo' ba i pusic'al. Tsa' majli ti' yotot lac Yum. ²Tsi' choco majlel jini año' ba ñuc ba i ye'tel ti' tojlel, jiñobach Eliaquim am ba ti' wenta i yotot rey, yic'ot jini secretario i c'aba' Sebna yic'ot jini ñoxobix ba motomajob. Tsi' chocoyob majlel ba'an jini x'alt'an Isaías (i yalobil Amoz) laj lapbilob i cha'an coxtal. ³Tsa' c'oti i yalob: Che'ach woli' yal jini rey Ezequías: “Wen wocol bajche' añoñ lojon wale. Wolic tic'lantel lojon. Wolic peq'uesantel lojon. Lajalon lojon bajche' x'ixic woli ba ti bajq'uel che' i yorajlelix mi' yilan pañimil i yalobil pero ma'anic i p'atálel. ⁴Tic'al mi tsa'ix i yubi lac Yum i t'an jini comandante tilem ba ti Asiria tsa' ba i p'ajbe i c'aba' lac Yum. Tic'al mi caj i yal'uen i toj i mul cha'an tsi' p'ajbe i c'aba'. Jini cha'an yom ma' pejcan lac Yum ti oración cha'an mi' p'untan i colojbal i winicob”.

⁵Che'ach tsi' subeyob jini x'alt'an Isaías, jini ñuc ba yumalob i cha'an jini rey Ezequías. ⁶Isaías tsi' subeyob: Yom mi la' suben la' yum: “Jini lac Yum tsi' yalá: Mach a bac'ñan i winicob jini rey ti Asiria cha'an i t'an tsa' ba i yaláyob tij contra che' ba tsi' p'ajayoñob. ⁷Joñon mi caj c techben i wocol. Mi caj i yubin t'an cha'an chuqui woli' yujtel ti' lumal. Che' jini mi caj i cha' sujtel ti' lumal ba' mi caj cac' ti tsansantel. Che' tsi' yalá lac Yum”. Che' yom mi la' suben Ezequías, che'en Isaías.

⁸⁻⁹Che' jini tsa' sujti ti Libna jini comandante, ya' ba' woli ti guerra i rey Asiria, pero loquemix jini rey ti Laquis cha'an tsi' yubi woli' tech guerra i rey Etiopía ya' ti' lumal. Jini

cha'an jini rey ti Asiria i c'aba' Senaquerib tsi' cha' choco majlel suboñelob ba'an Ezequías. Tsi' yalá: ¹⁰Che'ach yom mi la' suben Ezequías, jini rey ti Judá: “Mach ma' lon ñop a Dios come woli' lotiñet, come tsi' yalá: Mach mejlic i ch'am Jerusalén jini rey ti Asiria, che'en. ¹¹Ubibilix a cha'an bajche' tsi' jisa yan tac ba tejlum tac jini rey ti Asiria. ¿Mu' ba caj a bajñel colel ma' wal? ¹²An i diosob jini yan tac ba tejlum ja'el. ¿Tsa' ba mejli i coltañob loq'uel ti' p'atálel c ñojte'elob? Tsi' laj jisayob Gozán, Harán, Resef, yic'ot jini ch'oyolo' ba ti Edén chumulo' ba ti Telasar. ¹³¿Baqui añob jini reyob tsa' ba i cha'leyob yumal ti Hamat yic'ot ti Arpad, yic'ot ti Lair, yic'ot ti Sefarvaim, yic'ot ti Hena, yic'ot ti Ivá?” che'en Senaquerib. Che' tsi' yaláyob suboñelob.

¹⁴Ezequías tsi' ch'amá jini jun. Tsi' q'uele. Tsa' majli ti' Templo lac Yum. Tsi' tich'i jini jun ti' tojlel lac Yum. ¹⁵⁻¹⁷Tsa' caji i pejcan lac Yum ti oración: Jatet i Yumet Panchan yic'ot Pañimil, i Dioset Israel. Joyol a buchlib ti ángelob. Jatet jach i Dioset pejtelel yumalob ti pañimil. Jatet tsa' mele panchan yic'ot pañimil. Ubibeñon c t'an, c Yum. Ñich'tañon. Cañla a wut cha'an ma' q'uelon. Ubiben i t'an ili Senaquerib. Tsi' choco tilel cha'an mi' p'ajet, cuxulet ba Dios. ¹⁸Isujmach, c Yum, jini reyob loq'uemo' ba ti Asiria tsi' laj jisayob pejtelel tejlum tac. Tsi' laj chilbeyob i lum. ¹⁹Tsi' laj pulbeyob i diosob, come mach mero diosobic. Melbilob jach ti te' yic'ot ti xajlel. I ye'tel jach winicob. Jini cha'an tsa' jisantiyob. ²⁰Wale, c Yum, c Dioset ba lojon, coltañon lojon ti a p'atálel. La' loq'uicon lojon ti' p'atálel cha'an mi' ña'tañob pejtelel yumalob ti pañimil jatet jach cojach ba Dioset. Che' tsi' cha'le oración.

²¹Che' jini Isaías (i yalobil Amoz) tsi' choco majlel t'an ba'an Ezequías: Jiñach woli ba i yal lac Yum i Dios Israel: “Tsa'ix cubi a woración cha'an mij coltañet ti' tojlel Senaquerib, jini rey ti Asiria. ²²Ubin bajche' wolic jac'beñet. Mi caj c suben Senaquerib: Jini c cha'año' ba año' ba ti Sion woli' wajleñetob. Ts'a' mi' q'ueletob. Mi caj i yalq'uetob ti quisin. Jini año' ba ti Jerusalén mi caj i wajleñetob che' ma' tats' a ba. ²³¿Majqui wola' contrajin ti a'leya yic'ot ti p'ajoñel? ¿Majqui tsa' contraji che' ba tsa' lon chañ'esa a ba? C'am tsa' cha'le t'an. Tsa' ts'a'le jini Ch'ujul ba ti Israel. ²⁴Tsa' choco tilel ti p'ajoñel ñuc ba yumalob a cha'an. Tsa' p'ajayon.

Ñuc tsa' mele a ba tic tojlel. Tsa' lon ala: Yic'ot bajc'al carreta tac tsa'ix letsiyon lojon c'lalal ti' chañelal jini wits tac. Tsa'ix c'ajquiyon letsel ti' pam Líbano. Tsa'ix c seq'ue lojon jini chan tac ba ch'ujte', yic'ot jini taj wen fino ba. Tsa'ix c'lalal c'otiyon ti wen chan tac ba wits, ba' wen pim jini te'el tac, wen i t'ojol jax ba. ²⁵Ti cabal lum tsac mele tac pozo, tsac japbe i ya'lel. Tsa' ñumiyon ti xambal ti Egipto ba' tam jini ñoja', che'et.

²⁶Yomix ma' ña'tan, ili tac tsa' ba a mele tsac ña'ta c'lalal wajali. Joñon, Dioson, tsac lu' ac'a ti melol che' bajche' tsac wan ña'ta wajali. Tsa'ix ujti che' bajche' tsa calal tic pusic'al. Cha'an tic p'atlel tsa' mejli a jisan jini joy ts'ajquibil ba tejclum tac. Laj jembilix tsa' cale. ²⁷Tsa' c'uñ'ayob jini xchumtlob ti tejclum tac tsa' ba a jisa. Cabal tsi' cha'leyob baq'uen. Tsa' toj sajtuyob i pusic'al. Tsa' sujtuyob che' bajche' pimel, che' bajche' wen ch'ocayem ba jam, jini jam mu' ba i colel ti' jol otot. Lajalob bajche' i te'el ixim mu' ba i pul jini ticaw ic' tilem ba ti' pasibal q'uin.

²⁸Calñal c cha'an pejtél a melbal bajche' ma' ñusan q'uin yic'ot baqui ma' majlel. Q'uelel c cha'an bajche' ma' chañ'esan a ba tic tojlel. ²⁹Mich' ma' q'uelon. Ma' chañ'esan a ba tic tojlel. Jini cha'an mi caj c xot otsan c matc'ab ti a ñi'. Mi caj cotsabeñet i frenojelel a wej. Mi caj c wets'et majlel ti a bijlel ya' ba' tsa' tiliyet". Che' tsi' cha'le t'an lac Yum ti' contra Senaquerib.

³⁰Dios tsi' sube Ezequías: Jiñach mu' ba caj i yujtel ti a tojlel cha'an mi la' ña'tan ma'anic mi caj i majlel i cha'an Senaquerib. Ti ili jabil mi caj la' c'uxben i wut jini trigo yajlem jach ba ti lum tsa' coli. Che' ja'el ti jini tal to ba jab mi caj la' c'uxben i wut jini trigo to'ol jach ba tsa' coli. Pero ti' yuxp'ejelel jab mi caj la' cha'len pac' yic'ot c'ajbal. Mi caj la' pac' la' ts'usubil. Mi caj la' c'uxben i wut. ³¹⁻³²Jini i colojbal winicob mu' ba i clytlob ti Judá, mi caj i cha' ts'apob majlel i wi' yilal ya' ti' lumal. Mi caj i loq'uelob lamital ti Jerusalén. Mi caj i pam pujquelob ti' lumal cha'an mi' cha' p'ojlelob. Cha'an ti wen ñuc ba j c'uxbiya mi caj cujtesan iliyi. ³³Ma'anic mi caj i yochel ti Jerusalén jini rey ch'oyol ba ti Asiria. Ma'anic mi caj i wis choc ochel i te'el i jalajb. Mach talic yic'ot i mactijib cha'an mi' contrajin. Mach muq'uc i ñacchocon tec'oñib cha'an mi' letsel ochel. ³⁴Ya' ba' tsa' loq'ui tilel, ya' mi caj i cha' sujtél majlel.

Ma'anic mi' caj ti ochel ti ili tejclum, che'en lac Yum. ³⁵Joñon mi caj c'ac' c ba cha'an ili tejclum. Mi caj j coltan cha'an c ñuclel, yic'ot cha'an i c'uxbintel c winic David. Che'ach tsi' cha'le t'an lac Yum.

³⁶Ti jim ba ora tsa' loq'ui tilel i yángel lac Yum. Tsi' jisa jini asiriyajob ya' ba' jijlemob. Tsi' jisa jo'tiquil i lujunc'al mil (185,000) winicob. Che' ba tsa' sac'a pañimil tsa' ch'ojoyiyob jini cuxulob to ba. Tsi' q'ueleyob laj chameñobix i pi'Allob.

³⁷Jini cha'an tsa' sujti majlel jini rey Senaquerib. Tsa' c'oti ti Nínive, ya' ba' chumul. ³⁸Ti jump'ejl q'uin che' ba woli' ch'ujutesan Nisroc i dios ya' ti' yotlel, tsa' c'otiyob cha'tiquil i yalobilob Senaquerib i c'aba' Adramelec yic'ot Sarezzer. Tsi' tsansayob ti espada. Tsa' puts'iyob majlel ti jini lum Ararat. Tsa' caji ti yumal Esarhadón ti' q'uexol i tat.

I c'amajel yic'ot i lajmesantel Ezequías

(2 R. 20.1-11; 2 Cr. 32.24-26)

38 Che' woli to i cha'llen yumal Ezequías, tsa' caji' wen c'am'an. Jini x'alt'an Isaías (i yalobil Amoz), i winic Dios, tsa' tili i q'uel jini rey Ezequías. Tsi' yalal: Ubiben i t'an lac Yum Dios: “Yomix ma' wan suben a pi'Allob bajche' yom mi' yajñel, come mux caj a chamel. Mach lajmic a chamel”, che'en. ²⁻³Che' jini Ezequías tsi' sutq'ui i wut ti ñac' pajc'. Tsa' caji i pejcan lac Yum ti oración: C Yum, mij c'ajtibañet ti wocol t'an cha'an ma' coltañon. Ña'tan bajche' tsac cha'le xambal ti a tojlel come ti xuc'ul yic'ot ti isujm tsac mele chuqui toj. Ma'anic tsac mele chuqui jontol ti a wut, che'en. Che' jini tsa' wen caji ti uq'uel Ezequías. Tsi' wen mele i pusic'al.

⁴Tsa' tili i t'an lac Yum Dios. Tsi' pejca jini x'alt'an Isaías. ⁵Tsi' sube: Cucu suben Ezequías: “Che'ach woli' yal lac Yum, i Dios David, jini a ñojte'el: Tsa'ix cubi a woración. Tsa'ix j q'uele ja'el i ya'llel a wut. Mi caj c cha' aq'ueñet yamba jo'lujump'ejl (15) jab a jabilel. ⁶Joñon mi caj j coltañet loq'uel ti' c'Ab jini rey ba ti Asiria. Mi caj j coltan ja'el ili tejclum”, che'en. (²¹Jini cha'an Isaías tsi' yac'la ti melol jumpejts juch'bil ba higo. Tsi' yac'la ba' pasem i tsoy. Che' jini tsa' lajmi jini rey. ²²Tsi' yalal Ezequías: ¿Bajche' mi caj c ña'tan mi muq'uix caj c cha' majlel ya' ti' Templo lac Yum? che'en.)^a ⁷Isaías tsi' jac'la: Lac Yum mi caj i pasbeñet jini ñuc ba i

a **Isaias 38:22** Jini cha'pejl versículo 21 yic'ot 22 tsa' loq'ui ti' jilibal ili capítulo cha'an mi' yochel ilayi che' bajche' ti yan tac ba versión.

ye'tel cha'an ma' wen ña'tan isujm mi caj i ts'actesan jini tsa' ba i subeyet. ⁸Yom ma' wen q'uel jini axñal ya' ba' jaxal ti' tec'oñib Acaz. Mi caj cac' ti sujtel jini q'uin ti' bijlel. Mux caj a p'is lujunquejp ya' ti p'isoñib, che'en. Che'ach tsa' ujti. Jini i yaxñalel q'uin tsa' puts'i lujunquejp ti p'isoñib. Jal to tsa' bajli jini q'uin.

⁹Jiñach salmo tsa' ba i ts'ijba Ezequías yumal ba ti Judá, che' ba tsa' cha' lajmi ti c'amajel: ¹⁰Tsa cala: Maxto ñoxonic wolic chamel. Xinq'uiñil to yubil. Wersa mic majlel ti' yajñib xchamelob che' ch'itoñon to. ¹¹Tsa cala: Ma'anix mi caj c chlan q'uel lac Yum wa' ti pañimil ba' cuxulonla. Ma'anix mi caj c chlan q'uel jini chumulo' ba ti pañimil. ¹²Woli' jochtiyel c bac'tal. Woli' quexxiyel che' bajche' i lejchempat jini xcanta tiñame'ob. Wolix i jilel j cuxtalel che' bajche' pisil woli ba ti jajlel mu' ba i bac' sejt'el ya' ti jalo' pisil che' quepel to. C'lalal ti sac'an c'lalal ti ic'an ma' wac'on ti jilel. ¹³C'lalal mi' sac'an we'ecñayon ti oñel wolij c'ajtibeñet j coltantel. Ma' wac' ti xujlel pejtél c baquel che' bajche' bajlum. C'lalal ti sac'an c'lalal ti ic'an ma' wac'on ti jilel.

¹⁴Lajal muc'on ti ajcan che' bajche' x'ajlum. Mic cha'len uq'uel che' bajche' x'ujcuts. Woli ti mujts'el c wut cha'an lujb che' mic chlan q'uel jini panchan. C Yum, wen wocol añon. Ch'amayonix ti a wenta. ¹⁵Pero ¿chuqui to yom alol? Jiñach Dios tsa' ba i chocbeyon tilel ili wocol. Ma'anix mi' yochel c wayel cha'an ch'ijiyem c pusic'al. ¹⁶C Yum, ma' jultesabeñob i pusic'al winicob cha'an mi' tajob i cuxtalel. Cha'an ti' caj c wocol la' p'ltac c pusic'al. Lajmesañon, c Yum, cha'an mic cha' cuxxiyel.

¹⁷C Yum, che' c'amon wen ch'ijiyemon, pero tsa' waq'ueyon wocol cha'an mic taj i ñach'talel c pusic'al. Ti' yutslé a pusic'al cha' techeyon ame chamicon. Tsa' laj ñusabeñon c mul. ¹⁸Ma'anic mi mejlel i ch'ujutesañet jini chameño' ba. Ma'anic mi mejlel i ñuquesañob a c'aba'. Mach tijicñayob i pusic'al cha'an a wutslé. Jini mu' ba i jubel majlel i tojob i mul ma'anix i pijtaya. Mach muqu'uc i yubiñob i xuc'tilel a pusic'al. ¹⁹Pero jini cuxulo' ba mi mejlel i ch'ujutesañet che' bajche' wolic mel ti ili ora. Jini tatlob mi' subeñob i yalobilob cabal i xuc'tilel a pusic'al. ²⁰Wa'an lac Yum, awilan woli' coltañon. La' lac ñijcan arpa. La' lac cha'len c'ay. Jujump'ejl q'uin che' cuxulon to la la' laj c'ayiben i ñuclel lac Yum ila ti' Templo, che'en Ezequías.^b

b Isaias 38:20 Jini versículo 21 yic'ot 22 tsa' loq'ui ilayi cha'an mi' yochel ti' jilibal versículo 6.

Tilemo' bΛ ti Babilonia tsa' c'oti i jula'tañob Ezequías

(2 R. 20.12-19; 2 Cr. 32.27-31)

39 Ti jim bΛ ora Merodac Baladán, jini rey ti Babilonia, tsi' yubi lajmenix ti' c'amΛjel Ezequías. Tsi' choco majlel i winicob cha'an mi' yΛq'ueñob i majtan. ²Che' bΛ tsa' c'otiyob, wen tijicña tsa' caji' yubin Ezequías. Tsa' caji' laj pΛsbeñob i chubΛ'an, pejtℓ jini oro yic'ot plata yic'ot xojocña bΛ ts'ac yic'ot aceite wen fino bΛ yic'ot i yotlel jini e'tijibal cha'an guerra yic'ot pejtelel chuqui tac lotol ti jini otot. Ma'anic chuqui lotol ti' yotot yic'ot ti' yumΛntel mach bΛ anic tsi' pΛsΛ. ³Che' jini tsa' cha' tili jini x'alt'an Isaías cha'an mi' jula'tan Ezequías. Tsi' c'ajtibe: ¿Chuqui tsi' yΛΛyob jini winicob? ¿Baqui ch'oyolob? che'en. Ezequías tsi' jac'Λ: Wen ñajt tsa' tiliyob. Ch'oyolob ti Babilonia, che'en. ⁴Isaías tsi' cha' sube: ¿Chuqui tsi' q'ueleyob ila ti a wotot? che'en. Ezequías tsi' jac'Λ: Tsi' laj q'ueleyob chuqui tac an. Ti pejtelel jini lotol tac bΛ ma'anic mi junchajpic mach bΛ anic tsac pΛsbeyob, che'en.

⁵⁻⁶Jini cha'an Isaías tsi' sube: Ñich'tan i t'an lac Yum, i Yum Panchan yic'ot Pañimil: "P'isi ti a wenta: tal jump'ejl q'uin che' mi caj i laj cujchel majlel pejtelel ili wΛ' bΛ an ti a wotot, yic'ot pejtℓ chuqui tac tsi' lotoyob a ñojte'elob wajali c'ΛΛΛ ti ili ora. Mi caj i laj ch'Λjmel majlel ti Babilonia. Ma'anic chuqui mi caj i wis cΛyΛΛ. ⁷A walobilob ja'el mu' bΛ caj i yilañob pañimil, mi caj i pΛjylob majlel. Mi caj i sujtelob ti x'e'telob i cha'an jini rey ti Babilonia". Che' tsi' yΛΛ lac Yum, che'en Isaías. ⁸Ezequías tsi' jac'be: Uts'at pejtℓ i t'an lac Yum che' bajche' wola' wΛ. Mach talic wocol che' cuxulon to. Ñach'Λ to pañimil, xuc'ul to c yumΛntel che' cuxulon, che'en.

I ñuclℓ lac Yum mu' bΛ i ñuq'uesΛbeñonla lac pusic'al

40 Dios tsi' sube jini x'alt'añob i cha'an: Ñuq'uesΛbeñob i pusic'al, ñuq'uesΛbeñob i pusic'al c cha'año' bΛ. ²Pejcañob ti uts bΛ t'an jini año' bΛ ti Jerusalén. Subeñob cha'an tsa'ix ñumi i yorajlel i ch'ijiyemlel i pusic'al. ÑusΛbilix i mul. Cha' ñumelix mi caj cΛq'ueñob i yutslel c t'an cha'an tsa'ix i ñusayob wocol cha'an i mul, che'en Dios.

³An majqui woli' yΛ ti c'am bΛ t'an: ChajrpΛbenla i bijlel lac Yum ya' ti colem bΛ i tiquiñal pañimil. PΛtbenla majlel ñuc bΛ bij ya' ti tiquin lum cha'an tal lac Dios. ⁴Yom mi' bujt'el pejtℓ joctΛ, yom mi' pamuntel jini lomtΛ cha'an

pamal mi' cɔytɔl. La' toj'esɔntic jini bij ya' bɔ xoyolmetel jax. La' mejlic bij ba' bulul bexel, che'en. ⁵Mi caj i tsictiyel i ñuclel lac Yum. Pejtel año' bɔ ti pañimil mi caj i tem q'uelob, come che'ɔch tsi' yɔɔ lac Yum. ⁶Ubiben i t'an jini winic mu' bɔ i yal: "Subu", che'en. "¿Chuqui yom mic sub?" cho'on. Subu ñumel ili t'an: "Lajalonla bajche' pimmel mu' bɔ i chɔmel. Pejtelel lac ñuclel lajalɔch bajche' i nich pimmel. ⁷Jini jam mi' tiquin. Mi' yajlel i nich pimmel che' mi' wujtan lac Yum ti' yiq'uilel i yej. Lajalonla bajche' jini pimmel. ⁸Mi' tiquin pimmel yic'ot i nich. Mi' yajlel. Pero i t'an lac Dios mi' yajñel ti pejtelel ora", che'en. ⁹Jatet mu' bɔ a tsictesan wen t'an yom ma' letsel ya' ti chan bɔ wits ti Jerusalén. C'am yom ma' puc majlel jini wen t'an. Mach ma' cha'len bɔq'uen. Subeñob winicob ti Judá: "¿La' q'uelela Dios!" che'etla. ¹⁰Come tal lac Yum Dios yic'ot cabɔ i p'ɔtɔlel cha'an mi' cha'len yumɔl. Mi caj i pɔy tilel i cha'año' bɔ tsa' bɔ i maña. Jiñach i chobejtɔbal cha'an i bajñel e'tel. ¹¹Mi caj i cɔntan i cha'año' bɔ che' bajche' xcɔnta tiñame'. Mi caj i tempan tilel jini alɔ to bɔ. Mi caj i mec' majlel ti' tajn. Wen tsajil mi caj i pɔy majlel jini tiñame' cɔntɔbilob to bɔ i yal.

I p'ɔtɔlel yic'ot i ña'tɔbal Dios

¹²¿Majqui tsi' p'isi i tamlel colem ñajb ti' c'ɔb? ¿Majqui tsi' yɔq'ue i ti' panchan ya' ba' jaxɔl? ¿Majqui tsi' tempa lum ba' yom mi' yajñel? ¿Majqui tsi' p'isi i yalel lum yic'ot wits che' bajche' ti balanza? ¹³¿Majqui tsi' cɔntesa i Ch'ujlel lac Yum? ¿Majqui tsi' yɔq'ue i ña'bɔbal? ¹⁴¿Tsa' ba i c'ajtibe yambɔ bajche' yom melol i ye'tel? ¿Majqui tsi' pɔsbe bajche' yom mi' melonla? ¿Majqui tsi' toj'esa ti' bijlel? ¹⁵Come lac Yum mi' q'uel pejt看 winicob ti' petol pañimil che' bajche' junchɔjc' ja' mu' bɔ i yajlel ti yopom. Lajalob bajche' ts'ita' ts'ubejn ti balanza. Mi' ch'uy letsel jini lum joyol bɔ ti ja' che' bajche' ts'ubejn. ¹⁶Mach jastɔyic pejt看 jini te' am bɔ ti Líbano cha'an mi lac lɔts ti c'ajc ya' ti' pulɔntib. Mach jastɔyic pejtelel alɔc'ɔl cha'an pulbil bɔ i majtan Dios. ¹⁷Anquese motocñayob winicob ¿chuqui i ye'tel ti' tojlel lac Yum? Ma'anic i c'ɔjñibal. Ma'anic i p'ɔtɔlel. Ma'anic chuqui mi mejlel i melbeñob.

¹⁸Ma'anic majch lajal bajche' Dios. ¿Mejl ba lac mel i yejtal tac? ¹⁹Mach mejlic lac lajin Dios yie'ot dioste' i melbal ba winic, tep'bil ba ti oro, ch'Albil ba ti SASAC taq'uin. ²⁰Jini winic mach ba anic i taq'uin cha'an mi' man jump'ejl dios melbil ba ti oro mi' saclan te' mach ba yujilic joch'. Che' jini mi' ch'amben majlel xjuc'te' mu' ba i melben i dios mach ba yujilic i ñijcan i ba.

²¹¿Mach ba anic a pusic'al? ¿Chucoch ma' mel lolom tac ba? ¿Mach ba ubibilic a cha'an i t'an Dios? ¿Mach ba subebiletic? ¿Mach ba wen tsiquilic i sujmllel Dios c'Alal ti' cajibal pañimil? ²²Jiñach Dios jini buchul ba ya' ti panchan ti' chañelal pañimil. Biq'uit mi' q'uel jini chumulo' ba ti pañimil bajche' xc'ajba saj'. Mi' lich' panchan che' bajche' pisil ba otot ba' mi' chumtal. ²³Mi' chilbeñob i ye'tel jini p'Atalo' ba yie'ot yumalob ti pañimil cha'an ma'anix mi' laj q'uelob ti ñuc. Ma'añobix i c'AJñibal. ²⁴Jumuc' jach an i ye'tel. Mi' bac' chilbentelob. Lajalob bajche' pimel mu' ba lac pac'. Che' cajel jax to woli' chuc lum jini pimel, Dios mi' tiquesan ti' yiq'uilel i yej. Ti ora jach mi' tiquin. Che' mi' tilel sutujt ic' mi' wejlan majlel che' bajche' tiquin ba i te'el ixim.

²⁵¿Chucoch ma' lajiñon bajche' te'? ¿Am ba yamba lajal ba bajche' joñon? che'en jini Ch'ujul Ba. ²⁶Letsan a wut cha'an ma' wen q'uel chuqui an. ¿Majqui i melbal jini ec' tac? Dios mi' yac'ob ti ajñel ti jujump'ejl. Mi' pejcañob ti' c'aba'. Ma'anic mi' wis cAy i ba mi' jump'ejlic ec', come i Yum mi' pAyob majlel ti cabal ba i p'Atalel yie'ot i ñuclel. Mi' laj cantan ec'. ²⁷Israelob, i p'olbaetla Jacob, ¿chucoch mi' la' lon al ma'anic woli' q'uel a wocol jini lac Yum, cha'an mach tojic lac Yum? ²⁸¿Maxto ba anic tsa' la' ña'ta? Jiñach lac Yum Dios tsa' ba i mele pejtal pañimil. ¿Mach ba anic ubibil la' cha'an? Ma'anic mi' c'uñ'an. Mach yujilic lujban. Mach lu' cambilic lac cha'an i ña'tabal. ²⁹Mi' cha' p'Atesan jini c'uño' ba. Mi' cha' aq'ueñob i wersa jini mach ba p'Atalobix. ³⁰Jini ch'itoñob mi' lujbañob. Jini ch'iton winicob mi' c'uñ'añob. Mi' jilel i wersa. ³¹Pero jini mu' ba i chan pijtañob lac Yum cha'an mi' coltantelob mi' caj i cha' tajob i p'Atalel. Mi' caj i letselob che' bajche' xiye' yujil ba wejlel. Ma'anic mi' caj i lujb'añob che' mi' cha'leñob ajñel. Ma'anic mi' caj ti c'uñ'an pañimil che' mi' cha'leñob xAmbal.

I Yaj Coltaya Israel

41 Lac Yum tsi' y^ΛΛ: Ñach'i'la. Ñich't^Λabeñon c t'an chumulet b^Λ la ti' ti'il ja' mach b^Λ anic mi la' c^Λn Dios. Yom mi la' bej tilel ba' añon cha'an mi la' pejcañon. La' lac tem mel lac b^Λ. ²¿Majqui tsi' ñijca tilel Ciro, jini ñuc b^Λ yum^Λ ya' ti' pasibal q'uin mu' b^Λ i ma^Λjlel i cha'an baqui jach mi' majlel? Joñon tsa c^Λq'ue i ye'tel ti' tojlel pejt^Λel tejclum cha'an mi' yumañob reyob. Ciro mi' puts'tesan soldadojob. Mi' tsansañoob ti espada. Mi' julob ti' te'el jal^Λj^b. ³I c'aba' Ciro jini ñuc b^Λ i ye'tel. Mi' yajñesan i contrajob ti bij tac ba' maxto ñumenic. Uts'at mi' q'uel bij che' bajche' jini wen cambil b^Λ i cha'an. ⁴¿Majqui i ye'tel jini? Que'telach. Joñon tsac cha'le yum^Λ ti' tojlel tejclumob c'^Λl^Λl^Λ ti' cajibal pañimil. Joñoñach jini ñaxan b^Λ yic'ot wi'ilix b^Λ. Joñon Dioson, che'en.

⁵Jini año' b^Λ ti' ti'il colem ja' tsi' q'ueleyob jini bab^Λq'uen b^Λ. Tsi' wen bac'ñayob jini wocol woli b^Λ i tilel ti' tojlelob. Jini ñajt b^Λ ch'oyolob tsa' toj sajtiyob i pusic'al. ⁶Ti jujuntiquil tsa' caji i coltan i pi'^Λlob. Tsa' caji i subeñoob: “Ch'ejl'esan a b^Λ. ⁷Mele ti uts'at lac dios”, che'en. Jini yujil b^Λ i juc'ol te' mi' ñuq'ues^Λaben i pusic'al jini mu' b^Λ i cha'len e'tel ti plata yic'ot oro. Jini mu' b^Λ i pac' oro ya' ti' yajñib mi' y^Λ: “Uts'atix mi' wen chuc che' an chuqui mi lac pac'”, che'en. Mi' buchchocon ba' tsats mi' c^Λy^Λt^Λl ame yajlic. ⁸Ubin, Israel, c winiquet. Ubin, Jacob. Tsac yajcayet ti oñiyi. I p'olbalet Abraham, jini wen c^Λñ^Λ b^Λ c cha'an. ⁹Wen ñajt tsac p^Λy^Λy^Λet tilel. Tsac loc'sayet ti ñajt b^Λ pañimil. Tsac subeyet: “C winiquet, c yajcabalet. Ma'anix wolic wis c^Λy^Λet”, cho'on. ¹⁰Mach a cha'len b^Λq'uen, come añon quic'otet. Mach yomic ma' lij a b^Λ come a Dioson. Mi caj c wen p'^Λtesañet. Mi caj j coltañet. Mi caj j c^Λntañet ti p'^Λt^Λl b^Λ j c'^Λb jini ñoj b^Λ.

¹¹Awilan pejt^Λel mu' b^Λ i ts'a'leñet mi caj i yubiñob quisin. Mi caj i toj sajtelob i pusic'al. Jini mu' b^Λ i contrajiñet mi caj i jilelob. Ma'anix mi caj a ch^Λn p'^Λisob ti a wenta. ¹²Mi caj a lon sajcan jini mu' b^Λ i ts'a'leñet, pero mach a tajayic. Ma'anix ch^Λn tsiquilob. Ma'anix la' contrajob. Tsa'ix lajmi guerra. ¹³Come joñon a Yumon, a Dioson. Mi caj c chuquet ti ñoj b^Λ a c'^Λb. Mach a cha'len b^Λq'uen, come mi caj j coltañet.

¹⁴Mach ma' wis cha'len baq'uen Jacob anquese lajal a c'unlel che' bajche' chachac lucum. Come joñon mi caj j coltañet. Joñon jini wen Ch'ujul Ba ti Israel, la' Yumon. Tsac mañayet.
¹⁵Lajalet bajche' tsucul ba top'i' lum mach ba anic i yej. Mi caj c cha' melet che' bajche' tsiji' ba e'tijibal jay ba i yej. Mi caj a jem majlel wits. Mi caj i yajlelob a contrajob anquese p'atlab.
¹⁶Ñajt mi caj a chocob majlel. Jini ic' mi caj i cuchob majlel che' bajche' i yopol te'. Jini sutujt ic' mi caj i pam pucob. Pero tijicñayet ti a Yum. Mi caj i ñuc'an a pusic'al cha'an jini Ch'ujul Ba i cha'an Israel. ¹⁷Che' ma'anix i ya'al jini p'umpuño' ba mach ba añobic i chub'an, mi caj i saclañob ñumel, pero mach i tajayobic. Che' woliyob ti wocol cha'an tiquiñob i ti', joñon mi caj c jac'beñob che' mi' c'ajtibeñoñob. Mi caj c p'untañob. Joñon i Dioson israelob. Ma'anic mi caj j clayob.
¹⁸Ya' ti pam wits mi caj cac' ti wajlel loq'uel ja'. Ya' ti joctal ba' tiquin lum mi caj cac' ti loq'uel cuxul ba ja'. Ya' ba' tiquin pañimil mi' caj ti lamtal ja'. ¹⁹Mi caj cac' ti coel jini ch'ujte' yic'ot jini acacia yic'ot jini olivote' ya' ti tiquiñal pañimil. Temel mi caj i coel yic'ot jini ciprés yic'ot jini taj. ²⁰Che' jini mi' caj ti caljñel c melbal. Mi caj i q'uelob winicob. Mi caj i ña'tañob tsac mele joñon. La' Yumon Ch'ujulon Ba ti Israel.

Dios mi' wajlen jini dios tac

²¹La'la mele la' ba ba' añon. Subeñon chuqui i c'ajñibal jini dioste' tac la' cha'an, che'en lac Yum Dios, i Rey Israel.
²²Payala tilel la' dioste tac. La' i sub chuqui mi' caj ti ujtél, yic'ot chuqui tsa' ujti wajali, cha'an mi la' ñop. ²³La' i wan tsictesan chuqui mi' caj ti ujtél, cha'an mi la' wen ña'tan mi diosach. Mi an chuqui yujil i melol, la' i mel mi che' jach wistal mi uts'at o mi jontol, cha'an mi' toj sajtel la' pusic'al.
²⁴Pero ma'anic i c'ajñibal. Ma'anic chuqui mi' wis mel. To'ol lolom jach. Tonto jax jini mu' ba i ñop. ²⁵Ya' ti tojel norte yic'ot ya' ba' mi' pasel q'uin tsac paya tilel Ciro yic'ot i soldadojob. Mi caj i pejcañon tij c'aba'. Mi caj i contrajin jini colem tejlum tac. Mi caj i t'uchtañob. Añob ti' p'atlel che' bajche' lum ti' c'ab xmel uc'um. ²⁶¿Majqui tsi' wan tsictesa jini mu' ba caj ti ujtél? ¿Majqui tsi' wan ala cha'an mi la' na'tan isujm i t'an ba' ora mi' ts'actiyel? Ma'anic majqui tsi' wan tsictesa. Ma'anic majch tsi' wan ala. Mach ubibilic i cha'an

winicob. ²⁷Pero joñon tsac wan subeyob jini año' ba ti Sion. Tsa caq'ueyob jini wen t'an ya' ti Jerusalén. ²⁸Che' ba tsac laj q'uele pañimil, ma'anic tsac taja mi juntiquilic tsa' ba i wan ña'ta. Ma'anic dioste' yujil ba cantesa. ²⁹Junlajalob. Ma'anic i c'ajñibal. To'ol lolom jach. Ma'anic chuqui mi' wis melob. Ñumen an i c'ajñibal jini ic'. Mi' lon melbeñob i yejtal tac jini diosob.

I Winic Dios

42 Wa'an c Winic mu' ba caj j coltan. Jiñlach yajcabil ba c cha'an. Mi' wen aq'ueñon i tijicñayel c pusic'al. Tsa'ix caq'ue quEspíritu. Jini mi caj i sub chuqui toj ti' tojlel colem tejclum tac mach ba anic mi' cañoñob. ²Uts'at i pusic'al. Mach yujilic leto. Mach c'amic mi' cha'len t'an ti calle. ³Ma'anic mi' c'as winic che' p'ump'unix bajche' jam tsa' ba t'uchtanti. Ma'anic mi' yap i nich c'ajc tsa'ix ba i tsuc'u ti lac pusic'al. Mi caj i ñuq'uesaben i pusic'al jini c'un ba. Mi caj i yac' ti mejlel ti toj. ⁴Ma'anic mi' caj ti lujb'an. Anquese jal to mi' mel winicob pero mi caj i melob ti isujm. Toj mi caj i yujtel meloñel ti pañimil. Jini año' ba ti' t'ejl colem ñajb woli' pijtañob i mandar.

⁵Joñon a Yumon jini cojach ba Dios. Tsac mele panchan. Tsac lich'choco. Tsac mele jini pañimil yic'ot pejtel i bal. Mi caq'uen i c'uxtalal jini año' ba ti pañimil. ⁶A Yumon. Tsac payayet cha'an ma' wajñel ti toj. Tsac yajcayet. Mi caj j cantañet. Mi caj caq'uet ti ajñel ti' tojlel winicob x'ixicob cha'an mi' ts'actiyel jini xuc'ul* ba t'an mu' ba caq'ueñob. I wentajet c'ajc cha'an ma' pasbeñob c bijlel. ⁷Mi caj a camben i wut jini xpots'ob. Mi caj a loc'san jini ñup'ulo' ba ti ñujp'ibal ba' chuculob ti ic'yoch'an ba pañimil. ⁸Yumalon. Jiñlach j c'aba'. Ma'anic mi caq'uen c ñuclel yamba. Ma'anic mi caj caq'uen dioste' i pejcantel ti ñuc. ⁹Na'tan, tsa'ix ts'actiyi c t'an che' bajche' tsac wan subu. Wolix c wan sub jini mu' to ba caj i yujtel. Che' maxto anic tsiquil mi caj c sub, che'en lac Yum.

Mi' subentel i ñuclel lac Yum

¹⁰C'ayinla lac Yum ti tsiji' ba c'ay. La' ñuq'uesantic i c'aba' c'alal ti ñajt ba pañimil. Ñuq'uesabenla i c'aba' lac Yum pejtel añet ba la ti colem ñajb, yic'ot ti' ti'il jini ñajb. ¹¹Cha'lenla c'ay

winicob chumulet ba la ti' tiquiñal pañimil, jini xchumtllob ti Cedar, yic'ot xchumtllob ti Sela, yic'ot añet ba la ti chan ba wits. ¹²Tsictesanla i ñuclel lac Yum añet ba la ba' mi' bajlel q'uin. ¹³Lac Yum mi' loq'uel ti guerra che' bajche' p'atla ba soldado. Mi' bax'an ti' ye'tel. C'am mi' cha'len oñel cha'an mi' chajpañob i ba i pi'lob. Mi' majlel i cha'an ti' tojlel i contrajob.

¹⁴Lac Yum woli' yal: Anix ora ñach'alon. Ma'anic chuqui tsa cala. Tsac tiq'ui c ba. Pero wale mi caj c cha'len c'am ba oñel che' bajche' x'ixic woli ba ti bajq'uel. Jesuñayon, tip'tip'ña c pusic'al cha'an jisaya. ¹⁵Mi caj c jisan wits yic'ot bujtal tac. Mi caj c laj tiquesan pejtél pímél. Mi' caj ti sajp'el ja'. Mi caj c tiquesan colem ja' tac. ¹⁶Mi caj c pay majlel jini xpots'ob ya' ti bij ba' mach ñumeñobic, ba' mach cambilic bij i cha'añob. Mi caj c saq'uesan jini ic'yoch'an ba pañimil ya' ba' mi' cha'leñob xambal. Mi caj c melbeñob bij ba' bululbexel. Mi caj c sutq'uin jini bujtal tac ti joctal. Pejtelel iliyi mi caj c mel ti' tojlel. Ma'anic mi caj c wis clay c mel che' maxto joloñic. ¹⁷Pero mi caj i yubiñob quisin jini mu' ba i ch'ujutesañob dios tac, mu' ba i lon subeñob: “C dioset lojon”, lon che'ob.

Ma'anic mi' jac'ob i tic'ol jini israelob

¹⁸Ñich'tanla israelob mach ba anic mi la' wubin i t'an Dios. Q'uelela jatetla mach ba q'uelelic la' cha'an. ¹⁹¿Majqui xpots' che' bajche' jatetla tsa' ba c yajca? ¿Majqui xcojcob? ¿Mach ba jinic israelob, suboñelob chocbilo' ba majlel c cha'an? Xpots' jini x'etel i cha'an lac Yum tsa' ba i yac'la i ba tic wenta. ²⁰Come an cabal chuqui mi la' q'uel, pero ma'anic mi' c'otel la' wut. Tocol la' chiquin, pero mach la' womic la' wubin c t'an, che'en. ²¹⁻²²Lac Yum tsi' ñuq'uesa i mandar cha'an mi' q'uejlel ti ñuc, come tojach ajñel. Tijicña mi' yubin lac Yum che' jini. Pero mach che'ic jini israelob. Añob ti' p'atlael yamba yumlob mu' ba i tic'lañob. Ti pejtelelob tsa' puts'iyob ti ch'en tac yic'ot ti majquibil. Pero ma'anic majch tsi' ñopo i coltañob. Ma'anic majch tsi' yac'ayob ti coel. ²³Ti pejtelelta yom mi la' ñich'tan ili t'an cha'an mi la' taj la' cantesantel. Yom mi la' ña'tan jini babaq'uen ba mu' ba caj ti ujtél. ²⁴¿Majqui tsi' yac'la Jacob ti' c'ab xujch'ob? ¿Majqui tsi' yac'la Israel ti tic'lantel? ¿Mach ba jinic lac Yum? Come tsi' cha'leyob mulil

ti' contra lac Yum. Ma'anic tsi' ñopbeyob i t'an. Ma'anic tsi' ñich'tabeyob i mandar. ²⁵Jini cha'an Dios tsi' wersa pasbeyob i mich'lel. Tsi' jisayob ti guerra. Anquese joyolob ti c'ajc, ma'anic tsi' ch'ambeyob isujm. Ma'anic tsi' ñopoyob mi tilem ti Dios.

Lac Yum tsi' coltayob ti' yutslel i pusic'al

43 Pero wale woli' yal lac Yum tsa' ba i mele Jacob: Mach a cha'len baq'uen Israel, come joñon tsac mañayet. Tsa cotsabeyet a c'aba'. C cha'añet. ²Che' ma' ñumel ya' ti ja', che' cabal a wocol, ya' añon quic'otet. Che' ma' ñumel ya' ba' tam ja', che' cabal a tic'lantel, ma'anic mi caj a sujpe'el ochel. Che' ma' c'axel ti c'ajc, ma'anic chuqui mi caj i tumbeñet. Ma'anic mi caj i pulet c'ajc. ³Come joñon a Yumon a Dioson, Ch'ujulon Ba i cha'an israelob, a waj Coltayajon. Joñon tsa cac'la Egipto, yic'ot Etiopía, yic'ot Seba ti' p'atlel jini yumal ciro ti' a q'uexol cha'an mij cantañet, Israel. ⁴Come c'uxbibiletla c cha'an, jini cha'an tsa cac'lyob ti chamel yaño' ba ti a q'uexol, come uts'atax mij q'uelet. Ñuquet tic wut. ⁵Mach a cha'len baq'uen, come añon quic'otet. Mi caj c tempan tilel ti Sion a walobilob ba' pam pujquemob ya' ti' pasibal q'uin yic'ot ti' bajlibal q'uin. ⁶Mi caj c pay loq'uel calobilob ti norte yic'ot ti sur. Ma'anic mi caj i mactantelob. Anquese ñajt añob mi caj c payob tilel. ⁷Mi caj i laj tilelob mu' ba i pejcañoñob ti' yum. Tsac meleyob cha'an mi' tsicetsañob c ñuclel. C melbalob. ⁸Cha' payayob tilel ti pejtelelob, jini xpots'ob año' ba i wut yic'ot xcojcob año' ba i chiquin.

⁹La' i much'quiñob i ba pejtelel winicob ti pejtelel pañimil. ¿Majqui tsi' wan ña'ta chuqui woli' yujtel? La' tilicob testigojob mi an majqui tsi' wan subu chuqui woli' yujtel. Mi ma'anic testigo la' i ña'tañob joñon jach mic wan sub chuqui mi' caj ti ujtel. ¹⁰Pero testigojetla, israelob, la' waj coltayajon. C winiquetla. Tsac wan yajcayetla cha'an mi la' cañon, cha'an mi la' ñopon, cha'an mi la' wen ña'tan ma'anic yamba ti pejtelel ora mi ti wajali mi ti tal to ba ora. Joñon jach la' Yumon la' Dioson. ¹¹Joñon jach Yumalon. Ma'anic yamba xcoltaya. ¹²Tsa'ix cac'la c t'an. Tsac challe coltaya. Tsa cac'la c ba ti cajñel che' ba tsa' la' choco la'

dioste' tac. Testigojetla c cha'an. ¹³Che' maxto anic i saclel pañimil añonix. Añon ti pejtelel ora. Ma'anic majch mi mejlel i chilet tij c'ab. Che' an chuqui com c mel ma'anic majch mi mejlel i mactan.

¹⁴Lac Yum jini la' waj Coltaya, jini Ch'ujul BΛ i cha'an Israel woli' ya: Cha'an c'ux mi cubiñet mi caj c choc majlel soldadojob ti' contra Babilonia. Mi' cajelob ti cabal baq'uen jini año' bΛ ti Babilonia mu' bΛ i lon chañ'esañob i bΛ. ¹⁵Joñon la' Yumon, Ch'ujulon BΛ la' cha'an tsa' bΛ c mele Israel. La' Reyon. ¹⁶Tsac jambeyet bij ya' ti ojilil colem ja' ba' tsa' ñumiyet ti colem ñajb. ¹⁷Joñon tsac paya loq'uel ti Egipto soldadojob cabal bΛ i p'atlel yic'ot carreta yic'ot caballo. Temel tsa' jiliyob ti colem ja'. Ma'anix tsa' chan tejchiyob. Tsa' laj jiliyob ti junyajlel che' bajche' mi' yajpel c'ajc. ¹⁸Pero caya la' ña'tan chuqui tac tsa' ujtí ti wajali. ¹⁹An tsijib tac bΛ mu' bΛ caj c pasbeñetla. Mach jalix mi caj la' q'uel. Wolix c tech. Mi caj c ñusan bij ya' ba' tiquin pañimil cha'an mi' sujtelob c cha'año' bΛ. Mi caj cac' ja' ya' ba' jochol lum. ¿Mach ba' tsictiyemic que'tel? ²⁰Jini bate'el tac ti mate'el, yic'ot bajlum yic'ot ja'al pech mi caj i tsictesañon c ñuclel. Come mi cac' ti ñumel ja' ya' ba' tiquin pañimil, yic'ot colem ja' ti' tiquiñal pañimil cha'an mi' japob jini yajcabilo' bΛ c cha'an. ²¹Tsa'ix c wan mele c winicob cha'an mi' yochelob ti calobil, cha'an mi' tsictesañob i ñuclel j c'aba'.

²²Pero ma'anic tsa' chan ña'tayon, Jacob. Tsa' lujba a tsajcañon. ²³Mach ti pejtelelic a pusic'al tsa' waq'ueyon jini tsansabil bΛ c majtan. Ma'anic tsaj c'ajtibeyet cabal c majtan. Ma'anic tsaj c'ajtibeyet pom. ²⁴Ma'anic tsa' mambeyon xojocña bΛ pom. Ma'anic tsa' waq'ueyon i tijicñayel c pusic'al yic'ot c majtan am bΛ i lewil. Pero tsa' wutsi p'olbeyon c ch'ijiyemlel cha'an cabal a mul yic'ot a jontolil. ²⁵Joñon mic bajñel ñusabeñet a mul ti' yutslel c pusic'al. Ma'anix mi caj c chan ña'tan a mul. ²⁶Yomix ma' mel a bΛ quic'ot. Subu a bΛ cha'an mic ñusan a mul, cha'an mij q'uelet ti uts'at. ²⁷A rajq'uil tsi' cha'leyob mulil c'ala' ti oñiyi. Pejtel a ñojte'elob tsi' ñusayob c t'an. ²⁸Jini cha'an tsac loc'sa a motomajob ti' ye'tel. Tsa cac'Λ ti p'ajtal jini israelob. Mi caj i yubiñob quisin.

Xuc'ul lac Yum jini cojach bΛ Dios

44 Jini cha'an ñich'tan c t'an Jacob, c winic. I p'olbalet Israel yajcΛbil bΛ c cha'an. ²A Yum tsa' bΛ i meleyet che' cΛntΛbilet to, jiñΛch mu' bΛ caj i coltañet. Mach a cha'len bΛq'uen c winic Jacob, tojet bΛ. Tsac yajcayet. ³Joñon mi caj c choc tilel ja'al ya' ba' tiquin pañimil. Mi caj c ñusan colem ja' ya' ti' tiquiñal pañimil. Mi caj cΛq'ueñob quEspíritu a p'olbal. Mi caj cΛq'ueñob i yutslel c t'an a walobilob. ⁴Uts'at mi caj i colelob ya' ti jamil che' bajche' te' mu' bΛ i colel ti' ti' colem ja'. ⁵Juntiquil mi caj i yΛl: "I cha'añoñΛch lac Yum", che'en. YambΛ mi caj i pejcan Jacob ti' tat. YambΛ mi caj i ts'ijban ti' c'Λb i c'aba' lac Yum yic'ot i c'aba' Israel.

⁶Che'Λch woli' yΛl lac Yum, jini i Rey israelob, jini Xcoltaya i cha'añoñob, i Yum Panchan yic'ot Pañimil: Joñon jini ñaxan bΛ, joñon jini wi'il bΛ. Ma'anic yambΛ Dios. ⁷¿Am ba yambΛ lajal bajche' joñon? La' i tsictesan i bΛ. La' i sub chuqui mi caj i yujtel mi DiosΛch. La' i wΛn tsictesan tic tojlel. Joñon jach tsa cΛc'Λ ti melol chuqui tac wΛn ña'tibil c cha'an yic'ot chuqui tac mi' caj ti ujtel. ⁸Mach la' cha'len bΛq'uen. Mach yomic mi' toj sajtel la' pusic'al. ¿Mach ba anic tsac tsictesΛbeyet chuqui mi' caj ti ujtel c'ΛlΛl ti oñiyi? C testigojetla, ma'anic yambΛ Dios. Joñon jach Dioson, a Xajlelon. Ma'anic yambΛ, che'en lac Yum.

Tontojob jax mu' bΛ i ch'ujutesañob dioste' tac

⁹Sojquemob pejtel jini xmel diosob. Ma'anic i c'ajñibal i melbalob mu' bΛ i lon c'uxbiñob. Jini mu' bΛ i melob mi' bajñel ña'tañob mach c'otic i wut jini diosob. Ma'anic mi' yubiñob t'an. Ma'anic i ña'tΛbal. Jini cha'an mi' cajelob ti quisin. ¹⁰Lolom jach i ye'tel jini winic mu' bΛ i mel dioste' tac. ¹¹Pejtel mu' bΛ i ch'ujutesañob mi caj i yubiñob quisin, come i melbal jach winicob. La' i tempañob i bΛ xmel diosob yic'ot mu' bΛ i ch'ujutesañob cha'an mi' tsictiyel i lot. Mi caj i toj sajtelob i pusic'al. Mi caj i yubiñob quisin.

¹²Jini yujil bΛ i pΛc'ol tsucu taq'uin mi' chuc yic'ot tenaza cha'an mi' ticwesan ti c'ajc. Mi' jats' ti martillo ti' p'ΛtΛlel i c'Λb cha'an mi' melben i wut. Che' tsa'ix lujba ti e'tel wi'ñayix. Anix i tiquin ti'. Tsa'ix jili i wersa. C'unix pañimil mi ma'anic

chuqui mi' jap. ¹³Jini xjuc' te' mi' c'atchocon regla. Mi' ñusan lápiz ya' ba' yom p'elol. Che' jini mi' juc' ti cepillo. Mi' p'is cha'an mi' melben i yejtal winic. Wen i t'ojol ba ti q'uelol, pero ma'anic mi' ñijcan i ba. ¹⁴Winicob mi' pa'c'ob te'. Jini ja'al mi' cosan. Che' tsa'ix coli, mi' c'otel winic ti te'el. Mi' yajcan toj tac ba te' mi ch'ujte' o mi ciprés o mi c'olol. ¹⁵Mi' c'An lamital cha'an i si', cha'an mi' q'uixñesan i ba, yic'ot cha'an mi' tiq'uesan caxlan waj ti horno. Lamital mi' c'An cha'an mi' mel i dios. Mi' ñocchocon i ba ti' tojlel. I melbalach. I yejtalach winic, pero mi' pa'cchocon i ba ti' tojlel. ¹⁶Lamital jini te' mi' c'An cha'an i si', cha'an mi' tiq'uesan i we'el cha'an mi' pojpon we'elal. Che' jini mi' ñaj'an. Che' jini mi' caj ti q'uix. Mi' ya'l: "Tsa' q'uixñayon ti c'ajc", che'en. ¹⁷Mi' c'An i colojbal jini te' cha'an mi' mel i dios. Mi' ñocchocon i ba ti' tojlel. Mi' ch'ujutesan. Mi' c'ajtiben ti wocol t'an: "Coltañon, come c dioset", che'en.

¹⁸Ma'anic mi' cañob Dios. Ma'anic mi' ch'Ambeñob isujm, come Dios tsi' muts'beyob i wut cha'an ma'anic mi' c'otelob i wut. Tsi' sobbeyob i jol cha'an ma'anic mi' ch'Ambeñob isujm. ¹⁹Ma'anic majqui mi' ñoj ch'amben isujm pañimil. Ma'añobic i ña'talbal cha'an mi' ya'lob: "Tsaj c'añal lamital ili te' cha'an c si', cha'an mic tiq'uesan waj, cha'an mic pojpon we'elal, cha'an mij c'uxe!. ¿Yom ba mij c'An jini jach ba te' cha'an mic mel c dios? ¿Mach ba to'ol lolomic jach? ¿Yom ba mic ñocchocon c ba ti' tojlel i xujc'unte'lel?" Mach che'ic mi' ya'l. Ma'anic mi' wis ochel ti' pusic'al chuqui woli' mel. ²⁰Jini mu' ba i ch'ujutesan dioste' ma'anic mi' we'saben i ch'ujlel. Ti' caj i sojquemal i pusic'al mi' sajtel. Ma'anic mi' wis ña'tan chuqui woli' mel. Ma'anic mi' ya'l: "¿Mach ba lotic ili dioste' woli ba c mel tij c'ab?" che'en.

Lac Yum jiñach i yaj Coltaya jini israelob

²¹Lac Yum woli' ya'l: Ña'tan pejtelel iliyi, Jacob, come c winiquet Israel. Joñon tsac meleyet, c cha'añet. Ma'anic mi caj a ñajayel c cha'an. ²²Joñon tsac sac jisa a mul che' bajche' total. Majlemix che' bajche' i yowix lum. Jini cha'an yom ma' cha' sutq'uin a ba tic tojlel come tsac mañayet. ²³C'ayinla c ñuclal añet ba la ti panchan, come jiñach que'tel. Tsictesanla ti c'am ba t'an añet ba la ti pañimil. Yom tijicña wits tac yic'ot

pejtel te'el, yic'ot jujuntejc te'. Come tsac maññ Jacob. Tsa cac'Λ ti tsictiyel c ñucler ti' tojlel Israel. ²⁴Che'Λch woli' ya' lac Yum, jini a Waj Coltaya tsa' ba i meleyet che' cantΛbilet to. Joñon a Yumon tsa' ba c mele pejtel chuqui tac an. Tic bajñel tsac lich'i jini panchan. Tic bajñel tsac mele pañimil yic'ot pejtelel i ba'.

²⁵Joñon mi cac'ob ti asiyel jini payxo x'alt'añob. Mic ma'ctΛbeñob i t'an. Mic socbeñob i ña'tΛbal jini lon yujilo' ba. Mi cac' ti sac jilel i ña'tΛbal. Tontojob mi' majlelob. ²⁶Joñon mi caq'ueñob c t'an jini x'alt'añob c cha'an. Mi cac' ti ts'actiyel i t'an jini x'etelob c cha'an. Joñon mic suben c tejlum Jerusalén, cha' talob ti chumtΛl israelob wa' ti jini tejlum yic'ot ti' tejlum tac Judá. Cha'an c mandar mi caj i laj wa'chocontel otot ba' tsa' jejmi. ²⁷Mic suben i mal lum cha'an mi' tiquin i ya'al. Mi cac' ti tiquin colem ja'. ²⁸Joñon mi caq'uen i ye'tel Ciro. Mic sub: "Jiñach xcanta tiñame' c cha'an. Mi caj i mel pejtelel chuqui mi ca'. Mi caj i ya'c' ti cha' melol Jerusalén. Mi caj cac' ti cha' wejlel i c'Λclib jini Templo". Tsa'ix cac'Λ c t'an, che'en lac Yum.

Dios tsi' sube Ciro mi caj i majlel i cha'an

45 Jiñach i t'an lac Yum tsa' ba i sube Ciro jini yajcΛbil ba i cha'an: Joñon woli' coltañet cha'an ma' jisan cabal tejlum tac, cha'an ma' jisabeñob i p'ΛtΛlel ñuc ba reyob. Mi cac' ti jejmel i ti' tac Babilonia. Ma'anic majch mi mejlel i cha' ñup'. ²Joñon ñaxan mic majlel ti' tojel a wut. Mi caj c pamun majlel bij. Mi caj c bic'ti c'Λs jini puerta tac yic'ot bara tac melbil ba ti tsucu taq'uin. ³Mi caj c loc'sΛbeñet ti' saclel pañimil jini chuba'añal letsem tac ba i tojol mucbil ba ti lum ba' ic'yoch'an ba. Che' jini mux caj a ña'tan a Yumon. Tsac pΛyΛyet ti a c'aba', Ciro. I Dioson Israel. ⁴Cha'an c'ux mi cubin c winic Jacob (jini c winic Israel), jini cha'an tsac wa'chocoyet ti ili e'tel. Tsac pΛyΛyet ti a c'aba'. Tsa caq'ueyet a p'ΛtΛlel ti yumal anquese mach a cañayonic. Che' jini mi caj j coltan Israel tsa' ba c yajca. ⁵Joñon jach Yumalon. Ma'anic yamba. Joñon jach Dioson. Mi caj c p'Λtesañet anquese mach a cañayonic, 'cha'an mi' ña'tañob ti pejtelel pañimil c'ΛlΛl ba' mi' pasel q'uin yic'ot ba' mi' bajlel q'uin. Ma'anic yamba, cojach joñon. Joñon jach Yumalon. Ma'anic lajal ba bajche'on.

⁷Joñon mic melben i saclel q'uin yic'ot ac'alel. Mi caq'ueñob i wenlel winicob yic'ot jini baɓaɓq'uen ba. Yumalon. Mic mel pejtelel iliyi. ⁸La' tilic toj ba a pusic'al che' bajche' ja'lel ti chan. La' wen p'ojlic ti pañimil i coltanelob winicob yic'ot toj ba i pusic'al C melbalach. Joñon, la' Yum, tsac mele, che'en.

Jini xmel pañimil

⁹Tal cabal wocol ti' tojlel jini mu' ba i ya'len i Yum tsa' ba i mele. Lajalonla bajche' p'ejt melbil ba ti lum. Jini melbil ba ti lum, ¿yom ba mi' suben xmeloñel: “¿Chuqui wola mel?” Jini oc'ol ma'anic mi' suben xmel uc'um: “Mach uts'atic wola' melon”. ¹⁰Che' ja'el jini alal mach mejlic i suben i tat: “¿Chucoch tsa' p'oloyon?” Mach mejlic i suben i ña': “¿Chucoch tsa' wacl'ayon ti pañimil?” Mach che'ic mi' yalob.

¹¹Jini lac Yum, i Dios israelob tsa' ba i mele Israel, tsi' yala: ¿Yom ba ma' letsan a t'an tij contra? ¿Yom ba ma' cantesañon bajche' yom mic mel jini com ba c mel? ¹²Joñon tsac mele pañimil. Tsac mele winic ti pañimil. Tsac lich'choco panchan tij c'ab. Tsa cac'la jini ee' ti' yajñib tac. Añach c p'atalel cha'an mic ts'actesan pejtelel tsa' ba c subu. ¹³Joñon tsac yajca Ciro cha'an com cac' ti tsictiyel c tojel. Mi caj c toj'esaben majlel pejteli i bijlel. Ciro mi caj i cha' wa'chocobeñon c tejclum. Mi caj i yac' ti coel c cha'año' ba tsa' ba cajchiyob majlel. Ma'anic mi caj i c'ajtibeñob tojoñel, che'en i Yum Panchan yic'ot Pañimil.

¹⁴Woli' yal lac Yum: Talob jini año' ba ti Egipto yic'ot xchoñoñel loq'uemo' ba ti Etiopía, yic'ot jini sabeojob, cha'an mi' yochelob ti a wenta ti majtan e'tel. Mi caj i tsacleñet majlel. Mi caj i ñocchocoñob i ba ti a tojlel cha'an mi' c'ajtiñob i coltanel ti wocol t'an, come ya' jach ti a tojlel mi' yajñel Dios, jini jach ba Dios. Mi caj i yalob: “Isujm, wa'an Dios a wic'ot. Ma'anic yamba”, che'ob. ¹⁵Isujm ma' mujcun a ba Dios, i Dioset ba Israel. Ma'anic mij q'uel bajche' ma' mel a we'tel, caj Coltaya. ¹⁶Mi' cajelob ti quisin jini xmel diosob ti pejtelelob. Mi caj i puts'elob cha'an baq'uen. ¹⁷Pero Israel mi caj i taj i coltanel ti pejtelel ora ti' tojlel lac Yum. Ma'anix mi caj i chan cha'len quisin yic'ot baq'uen ti pejtelel ora.

¹⁸Lac Yum, jiñach Dios. Tsi' mele panchan yic'ot pañimil, yic'ot pejtelel chuqui tac an. Mach lolomic tsi' mele pañimil.

Tsi' mele cha'an i chumlib winicob. Tsi' y^ΛΛ: Joñon Yum^Λlon, ma'anic yamb^Λ. ¹⁹Ma'anic mic cha'len t'an ti mucul. Ma'anic mic mujcun c b^Λ ti ic'yoch'an b^Λ pañimil. Ma'anic tsac subeyob i p'olbalob Jacob cha'an mi' lon tsajcañoñob. Joñoñach la' Yumon. Mic sub chuqui tac isujm. Mic sub chuqui tac toj, che'en.

Lac Yum mi' p^Λy jini sajtemo' b^Λ

²⁰Much'quin la' b^Λ ba' añon. Tempan la' b^Λ pejteletla mach b^Λ anic tsa' jis^Λntiyetla cha'an Ciro, cha'an mi la' wubin jini mu' b^Λ caj c subeñetla. Ma'anic i ña't^Λbal winicob mu' b^Λ i q'uechob ñumel i diosob. Mi' lon c'ajtibeño i colt^Λntel ti' tojlel dioste' tac mach b^Λ yujilic coltaya. ²¹Mi tsi' coltayetla dioste' subula. Teme la' t'an. Tsictesanla i sujmllel. ¿Majqui tsi' w^Λn subu jini woli b^Λ i yujtel? ¿Mach ba' anic tsac subu ti wajali? Ma'anic yamb^Λ Dios. Joñon jach Dioson. Tojon, Xcoltayajon. Ma'anic yamb^Λ. Joñon jach.

²²Q'ueleyonla pejtel año' b^Λ ti pañimil cha'an mi la' taj la' colt^Λntel. Come Dioson, ma'anic yamb^Λ, joñon jach, che'en lac Yum. ²³Tic bajñel jach tsa c^Λc'Λ c t'an. Tilem ti toj b^Λ c pusic'al jini t'an tsa' b^Λ loq'ui ti quej. Mach ch^Λn sujtic. Pejtel winicob mi caj i ñocchocoño i b^Λ tic tojlel. Mi caj i lu' melob i b^Λ tic tojlel.

²⁴Che' jini mi caj i y^Λlob: "Isujm tilem ti lac Yum toj b^Λ lac pusic'al yic'ot lac p'^Λt^Λlel mu' b^Λ i y^Λq'ueñoñla", che'ob. Mi caj i tilelob jini tsa' b^Λ i ts'a'leyoño. Ti pejtelob mi' cajelob ti quisin. ²⁵Mi caj j q'uel ti toj pejtel mero isujm b^Λ i p'olbal Israel. Mi caj i m^Λjlel i cha'año, che'en lac Yum.

I jilibal Babilonia

46 ¹⁻²Jini dios tac, Bel yic'ot Nebo, wolix i ch'^Λjmel majlel ti carreta. Woli' tuje'an majlel tat wacax. Awilan colelix i ñuc yajlel ti lum, come wocol mi' majlel cha'an cab^Λl i cuch carreta. Bajche' jach año i jini dioste' tac, mi buchul o mi p^Λc^Λl, ma'anic mi mejlel i coltaño i b^Λ. ¿Bajche' mi mejlel i coltan jini mu' b^Λ i ch'ujutesaño ba' ora mi' tilel Ciro?

³Ubinla c t'an, i p'olbalet b^Λ la Jacob tsa' b^Λ c^Λleyetla. C^Λnt^Λbiletla c cha'an c'^Λl^Λl che' b^Λ tsa' la' q'uele pañimil.

Tsac meq'ueyetla majlel tij c'ab. ⁴C'Alal che' ñoxetixla chan xuc'ulon. C'Alal che' anix i saquel la' jol mi caj c chan cantañetla. Joñon tsac meleyetla. Mi caj c payetla majlel, mi caj j cuchetla. Mi cajel j coltañetla. Joñon jach a Dioson.

⁵¿Majqui yic'ot mi mejlel la' lajon? ¿Majqui lajal bajche' joñon mi la' wal? ⁶Jini yomo' ba yamba i dios on mi' loc'sañob oro ti' bolsa. Mi p'isob plata ti balanza. Mi' tojob xmel dioste' cha'an mi' melbeñob i dios. Mi' ñocchocoñob i ba ti' tojlel, mi' ch'ujutesañob. ⁷Mi' q'uechob majlel. Mi' wen buchchocoñob ti' yajñib. Ya' jach mi' c'aytal. Ma'anic mi' wis ñijcan i ba. Anquese c'am mi' cha'leñob oñel cha'an mi' c'ajtiñob i coltanel, ma'anic mi jac'. Che' woliyob ti wocol ma'anic i coltanelob. ⁸Xmulilob tsa' ba la' c'aya wen ba bij, cha' c'ajtesanla mach mejlic i coltan i ba jini dioste'. Pasa la' ba ti uts. Mach mi la' lon ña'tan uts'at chuqui woli la' lon mel. ⁹Ña'tanla c melbal ti' tojlel Israel ti wajali. Dioson. Joñon jach Dioson. Ma'anic yamba. ¹⁰Joñon mic wan sub i yujtibal jini woli ba ti tejchel. Ti oñiyi tsac wan tsictesa jini maxto ba anic woli ti ujtel. Pejtel chuqui wan ña'tabil c cha'an mi caj i yujtel. Mic mel pejtel chuqui tac jach com. ¹¹Mi caj c pay tilel wi'ñal ba mut tilem ba ba' mi' pasel q'uin. Jiñach Ciro ch'oyol ba ti ñajt ba lum, mu' ba caj i jolontesan jini e'tel ña'tabil ba c cha'an. Tsa'ix c wan subu. Mi cajel c ts'actesan che' bajche' tsac ña'ta. Che'ach mi caj c mel.

¹²Ñich'tañonla jatetla, tilel bixel ba la' pusic'al, mach ba tojeticla. ¹³Mi caj c ch'ambeñetla tilel la' coltanel ti la' tojlel. Mach ñajtic an. Mach jalix mic tilel cha'an mij coltañetla. Mi caj c cha' wen mel Jerusalén yic'ot Israel. Mi caj caq'uen c ñuclel.

I jilibal Babilonia

47 Juben ti a buchlib, Babilonia. Buchi' ti lum. Tsa'ix ts'actiyi i yorajlel a ñuclel. Mach chan yumletix. Mach chan wen chumuletix che' bajche' i t'ojol jax ba xch'oc am ba i p'untanel. Ma'anix mi caj a wajlel ti uts'at. ²Ch'ama jini ña'tun. Juch'u harina. Loc'o i mosil a jol. Letsan a majts. Chan mi caj a letsan cha'an ma' t'um ja' ba' ma' c'axel ti colem ja'. ³Mi caj a q'uejlel che' pits'ilet. Mi caj a wubin quisin ti' tojlel jini mu' ba i tic'lañet. Mi caj j q'uextabeñet a mul.

Ma'anic majch mi caj c p'untan. ⁴Che'ach tsi' yalɔ jini Ch'ujul Bɔ i cha'an Israel tsa' bɔ i mañayonla, i Yum Panchan yic'ot Pañimil. Che'ach i c'aba'.

⁵Ñach'al yom ma' buchtal, Babilonia. Cabal mi caj a mel a pusic'al come ma'anix a c'uxbintel ti' tojlel yumalob. Mach chan yumaletix ti pañimil. ⁶Che' bɔ tsac mich'le c cha'año' bɔ, tsa cac'ayob ti a c'ab cha'an mi' tojob i mul. Pero ma'anic tsa' wis p'untayob. Tsa' wɔq'ueyob al bɔ i cuch jini xñoxo' bɔ. ⁷Tsa' lon ña'ta yumal et ti pejtelel ora. Jini cha'an ma'anic tsa' p'unta c cha'año' bɔ. Ma'anic tsa' wis ña'ta mi mux caj a toj a mul cha'an tsa' tic'la c cha'año' bɔ.

⁸Jini cha'an ñich'tan c t'an. Lajalet bajche' ts'i'lel bɔ x'ixic mu' bɔ i mulan jini wen i t'ojol tac bɔ. Ma' wal ti a pusic'al: "Jasalonix. Joñon jach mic cha'len yumal. Mach talic wocol tic tojlel. Ma'anic mi caj j cɔytal ti meba'. Ma'anic mi caj i chamelob calobilob", lon che'et. ⁹Pero tal ti ora ili cha'chajp wocol ti a tojlel ti jump'ejl jach bɔ q'uin. Meba' x'ixic mi caj a cɔytal. Mi caj a chilbentel a walobilob, anquese a wujil wujt, anquese ma' pejcan xiba. Lolom jach ma' mel ñuc tac bɔ cha'an ma' lon coltan a bɔ.

¹⁰Tsa' lon ña'ta jasaletix anquese cabal a mul. Tsa' wala ti a pusic'al: "Ma'anic majch mi' q'uelon", che'et. Pero lotibilet cha'an jini wujtintel. Tsa' wala: "Joñon jach mic cha'len yumal. Ma'anic yambɔ bajche' joñon", lon che'et. ¹¹Pero tal wocol ti a tojlel. Mach mejlelic a maɔtan. Mi caj i jisañet. Mach mejliquet ti coel. Che' mach yɔxalic a wo mi caj i bac' tilel ñuc bɔ wocol ti a tojlel. Ma'anic mi' ñusantel a mul.

¹²Chan pejcan xiba, chan mele ñuc tac bɔ i ye'tel cha'an ma' ñop a bac'tesan jini mu' bɔ i tilel i jisañet. Chan cha'len wujt che' bajche' tsa' cha'le c'alal che' xch'oquet to. Tic'al mi muc'ach a coltan a bɔ. Che'ach wola' lon ña'tan. ¹³Tsa' jisa a p'atɔlel ti pejtelel chuqui tsa' lon mele cha'an ma' coltan a bɔ. La' tilicob a waj toj'esayajob jini jal bɔ mi' q'uelob ec' mu' bɔ i lon ña'tañob i sujmllel ec', mu' bɔ i subob chuqui mi caj i yujtel. La' i coltañetob ti' yorajlel wocol. ¹⁴Pero p'isi ti a wenta, lajalob mu' bɔ i q'uelob ec' bajche' i jamil otot mu' bɔ i bac' jilel ti c'ajc. Ma'anic mi mejlel i coltañob i bɔ ti c'ajc, come c'ax ticaw. Mach lajalic bajche' c'ajc ba' mi laj q'uixñesan lac bɔ. ¹⁵Laj majlemobix

a cañayo' ba tsa' ba i pejcayet c'alal che' ba tsa' coliyet. Ti jujuntiquil tsi ch'amayob i bijlel. Wale ma'anic majch mi' coltañet.

Lac Yum tsi' tsictesa wen ba t'an

48 Ñich'tan c t'an, i yalobil Jacob, ochem ba a c'aba ti Israel, i p'olbalet ba Judá. Ma' wa'chocon a t'an ti' c'aba' lac Yum. Ma' lon sub ñopol a cha'an i Dios Israel, pero mach xuc'uletic yic'ot. Mach jump'ejlic a pusic'al. ²Ma' wál chucul a c'aba' ti jini ch'ujul ba tejclum, clyalet ti' p'atlalet i Dios Israel, i Yum Panchan yic'ot Pañimil.

³Anix ora tsac tsictesabeyet pejtél mu' ba caj ti ujtél. Che' ba tsac subu, ti jumuc' jach tsac ts'actesa. Tsa' ujtí che' bajche' tsa cala. ⁴Tsac ña'ta jontolet, xiq'uilet jax ti a t'an. Tsats a bic' yilal bajche' tsucu taq'uin mach ba anic mi' jac' i toj'esantel. Mach a womíc a ñop. ⁵Jini cha'an anix ora tsac tsictesabeyet chuqui mi' caj ti ujtél che' maxto ujtemic ame a lon sub: "Jiñach c dios tsa' ba i mele. Ti' caj jini pác'bil ba i yejtal tsa' ujtí", ame lon che'iquet.

⁶Tsa'ix a wubi pejtél c t'an. Tsa'ix a q'uele chuqui tsa' ujtí. Yomix ma' ch'amben isujm. Yomix ma' sub mach i ye'telic yamba dios. Wale mi caj c tsictesabeñet mucul tac ba, maxto ba cambilic a cha'an. ⁷Wolic mel tsijib tac ba, maxto ba ubibilic a cha'an, ame a lon al ubibilix a cha'an. ⁸Mach ubibilic a cha'an. Mach cambilic a cha'an ti pejtelel ora. Anix ora wola' mel a ba ti xcojc, come mach xuc'uletic, ch'aplomet jax c'alal che' ba tsa' wila pañimil.

⁹Cha'an mi' tsictiyel i ñuclel j c'aba' jini cha'an wolic chan cuchbeñet a mul. Cha'an com j c'uxbintel jini cha'an ma'anic tsac bac' jisayet. ¹⁰Tsac ñusayet ti prueba che' bajche' mi' pulel sasac taq'uin ti c'ajc cha'an mi' saq'uesantel, pero ma'anic tsac taja wen ba a pusic'al. ¹¹Tsa calq'ueyet a tsico' pusic'al cha'an i c'uxbintel j c'aba' yic'ot cha'an ti' caj c ñuclel ame p'ajlecon cha'an jini mach ba i cañayoñobic.

Lac Yum mi caj i coltan i cha'año' ba

¹²Ubiñon Israel, c tejclum Jacob, tsa' ba c palya. Joñon jini Ñaxan Ba yic'ot Cojix Ba. Añon ti pejtelel ora. ¹³Joñon tsac xuc'choco jini pañimil tij c'ab. Joñon tsac lich'choco jini

panchan ti ñoj ba j c'ab. Ujtjel jax to c pejcañob, tsa' cajiyob ti ajñel.

¹⁴Tempan la' ba, ñich'tabebñonla c t'an. ¿Majqui tsi' wan subu chuqui mi' caj ti ujtjel? Come tal jini winic mu' ba j c'uxbin. Mi caj i mel pejtjel tsa' ba c wan ña'ta ti' contra Babilonia. Mi caj i yac' ti pam pujquel jini soldadojob babiloniajob. ¹⁵Joñon tsac wan subu. Tsa calq'ue i ye'tel Ciro. Tsac paya tilel. Tsaj colta cha'an mi' majlel i cha'an. ¹⁶Lac'tesan la' ba ba' añon. Ñich'tanla c t'an. Ma'anic ba' ora tsac cha'le t'an ti mucul. Ba' ora mi' yujtel jini albil ba c cha'an ya' añon. Lac Yum Dios tsi' chocoyon tilel yic'ot i Ch'ujlel, che'en.

¹⁷Lac Yum, la caj Coltaya jini Ch'ujjul Ba i Dios Israel woli' yal: Joñon a Yumon, a Dioson mu' ba j cantesañet cha'an ma' taj chuqui wen. Joñon mic toj'esañet ti a bijlel ba' yom ma' cha'len xambal. ¹⁸Tsa'ic a jac'la c mandar, cabalix i ñach'tilel a pusic'al che' bajche' colem ja' woli ba ti ajñel. Añach toj ba a pusic'al yic'ot cabal a p'atlel che' bajche' wets'ecña ba ja'. ¹⁹Tsa'ic a jac'la, cabalix a walobilob che' bajche' i ji'il colem ja'. Uts'at i pusic'alob che' bajche' i tatob. Ma'anic mi' yajpel a c'aba' ti pañimil.

²⁰Loq'uenla ti Babilonia. Cha'lenla c'ay che' wolix la' loq'uel majlel ba' calchaletla. Tsictesanla c'alal ti' xujc tac pañimil cha'an lac Yum tsi' colta israelob jini x'e'telob i cha'an.

²¹Anquese tsi' palyayob ñumel ti' tiquiñal pañimil, ma'anic tsi' yubiyob tiquin ti'. Tsi' top'o colom xajlel cha'an cholocña mi' loq'uel ja'. Tsi' yalq'ueyob i jap. ²²Pero ma'anic i ñach'tilel i pusic'al xjontolilob, che'en lac Yum.

Jini X'e'tel i cha'an Dios mi caj i coltan Israel

49 Jini X'e'tel i cha'an Dios tsi' yala: Ñich'tañon jini ñajt ba chumuletla ti pañimil, yic'ot jini año' ba ti lum tac joyol ba ti ja'. Lac Yum tsi' wan yajcayon che' cantabilon to. Tsi' palyayon c'alal che' ba tsi' yac'ayon ti pañimil c ña. Tsi' yotsabeyon j c'aba'. ²Tsi' yalq'ue i c'ajñibal quej che' bajche' espada jay ba i ni'. Tsi' mucuyon ti mal i c'ab. Tsi' meleyon che' bajche' i te'el jalajb wen jay ba i ni'. Lajalon ti' c'ab Dios che' bajche' i te'el jalajb lotol ba ti' yajñib. ³Dios tsi' subeyon: "Israel c Winiquet, mero Israelet. Mi caj c taj c ñuclel ti jatet", che'en. ⁴Lolom jach tsac cha'le cabal e'tel. To'ol jach tsa' jili

c p'at'alel. Pero pejtél jini que'tel an ti' wenta lac Yum mu' ba caj i yalq'ueñon c chobejt'abal.

⁵Walle ñuconix ti' tojlel lac Yum, come Dios jiñ'ach c p'at'alel. Jiñ'ach tsa' ba i yal'ayon ti coel c'at'at' che' cant'abilon to cha'an c ña'. Tsi' yotsayon ti' winic cha'an mic p'ay tilel jini israelob cha'an mi' cha' sutq'uiñob i ba ba'an lac Yum. ⁶Woli' subeñon: “Mach jinic jach israelob mi caj a p'ayob tic tojlel. Mi caj calq'uet che' bajche' i sac'el pañimil ti' tojlel jini ñajt ba chumulob ti mojt ti mojt cha'an mi' tajob i colt'antel tic tojlel c'at'at' ti petol pañimil”, che'en.

⁷Che'ach woli' yal lac Yum, la Caj Coltaya, jini Ch'ujul Ba ti Israel. Che'ach tsa' subenti jini ts'a'lebil ba, jini p'ajbil ba cha'an winicob, i mozo yum'lob: “Ba' ora mi' q'uelet jini reyob yic'ot jini yum'lob, mi caj i wa't'lob ti a tojlel. Mi caj i c'uchchocoñob i ba ti' tojel a wut cha'an tsac yajcayet”. Che' tsi' yal' lac Yum, jini Xuc'ul Ba, jini Ch'ujul Ba i cha'an Israel.

Dios mi caj i coltan Sion

⁸Lac Yum woli' chan suben i Winic: Tsa cubi a t'an che' i yorajlelix mic jac'. Ti' yutslél c pusic'al tsac jac'beyet. Che' ti' yorajlel i colt'antel c cha'año' ba tsaj coltayet. Mi caj j cantañet. Mi caj calq'uet che' bajche' prenda ti' tojlel Israel cha'an mi' wen ña'tañob mi caj c cha' aq'ueñob i lumal. Cha' talob ti chumt'al ti jochol ba tejclum. ⁹Mi caj a subeñob jini ñup'ulo' ba año' ba ti ic'ch'ipan ba pañimil: “Loq'uenla ti libre”, che' yom ma' subeñob. Mi caj i yajñelob che' bajche' tiñ'ame' c cha'an. Ya' ba' tiquin pañimil mi caj i c'uxob jam. Jas'al mi' cajelob ti buc'bal. ¹⁰Ma'anix mi caj i yubiñob wi'ñal yic'ot tiquin ti'. Ma'anix mi caj i c'un'año' cha'an i ticw'alel q'uin. Joñon mij c'uxbiñob. Mi caj c toj'sañob majlel ti' bijlel. Mi caj c p'ayob majlel ba'an i loq'uib ja'. ¹¹Mi caj c jem pejtelel mu' ba i mactan jini colem bij. Mi caj c jem jubel jini wits tac cha'an mi' sujtel ti colem bij. Mi caj c but' pejtél jini japal tac ba ba' mi' ñumel colem bij. ¹²Q'uelela. Ñajt mi caj i tilelob c cha'año' ba, loq'uemo' ba ti norte, yic'ot ti' ba'jlíbal q'uin, yic'ot ti sur. ¹³Cha'lenla c'ay añet ba la ti pañimil. Yom tijiçñayetla ti c'ay añet ba la ti wits. Come lac Yum tsa'ix i cha' ñuq'ues'abeyob i pusic'al i cha'año' ba. Mi caj i p'untan jini woliyo' ba ti wocol.

¹⁴Jini año' ba ti Sion woli' yalob: “Tsa'ix i cɔyɔyonla lac Yum. Tsa'ix ñajɔyiyonla i cha'an Dios”, che'ob. ¹⁵Pero mach isujmic. ¿Mu' ba ñajɔyel i cha'an x'ixic i yalobil? ¿Mu' ba i cɔy i c'uxbin i yalobil tsa' ba i yac'ɔ ti pañimil? Añach mu' ba i cɔy mu' ba i ñajɔyel i cha'an. Pero joñon mach che'icon. Mach ñajɔyiyetic c cha'an. ¹⁶Come ñɔp'ɔl a c'aba' tij c'ɔb ti pejtelel ora. Wolic chɔn ña'tan i ts'ajquil tac Jerusalén tsa' ba jejmi. ¹⁷Talobix a walobilob mu' ba caj i cha' melob Jerusalén. Mi caj i yajñesañob loq'uel pejtelel mu' ba i jisañet. ¹⁸Letsan a wut añet ba ti Sion. Q'uele ti' joytɔlel pañimil. Woli' much'quiñob i ba winicob cha'an mi' tilelob ba' añet. Cha'an cuxulon mi caj i ts'actiyel c t'an ti pejtelel. A contrajob mi caj i yochelob ti a mozo. Jiñach a ñuclel, che' bajche' i ch'ajlil tac jini xch'oc mu' ba cajel ti ñujpuñel.

¹⁹Asiyemix a tejclum, jocholix a lumal. Tal i yorajlel mi caj i ch'och'ocɔyel a lum cha'an cabal winicob. Ñajtix añob jini winicob tsa' ba i jisayet. ²⁰A walobilob tsa' ba i yilayob pañimil ti ñajtal ya' ba' tsa' pɔjyiyet ti cɔjchel mi caj i sujtelob tilel. Mi caj i subeñetob: “Ch'o'ch'oc jax ili lum cha'añonla. Anto yom”, che'ob. ²¹Che' jini mi caj a wal ti a pusic'al: “¿Majqui tsi' yɔq'ueyon cabal calobilob? Come tsansabilob lamital jini calobilob. Lamital tsa' pɔjyiyob majlel ti yamba lum. ¿Majqui tsi' cosayob che' añon tic bajñel? ¿Baqui tsa' tiliyob?” che'et.

²²Lac Yum Dios woli' yal: Mi caj cɔq'ueñob mandar jini gentilob año' ba ti ñajtal cha'an mi' mec'ob tilel ch'iton ba a walobilob yic'ot cha'an mi' cuchob tilel xch'oc ba a walobilob. ²³Jini año' ba i ye'tel ti pañimil, reyob yic'ot i yijñamob, mi caj i cosañob che' bajche' i tatob. Mi caj i we'sañob. Mi caj i c'uchchocoñob i ba ti lum ti a tojlel. Mi caj i tijcañob i ts'ubeñal a woc. Che' jini mux caj a ña'tan Yumɔlon. Majqui jach mi' ñopon ma'anic mi' cajel ti quisin.

²⁴¿Mu' ba la' chilben i ganar jini ch'ejl ba winic tsa' ba majli i cha'an ti guerra? ¿Mu' ba i mejlel ti colel jini xñujp'ejl ti' tojlel jontol ba yumal? ²⁵Pero woli' yal lac Yum: Mi caj i loq'uel ti libre jini cɔchɔl ba ti' wenta p'ɔtal ba i yum. Mi caj i chilbentel i ganar jini jontol ba. Mi caj j contrajin jini mu' ba i contrajiñet. Mi caj j coltan a walobilob. ²⁶Pejtel a contrajob mi caj cɔq'ueñob i walac c'ux i bac'tal. Mi caj i yac'añob ti' japol

i bajñel ch'ich'el. Pejtelel año' ba ti pañimil mi caj i ña'tañob joñon Yumalon. A waj coltayajon tsa' ba c mañayet. P'atlon mu' ba j coltan Israel, che'en Dios.

Jini israelob tsi' c'ayob lac Yum

50 Lac Yum woli' ya: ¿Chucoch tsa' majli Israel la' ña'? ¿Cha'an ba tsaj c'ay? ¿Cha'an ba tsa c'ayue i juñilel divorcio? ¿Am ba c bet cha'an mic chon c tejclumob? Ma'anic. Tsa' la' choño la' ba ba'an yamba la' yum cha'an ti' caj la' mul. Tsa' p'ajyi majlel Israel la' ña' cha'an ti' caj tsa' la' ñusabeyon c mandar. ²Che' ba tsa' tiliyon, ¿chucoch ma'anic majch tsac taja? Che' ba tsac p'ayayetla, ¿chucoch ma'anic majch tsi' jac'a? ¿Tutsul ba j c'ab cha'an mach c tajayeticla? ¿Mach ba anic c p'atlel cha'an mij coltañetla, cha'an mi c'ayuetla ti libre? Jasal mi cac' c t'an cha'an mi' laj tiquin jini colem ñajb. Ya' ti colem ja' tiquin lumix mi' majlel. Muq'uix i tuw'an ch'ay cha'an ma'anix ja'. Woli' ch'amelob ti tiquin ti'. ³Joñon mic mos panchan yic'ot i'ic' ba tocal che' bajche' mi' mos i ba meba' x'ixic woli ba ti uq'uel, che'en Dios.

I xuc'tilel i winic Dios che' an ti wocol

⁴Lac Yum Dios tsi' yaq'ueyon c ña'tabal cha'an mic ñuq'uesabeñob i pusic'al jini lujbo' ba. Mi' ñijcañon ch'ojoyel ti jujump'ejl sac'ajel. Mi' jambeñon c chiquin cha'an mic wen ubin. ⁵Lac Yum Dios tsi' pejcayon. Tsac ñich'tabe i t'an. Ma'anic mic sutq'uiben c pat. Mi c'ayuen c wut. ⁶Tsa cac'a c pat ti jajts'el ti pachi. Tsa cac'a c choj cha'an mi' bocbeñoñob c tsucti'. Ma'anic tsac m'aya c wut che' ba tsi' ts'a'leyoñob. Tsi' p'ajayoñob che' ba tsi' tujbayoñob.

⁷Lac Yum Dios jiñach Caj Coltaya. Jini cha'an ma'anic mic p'is tic wenta che' mi' p'ajoñob. Xuc'ul mi cajñel che' bajche' tsats ba xajlel. Cujil mi caj c mal ti' tojlel j contrajob. ⁸Lac'al an jini mu' ba i tsictesan toj ba c pusic'al. ¿Majqui yom i contrajiñon? La' i ñochtañon cha'an mic taj lojon c ba. ⁹Lac Yum Dios mi' coltañon. ¿Majqui mi' p'ac'on ti mulil? Mach isujmic i t'an j contrajob. Mi caj i jilelob che' bajche' pisil. Jini ts'islum mi caj i c'uxob. ¹⁰¿Majqui mi' bac'ñan lac Yum? ¿Majqui mi' jac'ben i t'an jini X'e'tel i cha'an? Jini winic, anquese mi' ñumel ba' ic'yoch'an, ba' mach wisilic i sac'lel,

ɔʎʎʎʎ i pusic'al yic'ot i Dios. ¹¹ Pero p'ump'uñetla mu' bʌ la' xic' la' bajñel c'ajc che' mi la' ñijcan letsel i nich cha'an mi la' cha'len q'uiux. Cha'lenixla xʌmbal ba' tsiquilix la' c'ajc tsa bʌ la' xiq'ui, come mach la' womic la' ñopon. Mi caj la' ɔʎʎʎʎ ti la' wocol.

Uts tac bʌ t'an cha'an Jerusalén

51 ¹⁻² Ubinla, jatetla, mu' bʌ la' ñop la' mel chuqui toj, mu' bʌ la' saɔlan la' Yum. Q'uelela baqui tilemetla, che' bajche' tsa' loq'ui xajlel ti xajlelol. Abraham yic'ot Sara la' ñojte'elob tsi' yʌc'ʎyetla ti pañimil. Che' bʌ tsac ɔʎʎʎʎob i bajñelob jach. Tsaj coltayob, tsa ɔʎc'ʎyob ti p'ojlel. ³ Isujm mi caj c cha' aq'ueñob i tijicñʎyel i pusic'al jini israelob. Mi caj c cha' mel ti uts'at pejtél jini jejmenix bʌ ti' tojlel. Mi caj c sutq'uin jini tiquin bʌ lum ti wen bʌ lum cha'an uts'at mi' yʌc' i wut che' bajche' Edén i ɔʎc'ʎb la' Yum. Tijicñʎyob jini ya' bʌ añob. Mi caj i subeñoñob wocolix ɔʎʎʎ. Cabʌl mi caj i cha'leñob c'ay.

⁴ Ñich'tanla, ubinla c t'an, israelob c cha'año' bʌ. Mi caj ɔʎc' ti jajq'uel c mandar. Mi caj c cha'len meloñel ti toj ti' wut pejtél pañimil. ⁵ ʎʎc'ʎʎix i yorajlel cha'an mi' maʎlel c cha'an. ʎʎc'ʎʎix a coltantel, Israel. Mi caj c ɔʎy pejtél pañimil cha'an mi' melob i bʌ tic tojlel. Mi caj i pijtañoñob jini año' bʌ ti lum joyol bʌ ti ja'. Mi caj i ñopoñoñob. ⁶ Letsan la' wut ti panchan. Q'uelela jini lum ja'el. Jini panchan mi caj i sac jilel che' bajche' but's!. Jini pañimil mi caj i tsuculiyel che' bajche' pisil. Jini ya' bʌ chumulob jomocñʎyob mi caj i chamelob. Pero jini coltabilo' bʌ c cha'an mi caj i yajñelob ti pejtelel ora. Mach jilic c yumʌntel ti pejtelel ora.

⁷ Ñich'tanla c cha'añet bʌ la, mu' bʌ la' mel chuqui toj, mu' bʌ la' p'is ti la' wenta j ɔʎntesʎbal. Mach la' bʌc'ñan winicob yujilo' bʌ a'leya. Mach la' mel la' pusic'al che' mi' p'ajetob. ⁸ Come mi caj i jilelob che' bajche' pisil mu' bʌ i c'ux ts'islum, che' bajche' i tsutsel tiñʎme mu' bʌ i c'ux motso'. Pero mux i yajñel ti pejtelel ora jini woli bʌ j coltan. Mij coltan winicob yic'ot i yalobilob ti lajm ti lajm. Che' tsi' yʎʎʎ lac Yum.

⁹ Caña a wut c Yum, caña a wut, wa'i' yic'ot cabʌl a p'ʎʎʎʎlel che' bajche' ti wajali. Jatet tsa' tsʎnsa jini colem bʌ ajin, jiñʎch Egipto. ¹⁰ Jatet tsa' tiquesa colem ñajb. Tsa' jamʎ bij ti

ja' ba' tsa' ñumiyob jini tsa' ba a mañayob. ¹¹Che' mi' sujtelob jini coltabilobix ba i cha'an lac Yum mi' cajelob ti c'ay. Jini mu' ba i sujtelob ti Jerusalén mi' caj i yaq'uentelob i tijicñayel i pusic'al mach ba yujilic jilel. Junyajel tijicñayob. Mi' caj i lajmel pejtel wocol. Ma'anix ch'ijiyem ba.

¹²Joñon la' Yumon. Mic ñuq'uesabeñetla la' pusic'al. Mi' caq'ueñetla la' tijicñayel. ¿Yom ba mi' la' bac'ñan winicob yujilo' ba chamel? ¿Mach ba lajalobic bajche' pimel? ¹³Tsa'ix a ñajatesa a Yum tsa' ba i meleyet, tsa' ba i lich'choco panchan, tsa' ba i xuc'choco jini pañimil ti' yajñib. Jini cha'an tsiltsilñayet ti baq'uen ti' tojlel a contra mu' ba i mich'leñet, mu' ba i tilel i tsansañet. ¿Yom ba ma' chan bac'ñan winicob ti jujump'ejl q'uin? ¹⁴Mach jalix mi' caj i loq'uelob ti libre jini cacchalo' ba ti wocol. Ma'anic mi' caj a chamel ti majquibal mi' ti wi'ñal. ¹⁵Joñon a Yum Dios, i Yumon Panchan yic'ot Pañimil. Jiñach j c'aba. Tsac t'oxo colem ñajb. Tsac tiquesabeyet bij ti ojlił walacña ba ja'. ¹⁶Tsa'ix c lich'i panchan. Tsac xuc'choco jini pañimil ti' yajñib. Tsa'ix cotsa c t'an ti a wej cha'an ma' sub. Tsaj cantayet tic p'atlel. Tsac sube Sion: "Jatet c tejclumet". Che' tsi' yał lac Yum.

¹⁷Ch'ojyen Jerusalén, caña a wut. Tsa'ix a wubi i mich'ajel lac Yum. P'ump'un tsa' caleyet che' bajche' xyal'ajel mach ba mejlix ti xambal che' ba tsa'ix i lu' jisa lembal. ¹⁸Ti pejtelel a walobilob ma'anic mi' juntiquilic mu' ba mejlel i toj'esañet majlel. Ti pejtelel a walobilob tsa' ba a cosayob ma'anic mi' juntiquilic mu' ba i chuquet majlel ti a c'ab. ¹⁹Jini cha'chajp wocol tsa' tili ti a tojlel: i jisantel a chuba'an yic'ot wi'ñal. Tsa' laj jili a pi'lob. Lamital tsa' chamiyob ti wi'ñal. Lamital tsa' tsansantiyob ti guerra. ¿Majqui mi' caj i puñtañet? ¿Majqui mi' mejlel c choc tilel cha'an mi' ñuq'uesabeñet a pusic'al? ²⁰Ma'añobix i p'atlel a walobilob. Pam chocbilob ti' xujc tac calle che' bajche' bate'el ts'i' tsa'ix ba yajli ti yac. Laj lojwemob cha'an i mich'ajel lac Yum, cha'an woli' ya'leñet a Dios.

²¹Jini cha'an ñich'tan c t'an. P'ump'uñet jax. Yaquet, pero mach cha'anic lembal. ²²Lac Yum Dios jiñach mu' ba i cantan i cha'año' ba. Lac Yum woli' yał: Q'ueleyon. Wolix i cha' lajmel c mich'ajel am ba ti a tojlel. Ma'anix mi' caj a chan ubin c mich'ajel. ²³Pero mi' caj caq'ueño' i yubiño' c mich'ajel jini

tsa' bΛ i yΛc'lyet ti wocol, tsa' bΛ i tic'layet, tsa' bΛ i t'uchtayet. Tsa' ñumiyob ti a pat che' bajche' ti calle, che'en.

Dios mi caj i yΛc' ti coled Jerusalén

52 Ch'ojyen, ch'ojyenla añet bΛ la ti Jerusalén. Wen p'ump'un tsa' ajniyetla. P'Λtesan la' bΛ. ΛΛPΛX la' pislel, jini c'ax uts'at bΛ, cha'an mi la' wajñel ti ch'ujul. Mach chΛn talobix jini xmulilob mach bΛ i cΛñayobic Dios. ²Ch'ojyenla, tijcanla i lumil la' woc ya' ba' cΛchΛletla, Jerusalén. Loq'uenla ti libre. Loc'sanla jini lazo.

³Lac Yum woli' yΛl: Tsa' wersa pΛjyiyetla ba'an yambΛ la' yum pero ti majtan jach. Ma'anic la' tojol. Jini cha'an mach ti taq'uinic mi caj c cha' mΛñetla che' mij coltañetla. ⁴Ti wajali tsajniyob ti chumtΛl ti Egipto c winicob. Ti wi'il jini asirijob tsa' caji i to'ol tic'lañob anquese ma'anic i mul. ⁵WΛle, ¿chuqui woli' q'uel? Tsa' to'ol pΛjyiyob majlel c cha'año' bΛ. Tsa' tic'Λntiyob. I yumob tsi' chañ'esayob i bΛ. Mi' p'ajob j c'aba' ti jujump'ejl q'uin. ⁶Pero che' mic tsictesan c p'ΛtΛlel, wersa mi caj i cΛñon c tejclumob. Mi caj i ña'tañob JoñoñΛch mu' bΛ c pejcañob. JoñoñΛch, che'en.

⁷Wen uts'atax ya' ti pam wits i yoc jini mu' bΛ i tilel cha'an mi' tsictesan jini Wen T'an, cha'an mi' tajob i ñΛch'tΛlel i pusie'al yie'ot i coltΛntel jini año' bΛ ti Sion, cha'an mi' ña'tañob woli ti yumΛntel lac Dios. ⁸¡Ñich'tanla! C'am woliyob ti t'an xcΛntayajob la' cha'an. Wen c'am mi' cha'leñob oñel cha'an tijicñayob. Come mi caj i q'uelob lac Yum woli bΛ i cha' lac'tiyel tilel ti Sion. ⁹Cha'lenla c'am bΛ oñel añet bΛ la ti Jerusalén. Yom tijicña la' pusie'al cha'an tsa' mΛjli la' cha'an. Mach chΛn t'uchtΛbiletix come lac Yum tsa'ix i cha' p'unta i cha'año' bΛ. Tsa'ix i cha' mΛñΛ jini año' bΛ ti Jerusalén. ¹⁰Lac Yum tsa'ix i pΛsΛ ch'ujul bΛ i c'Λb ti' wut pejtelel tejclum. Ti pejtelel pañimil mi' caj ti tsictiyel laj coltΛntel tilem bΛ ti lac Dios.

¹¹Loq'uenla ti Babilonia, c pi'Λlob. CΛyΛla pejtelel i mul jini año' bΛ ti pañimil. Mach yomic mi la' tΛl chuqui tac bibi'. SΛq'uesan la' bΛ jatetla mu' bΛ la' cuch majlel i latu tac lac Yum. ¹²Come ma'anic mi caj la' loq'uel ti ajñel. Ma'anic mi caj la' puts'el loq'uel. Come ñaxan mi' majlel lac Yum ti la' tojlel. Mi' cΛntañetla majlel ti la' pat i Dios Israel.

Isaías tsi' wɔn subu i wocol jini Mesías

¹³Q'uele c Winic. Uts'at bajche' mi caj i mel ti cabɔl i ña'tɔbal. Mi caj i wa'chocontel ti chan. Mi caj i yajñel ti ñuc. ¹⁴Tsa' toj sajtiyob i pusic'al cabɔlob che' bɔ tsi' q'ueleyob. Wen lojwen i wut c'ɔlɔl mach chɔn cɔñɔlix mi winic. Ñumen lojwen i bac'tal bajche' yaño' bɔ winicob. ¹⁵Che' jini mi caj i mulbeñoob ti' ch'ich'el cabɔl winicob x'ixicob ti yan tac bɔ lum. Jini yumɔlob ñach'ɔlix mi caj i cɔytɔlob ti' tojlel jini winic. Come ma'anic tsa' subentiyob chucoch tsa' tic'lanti, pero che' mi' q'uelob mi caj i ch'ɔmbeñoob isujm jini mach bɔ anic tsi' yubiyob.

53 ¿Majqui tsi' ñopo jini tsa' bɔ lac subu? ¿Majqui tsi' q'uelbe i p'ɔtɔlel lac Yum tsa' bɔ tsictiyi? Ma'anic jaytiquil. ²Tsa' coli ili Winic ti' tojlel Dios che' bajche' i buts i wi' te' mu' bɔ i pasel ti tiquin lum ba' mach wenix. Ma'anic bajche' yilal. Mach la comic laj q'uel. Che' mi laj q'uel jini winic, mach i t'ojolic mi laj q'uel. Ma'anic mi laj c'uxbin. ³Ts'a'lebil ti winicob x'ixicob, cɔybil ja'el. Cabɔl tsi' yubi ch'ijiyem bɔ yic'ot wocol. Tsa' lac mɔyɔ lac wut cha'an ma'anix mi lac chɔn q'uel. Che' ts'a'lebil jini winic ma'anic tsa' lac p'isi ti wenta.

⁴Isujm tsi' cuchu lac wocol. Tsi' cuchbeyonla i ch'ijiyemlel lac pusic'al. Tsa' lac lon ña'ta Dios woli' yɔq'uen i toj i mul. ⁵Pero tsa' jejq'ui cha'añoonla cha'an tsa' lac ñusɔbe i mandar Dios. Tsa' jajts'i cha'an lac mul. Tsi' yubi tojmulil cha'an mi' yɔq'ueñoonla i ñach'tɔlel lac pusic'al. Lajmesɔbilonla cha'an tsa' yɔx'a i bac'tal. Tsi' bajbeyob ti asiyal. ⁶Ti pejtelonla tsa' sajtiyonla che' bajche' tiñame'. Tsa' lac bajñel yajca lac bijlel ti jujuntiquilonla. Lac Yum tsi' yotsa ti' wenta cha'an mi' toj lac mul.

⁷Tsa' tic'lanti, tsi' peq'uesa i bɔ. Ma'anic tsi' cha'le t'an. Tsa' pɔjyi ti tsɔnsɔntel che' bajche' aɔl tiñame'. Ñach'ɔl che' bajche' tiñame' ti' tojlel jini mu' bɔ i tsepben i tsutsel. Ma'anic tsi' cha'le t'an. ⁸Tsa' tic'lanti, tsa' ñumi ti meloñel, tsa' pɔjyi majlel cha'an mi' yɔjq'uel ti chɔmel. ¿Majqui tsi' wis ña'ta mi woli' tsɔnsɔntel cha'an i mul c tejlumob? Tsa' ajq'ui ti wocol, tsa' jajts'i cha'an i mul winicob x'ixicob. ⁹Ma'anic tsi' cha'le jontolil. Ma'anic tsi' cha'le lot. Che' bɔ tsa' chɔmi tsi' mucuyob che' bajche' xjontolil ti mucoñibal i cha'an wen chumul bɔ.

¹⁰Anquese tsa' tic'lanti ti' c'ab winicob, che'ach yom i pusic'al lac Yum. Lac Yum tsi' yalq'ue i yubin ch'ijiyem ba. Che' ba tsa'ix i yac'la i ba ti chamel i wenta tsansabil ba i majtan Dios cha'an mi' toj mulil, mi caj i q'uel i p'olbal. Cuxul mi caj i yajñel ti pejtelel ora. Ti' caj i ye'tel mi caj i yujtel ti uts'at chuqui yom lac Yum. ¹¹Mi caj i taj i tijicñayel i pusic'al cha'an tsi' colta cablob, cha'an tsa' majli i cha'an che' ba tsi' yubi wocol. C winicach jini toj ba. Che' cambilix i cha'an winicob mi caj i yac'ob ti q'uejlel ti toj, come i bajñel mi caj i cuchbeñob i mul. ¹²Jini cha'an mi caj calq'uen cabal i ñuclel ti' tojlel winicob. Mi caj i yalq'uentel i chobejtabal yic'ot jini p'at'alo' ba cha'an i tem cha'añob jach mi' majlel, come tsi' yac'la i ba ti chamel. Tsa' ajq'ui ti toj mulil che' bajche' xñusa mandar. Tsi' cuchbeyob i mul cablob. Tsi' c'ajtibe Dios cha'an mi' ñusabeñob i mul xñusa mandarob.

Ñuc ba i c'uxbiya lac Yum

54 Cha'len c'ay, to'ol wa'alet ba x'ixic mach ba anic a walobil. Yom tijicñayet. Cha'len c'ay ti pejtelel a pusic'al jatet Jerusalén, mach ba anic tsa' cha'le bajq'uel. Come ñumen mi caj a mec' a walobil bajche' jini am ba i ñoxi'al. ²Ñuq'uesan a wotot. Mach a bac'ñan a tam'esan i lejch'il pisil ba a wotot. Sats'ben i ch'ajñal. Tsats yom ma' ts'apben i yoyel tac. ³Come mi caj a p'ojlel ti a ñoj yic'ot ti a ts'ej. Jini a p'olbal mi caj i ch'amob cabal tejclum ti' tojlel gentilob. Mi caj i ch'ambeñob i ye'tel i yumob.

⁴Mach a cha'len baq'uen, come ma'anic mi caj a wajq'uel ti quisin. Ma'anic mi caj i p'ajetob. Mi caj i ñajayel a cha'an a quisin tsa' ba a wubi che' xch'oquet to. Ma'anix mi caj i chan c'ajtiyel a cha'an a wal'entel cha'an meba'et. ⁵Come lac Yum mi caj i payet cha'an i yijñam. Jiñach i Yum Panchan yic'ot Pañimil. Che'ach i c'aba'. Jini Xcoltaya a cha'an jiñach Ch'ujul Ba i cha'an Israel. I Diosach pejtet pañimil. ⁶Ch'ijiyemet tsi' tajayet lac Yum. Lajalet bajche' x'ixic claybil ba cha'an i ñoxi'al, che' bajche' x'ixic chocbil ba che' xch'oc to. Tsi' cha' playayet. ⁷Woli' yal: Poj jumuc' jach tsaj clayayet, pero ti wi'il mi caj c cha' payet ti' yutsllel c pusic'al. ⁸Jumuc' jach tsa' mich'ayon. Jumuc' jach tsac mucu c ba ti a tojlel, pero mi caj c p'untañet ti pejtelel ora ti cabal c'uxbiya, che'en lac Yum

tsa' bΛ i mañayet. ⁹Woli' yal ja'el: Che' bajche' tsa cΛc'Λ c t'an ti' yorajlel Noé cha'an mach chΛn talix but'ja' ti pañimil ti pejtelel ora, che' ja'el wolic subeñet ma'anix mi caj c chΛn mich'leñet. Ma'anix mi caj cΛ'leñet. ¹⁰Anquese mi' ñijcan i bΛ wits, anquese mi' q'uex i yajñib, anquese mi' jejmel bujtΛl tac, ma'anix mi caj j cΛyet. Mach q'uextΛyic j c'uxbiya cha'anet. Mach q'uextΛyic jini xuc'ul bΛ t'an tsa' bΛ c mele quic'otet cha'an ñΛch'Λl mi' yajñel a pusic'al, che'en lac Yum mu' bΛ i p'untañet.

Tsiji' bΛ Jerusalén

¹¹P'ump'un a bΛ, jats'bilet bΛ cha'an tsats bΛ ic'. Ma'anic majch mi' ñuq'uesΛbeñet a pusic'al. Mi caj j c'Λn zafiro cha'an mic cha' melbeñet a buchlib tac. Mi caj j c'Λn i t'ojol jax bΛ xajlel cha'an mic mel a wotot. ¹²Pejtelel i jol yic'ot i ti' a wotot, yic'ot a cayajon mi caj c mel ti wen i t'ojol tac jax bΛ xajlel. ¹³Mi caj j cΛntesan pejtel a walobilob. Mi caj cΛq'ueñob i ñΛch'tΛlel i pusic'al mach bΛ yujilic jilel. ¹⁴Mi caj a wΛq'uentel toj bΛ a pusic'al, cha'an xuc'ul ma' wajñel. Ma'anix majch mi caj i chΛn tic'lañet. Jini cha'an mach a cha'len baq'uen. Tsa'ix lajmi bΛbaq'uen bΛ. Ma'anix mi caj i chΛn tajet. ¹⁵Mi tsi' tempayob i bΛ xletojob cha'an mi' contrañiñet, mach chocbilobic tilel c cha'an. Mi yomob leto mi' cajelob ti yajlel. Mux caj i mañlel a cha'an. ¹⁶Q'uele joñon tsac mele jini xcuj tsucu taq'uin mu' bΛ i chΛq'uesan c'ajc cha'an mi' mel e'tijibal. Che' ja'el mic chajpan soldadojob cha'an mi' cha'leñob jisaya. ¹⁷Pero woli cΛq'ueñet c t'an, ma'anic mi junchajpic e'tijibal cha'an guerra mu' bΛ mejlel i jisañet. Mi caj a tsictesΛbeñob i mul jini mu' bΛ i cha'leñob jop't'an ti a contra. Jiñach i chobejtΛbal mu' bΛ caj i yΛq'uentelob i winicob Dios. Jiñach a wenlel mu' bΛ cΛq'ueñet, che'en lac Yum.

I yΛc'bal lac Yum

55 Yom ma' jal'an jumuc', majqui jach an i tiquin ti'. La' tilic i jap ja' mu' bΛ cΛc'. Jini mach bΛ añobic i taq'uin, la' tilicob i c'ux waj i jap vino yic'ot lech ti' majtan jach. ²¿Chucoch mi la' to'ol jisan la' taq'uin ti' mañol jini mach bΛ wajic? Woli ti to'ol jilel la' taq'uin che' wiñayetla. Ñich'tanla c t'an. Che' jini mi caj la' c'ux wen bΛ i bal la' ñΛc'.

Mi caj la' tijicñesan la' pusic'al yic'ot sumuc tac ba i ba la' ñac'. ³La'la ba' añon. Ubinla c t'an. Ñich'tañonla cha'an chlan cuxul mi la' wajñel. Mi caj c mel xuc'ul ba t'an la' wic'ot. Mi caj c p'untañetla. C'ux mi cubiñetla che' bajche' tsaj c'uxbi David. ⁴Tsac wa'choco David ti testigo ti' tojlel c tejclum. Tsac wa'choco ti yumal yic'ot ti xclantesaya ti' tojlel cabal tejclum tac mach ba la' pi'lobic. ⁵Jatet ja'el mi caj a palybeñon tilel yamba tejclumob mach ba i clñayñoñob, yic'ot yaño' ba winicob mach ba a pi'lobic. Ajñel mi caj i tilelob ba' añet cha'an mi' clñob a Yum Dios, jini Ch'ujul Ba ti Israel, come tsa'ix i ñuq'uesayet.

⁶Sajcanla lac Yum che' mu' to mejlel ti tajtal. Palyala che' lac'al to an. ⁷La' i clay i mul jini xjontolil. Jini mach ba tojic la i clay i ña'tan jontolil. La' i sutq'uin i ba ti lac Yum, come mi caj i p'untan. Mi caj i ñusaben i mul ti pejtelel i pusic'al. ⁸Come mach lajalic mi la' ña'tan bajche' wolic ña'tan. Mach lajalic la' bijlel bajche' c bijlel, che'en lac Yum. ⁹Wen chan jini panchan. Mach la' tajayic i chanlel. Che' ja'el c bijlel ñumen chan bajche' la' bijlel. Mic ts'actesan pejtel mu' ba c ña'tan c mel. Mach mejlic la' ch'amben i sujmllel jini mu' ba c ña'tan.

¹⁰Jini ja'al yic'ot i ña'al tsañal mi' yajlel tilel ti panchan. Ma'anix mi' chlan sujtél. Mi' laj ch'ach' jini lum. Che' ach'ix jini lum mi' coel pac'abal. Mi' yac' i wut. Mi' cha'leñob pac' winicob cha'an mi' tajib chuqui mi' c'uxob. ¹¹Che'ach ja'el c t'an mu' ba c sub. Mach lolomic jach. Mach to'o sujtic. Mi' mel chuqui tac com. Mi' jolontesan i ye'tel tsa' ba clq'ue i mel.

¹²Mi caj la' wajñel ti' tijicñayel la' pusic'al yic'ot ti la' ñach'talel. Jini wits yic'ot bujtal tac mi' cajel ti c'ay yubil ti' tojel la' wut. Jini te' tac mi caj i jats'ob i c'ab cha'an tijicña pañimil. ¹³Ya' ba' tsa' coli ch'ix mi caj i coel taj. Ya' ba' tsa' coli ich'ite' mi caj i coel mirto te'. Ti pejtelelob mi caj i subob i ñuclel i c'aba' lac Yum. Mi caj i yac'ob ti cajñel lac Yum ti pejtelel ora.

I tijicñayel mu' ba i jac' xuc'ul ba i t'an Dios

56 Jiñach woli ba i yal lac Yum: Melela chuqui toj yic'ot chuqui uts'at, come wolix i lac'tiyel i yorajlel cha'an mij coltañetla. Mi caj j coltañetla ti ñuc ba c p'atlel ti' tojlel la' contrajob. ²Tijicña jini winic mu' ba i xuc'chocon i ba ti'

melol pejtelel c mandar, mu' bΛ i p'is ti' wenta i q'uiñilel c'aj o, mu' bΛ i chΛΛ tsajin i bΛ cha'an ma'anic mi' mel jontolil.

³Che' mi' ñop lac Yum jini ch'oyol bΛ ti yambΛ lum, mach yomic mi' lon al: “Parte mi' yΛc'on lac Yum, parte mi' yΛc' i cha'año' bΛ”. Jini winic mach bΛ mejlic i cha'len ñujpuñel mach che'ic yom mi' ña'tan, come c cha'añach ja'el.^c ⁴Jini winic mu' bΛ i p'is ti' wenta i q'uiñilel c'aj o, mu' bΛ i mel jini com bΛ, mi xuc'ul mi' yajñel ti trato bΛ c t'an, ⁵an chuqui wen uts'at mi caj cΛq'uen anquese ma'anic i yalobil. Mi caj i c'uxbintel i c'aba' ti mal cotot ti pejtelel ora. Mi caj cΛq'uen i c'aba' mach bΛ yujilic jilel, yic'ot mach bΛ yujilic yajpel. ⁶Che'ach ja'el jini ñajt bΛ ch'oyolob mu' bΛ i ñopoñoob, mu' bΛ i yΛc'ob i bΛ cha'an mi' c'uxbiñoon, cha'an mi' yochel ti x'e'telob c cha'an. Mi tsi' p'isiyob ti wenta i q'uiñilel c'aj o, mi xuc'ulob mi' yajñelob ti trato bΛ c t'an, ⁷mi caj c pΛyob tilel ti ch'ujul bΛ c wits ya' ti Jerusalén. Tal i yorajlel, mi caj cΛq'uen i tijicñayelob i pusic'al ti' yotlel oración ba' mi' pejcañoob. Mi caj c ch'ambeñoob i yofrenda yic'ot pulbil bΛ c majtan ja'el, come jini cotot mi caj i pejcantel ti' yotlel oración i cha'an winicob x'ixicob ti pejtelel lum tac. ⁸Che'ach woli' yΛ lac Yum Dios mu' bΛ caj i cha' much'quin jini israelob ba' pam pujquemob. Mi caj c pΛy tilel yaño' bΛ ja'el mach bΛ israelobic, che'en lac Yum.

I tic'ol jontol bΛ xcΛntaya

⁹Pejtelel bate'el, la'la ti jisaya. La' jisan c tejclum. ¹⁰Come laj xpots'ob jini xcΛntayajob, jini x'alt'añoob tic tejclum. Ma'anic chuqui mi' q'uelob. Lajalob bajche' uma' bΛ ts'i' mach bΛ yujilic woj, met wΛyΛlob jach bΛ. Mi' wen mulañoob wΛyel. Ma'anic mi' ña'tañoob che' an bΛbΛq'uen bΛ ti' tojlel c tejclum. ¹¹Lajalob bajche' wi'ñal bΛ ts'i' mach bΛ muq'uic i ñaj'an. Ma'anobic i pusic'al jini xcΛnta tiñΛme'ob. Ti jujuntiquilob mi' bajñel ña'tañoob chuqui yomob. Mi' bajan saclañoob i wenlel. ¹²Mi' yΛlob: Conla c saclan vino cha'an mi lac yΛc'an. Ijc'Al mux lac cha' mel che' bajche' wΛle, pero ñumeñix, che'ob.

57 Jini toj bΛ winic mi' chΛmel. Ma'anic majch mi' c'o'otan. Jini xuc'ul bΛ winicob mi' chΛmelob che' maxto i yorajlelic. Jini cuxulob to bΛ ma'anic mi' wis ña'tañoob pΛybil jini toj bΛ i cha'an Dios ba' mach i q'ueleyic jini wocol

mu' bA caj i tilel ti' tojlelob. ²Mi' tajob i ñach'talel i pusic'al jini tojo' bA mu' bA i chAmelob. Mi' c'ajob i yo.

I ts'a'lentel jini mu' bA i ch'ujutesan dioste'

³Lac'tesan la' bA, i yalobilob xwujt yic'ot jini mu' bA i cha'leñob ts'i'lel. ⁴¿Majqui woli la' wajlen? ¿Chucoch leco mi la' mel la' wut tic tojlel? Mi la' cha'len pex'ej. ¿Mach ba i yalobileticla xmulilob yic'ot xlotob? ⁵Mi la' xic' la' bA ti mulil ti' yebal c'ololte' ya' ba' mi la' ch'ujutesan dioste' tac. Mi la' tsAnsán aAllob ya' ti' ti' pa' yic'ot ya' ba' lech'el xajlel, cha'an mi la' wAc' majtañAl. ⁶Ma' ch'ujutesan jini melbil tac bA xajlel an tac bA ti joctAl. Ma' bec'ben vino. Ma' wAq'uen trigo yic'ot waj cha'an i majtan. ¿Mu' ba caj j q'uelet ti uts'at che' jini?

⁷Ti chan bA wits tsa' cha'le ts'i'lel, ya' ba' ma' ch'ujutesan dioste' tac. Tsa' cAyAyon cha'an ma' wAq'uen pulbil bA i majtan. ⁸Ti' xo'talel a wotot yic'ot ti' ñAc' oy tsa' mucu i yejtal a dios. Tsa' ñajatesayon. Tsa' tam'esa a wayib ti a ts'i'lel, come wolix a c'uxbin dioste' tac. Ma'anic woli a c'uxbiñon. ⁹Tsa' boño a bA ti perfume cha'an uts'at ma' q'uejlel. Tsa'ix a ch'Ambe majlel aceite yic'ot perfume jini dios i c'aba' Moloc. Tsa' choco majlel suboñelob ti ñajtal cha'an ma' ñopben i p'Atalel xiba. Tsa' bib'esa a bA cha'an ma' taj yan tac bA dios. ¹⁰Tsa' lujbayet cha'an cabal tsa' xoyo a bijlel. Ma'anic tsa' ña'ta mi sajtemet, mi lolom jach chuqui wola' mel. Tsa' cha' taja a wersa, come ma'anic chuqui anto yom a cha'an. Jini cha'an ma'anic tsa' cAyA a jontolil.

¹¹¿Chucoch mach chAn xuc'uletix quic'ot? ¿Majqui wola' bAc'ñan? ¿Chucoch ma'anix ma' p'ison ti wenta? ¿Cha'an ba uts mic pas c bA ti a tojlel? ¹²Mi caj j cAntesañet bajche' mi' caj ti ujtel mu' bA a mel, mu' bA a bajñel ña'tan ti a pusic'al. Ma'anic mi caj j coltañet ti' melol. ¹³Che' ma' c'ajtin a coltAntel ti oñel, la' i coltañet a dioste'. Mi caj i laj wejlan majlel ic'. Ti junñumel jach ic' mi caj i sac jilelob. Pero jini xuc'ul bA quic'ot mi caj i yochel ti' yum jini lum. Mi caj i yajñel ti jini Ch'ujul bA c Wits ba' mi caj i yubiñob i tijicñayel i pusic'al cha'an pejtelel chuqui mi caj i yAq'uentelob ti Dios.

Castigo yic'ot i lajmesantel Israel

¹⁴Mi caj i yubintel jini t'an: "Melela bij. Chajpanla wen toj ba bij. Loc'sanla pejtel woli ba i mactan cha'an mi' sujtelob c cha'año' ba tsa' ba cajchiyob majlel". ¹⁵Jini cuxul ba ti pejtelel ora, Ch'ujul Ba i c'aba', woli i yał: Joñon chumulon ti chan ti Ch'ujul ba Cajñib, pero wa' chumulon ja'el yic'ot jini mu' ba i mel i ba ti pec', yic'ot jini am ba i wocol. Mic ñuqu'esaben i pusic'al jini uts ba. Mi caq'uen i tijicñayel jini am ba ti c'oj'ol. ¹⁶Mach ti pejtelic ora mi caj c chan tiq'uet cha'an a mul. Mach chan mich'onix ti pejtelel ora. Mi' caj ti lajmel c mich'ajel. Machic mi' lajmel mi' laj jilelob winicob x'ixicob tsa' ba c mele. ¹⁷Cha'an i wo'lel ti chubla'añal tsa' jumuc' mich'ayon. Tic mich'ajel tsac lowoyob. Tsac mlybeyob c wut. Tsi' xoyoyob i bijlel. Tsi' meleyob chuqui tac jach yomob. ¹⁸Tsaj q'uele pejtel i melbal. Pero wale mi caj c ts'acañoob ti' yutslel c pusic'al. Mi caj c toj'esañoob majlel. Mi caj caq'uen i ñach'talel i pusic'al jini ch'ijiyemo' ba mu' ba i melob i ba cha'an i mul. ¹⁹La' ñach'lec i pusic'al jini ñajt ba añoob yic'ot jini lac'al ba añoob. Joñon mi caj c lajmesañoob. ²⁰Pero jini mu' ba i contrajijñoob lajalobach bajche' colem ñajb, mu' ba i wec'ulan i ba, mach ba ñach'allic an. Mi' yał' ti tejchel i lumil yic'ot i bibi'al. ²¹Mach i tajayobic i ñach'talel i pusic'al jini jontolo' ba, che'en Dios.

Jini mero isujm ba ch'ajb

58 Cha'len c'am ba oñel. Mach a cha'len baq'uen. Cha'len t'an che' bajche' trompeta. Tiq'ui c cha'año' ba cha'an i mul. ²Ti jujump'ejl q'uin mi' saclañoñoob yilal. Tijicñayob cha'an cantesabilob tic bijlel. Mi' lon pasob i ba che' bajche' winic toj ba i melbal xuc'ul ba i pusic'al quic'ot. Mi' c'ajtibeñoob i cantesantel ti mandar. Tijicñayob mi' ñochtañoñoob. ³Mi' subeñoob: Lolom jach mic cha'len lojon ch'ajb. Caxti muqu'ic a q'uel. ¿Chucoch mic lon tic'lan c ba ti cabal wocol che' ma'anic ma' p'ison lojon ti wenta? che'ob. Pero ti' q'uiñilel ch'ajb mi la' mel chuqui mi la' bajñel ña'tan ti la' pusic'al. Mi la' to'ol c'an ti wocol e'tel jini x'e'telob la' cha'an. ⁴Ti' yorajlel ch'ajb mi la' cha'len a'leya. Mi la' cha'len jats' cha'an jontol la' pusic'al. Che' mi la' lon cha'len ch'ajb ma'anic chuqui mi la' c'ajtibeñon ti wocol t'an cha'an mi cubin ya' ti panchan. ⁵¿Tsa' ba c subeyetla

cha'an mi la' cha'len ch'ajb che' bajche' iliyi? ¿Uts'at ba mij q'uel che' ma' lij a ba che' bajche' ac', che' ma' lap coxtal, che' ma' wac' ti a pam i tinil c'ajc? ¿Jimba iliyi i q'uiñilel ch'ajb mu' ba c mulan? Mach jinic. ⁶Jini ch'ajb mu' ba c mulan jiñach che' ma' c ay a tic'lan a pi'lob. Yom ma' mel chuqui uts'at ti' tojlel x'e'telob a cha'an. Ac'la ti coel jini woli ba i yubiñob i tic'lantel. Tuc'u cadena tac mu' ba' i cacchet. ⁷Yom ma' t'oxbeñob i bal a ñac' jini wi'ñayo' ba. P ay a ochel ti a wotot jini mach ba anic i yotot. Aq'ueñob i pislel jini mach ba añobic i cha'an. Mach yomic ma' mujcun a ba che' mi' tilelob i c'ajtin chuqui yomob a pi'lob jump'ejl ba a tat a ña'.

⁸Mi che'ach ma' cha'len ch'ajb bajche' iliyi, mi caj cac' ti wen lejmel a c'ac'al che' bajche' i saclel pañimil che' ti sac'ajel. Mi caj cac' ti lajmel a chamel. Mi caj i tsictiyel toj ba a pusic'al baqui jach ma' majlel. Mi caj j cantañet majlel. Joñon a Yumon. ⁹Che' jini mi caj a pejcañon. Mi caj c jac'beñet. Mi caj a c'ajtibeñon a coltantel. Mi caj c subeñet: "Wa'ach añon", cho'on. C ay a tic'lan a pi'lob. C ay a a'leya yic'ot jop't'an. ¹⁰T'oxbeñob a waj jini wi'ñayo' ba. Coltan jini woli ba ti c'oj'ol yic'ot jini mach ba añobic i chub'an. Che' jini mi' caj a wubin i tijicñayel a pusic'al. Lajalet bajche' c'ajc ya' ba' ic'yoch'an. Mi' caj ti sac jilel a wocol che' bajche' axñal ti xinq'uiñil. ¹¹Ti pejtelel ora mi caj c toj'esañet majlel. Mi caj caq'ueñet i bal a ñac' ya' ba' tiquin pañimil. Mi caj c tsijibtesan a p'atlel. Lajal mi caj a wajñel che' bajche' pac'abal mulbil ba ti ja', che' bajche' i loq'uib ja' mach ba anic mi' tiquin. ¹²A walobilob mi caj i cha' wa'chocoñob jini tejclum tac tsa' ba jejmi ti yamba ora. Mi caj i cha' ña'tañob i cantesabal i ñojte'elob tsa' ba caq'ueyob. Mi caj a cañel che' bajche' jini wen yujil ba i wa'chocontel ts'ajc che' jejmen. A wujil i cha' melol bij.

¹³Mi ñuc ma' q'uel i q'uiñilel c'aj o, mi ma'anic ma' mel chuqui ma' bajñel ña'tan a mel, mi tijicña ma' q'uel i q'uiñilel caj o che' ma' wac'on ti c'uxbintel, mi muc'ach a quep c ay a we'tel, yic'ot jini mu' ba i bajñel mulan a pusic'al, yic'ot to'ol t'an cha'an ma' wac' ti ñuc jini q'uin, ¹⁴che' jini mi caj a taj a tijicñayel tic tojlel. Mi caj caq'ueñet a p'atlel cha'an mi' majlel a cha'an ti' tojlel cabal tejclum tac. Mi caj caq'ueñet a ch'amben pejtet jini tijicña ba tsa' ba c wan sube Jacob. A Yumon. Tsa'ix c subeyet. Che' tsi' yala lac Yum.

Castigo cha'an i mul Israel

59 Ma'anic woli ti jilel i p'at'alel lac Yum. Wen yujil i coltañetla. Mi' yubiñetla che' mi la' pejcan. ²Pero jini la' mul tsa'ix i t'ats'ayetla ba' ma'anic mi la' q'uel. Ti' caj la' mul lac Yum tsi' m'aya i wut ba' ma'anic mi' yubiñetla. ³Laj p'ajq'uem ti ch'ich' la' c'ab. I yal la' c'ab laj p'ajq'uem ti jontolil. Mi la' cha'len lot. Mi la' sub chuqui tac jontol. ⁴Ma'anic majqui yom toj ba' meloñel. Mi la' mulan lot. Mi la' sub chuqui mach isujmic. Mi' tejchel mulil ti la' pusic'al. Mi' xiq'uet ti jontolil. ⁵Mi' p'ojlel la' mul che' bajche' i tun lucum. Che' bajche' mi' chajpan i jalbal am, che'ach mi la' chajpan la' ba' cha'an mi la' chuc la' pi'lob. Mi' caj ti ch'amel jini mu' ba' i ñopetla. ⁶Mi la' cha'len xujch'. Mi la' chilbeñob i chub'a'an la' pi'lob. Pero ma'anic mi' coltañetla come jontol la' melbal. Mi la' p'ol wocol ti pejtelel la' melbal. Mi la' c'an la' c'ab cha'an jontolil. Ba'xetla ti jontolil. ⁷Ti ajñel mi la' majlel la' mel jontolil. Mi la' tsansan jini winic mach ba' anic i mul. Mi la' wan ña'tan lotiya yic'ot xujch'. Baqui jach mi la' majlel mi la' cha'len jisaya. ⁸Mach la' cañayic i bijlel i ñach'tilel la' pusic'al. Mach la' wujilic chuqui toj. Tsa'ix la' xoyo la' bijlel. Majqui jach mi' cha'len xambal ti ili bij mach i tajayic i ñach'talel i pusic'al.

⁹Jini cha'an ñajt añetla ba' añon. Mach la' tajayic chuqui toj. Tsa' la' pijta i saclel pañimil, pero tal jach ac'alel. Ic'yoch'an jax pañimil ba' woliyetla ti xambal. Ma'anic mi la' taj la' colt'antel. ¹⁰Mi la' tajtan majlel pajc' che' bajche' xpots'. Sajtemetla ti la' mul che' bajche' jini mach ba' anic i wut. Mi la' p'ojquin la' woc ti xinq'uiñil che' bajche' ti ac'alel. Lajaletla bajche' xch'amel ti ic'yoch'an ba' pañimil. ¹¹Ca'acña la' bic' che' bajche' bajlum che' mi la' lon pijtan chuqui toj, pero mach talic. Jañacñayetla che' bajche' x'ujcuts, mi la' pijtan la' colt'antel ti Dios, pero ñajt an ba' añetla. ¹²Cabalix la' mul ti' wut Dios. Mi' tsictesañetla cha'an xmuliletla.

Isujm, la' cujil xmulilonla. ¹³La' cujil mach xuc'ulonicla ti lac Yum. Tsa' lac ñusabe i t'an. Ma'anic tsa' lac tsacle Dios. Tsa'ix laj como lac t'an cha'an mi lac cha'len contra. Tsa' lac wan ña'ta lot ti lac pusic'al. Tsa' laj cantesa yaño' ba'. ¹⁴Ma'anic majqui mi' mel winicob ti toj. Ma'anic mi' p'isob ti' wenta

chuqui tac isujm. Ma'anic mi' jac'ob chuqui tac toj. Mi' mactañob.

¹⁵MACalix jini isujm ba. P'ump'un mi' tic'lan tel jini yom ba i cly i mul. ¹⁶Lac Yum tsi' laj q'uele. Ma'anic tsi' mula come ma'anic toj ba meloñel. Tsi' q'uele ma'anic winic yujil ba coltaya. Tsa' toj sajti i pusic'al come ma'anic majqui tsi' xin otsa i ba. I bajñel tsi' yotsa i ba. Tsa' majli i cha'an. Cha'an ti' caj toj ba i pusic'al tsa' mejli. ¹⁷Lac Yum mi' majlel i cha'an ti' tojlel i contrajob cha'an toj ba i pusic'al. Tsi' chajpa i ba ti coltaya che' bajche' soldado mi' xoj i bujc cha'an guerra yic'ot i mactijib yic'ot i pixol melbil ba ti tsucu taq'uin. Tsi' pixi i ba ti mich'ajel cha'an mi' q'uextan i mul i contrajob. Bax ti' ye'tel cha'an mi' coltan i tejclumob.

¹⁸Mi caj i yaq'ueñob i toj i mul i contrajob. Mi caj i yubiñob i mich'ajel lac Yum. Mi caj i tojob i mul pejtelel mu' ba i ts'a'leñob ya' ti ñajt tac ba i lumal. ¹⁹Mi caj i bac'ñañob lac Yum ya' ba' mi' bajlel q'uin c'alal ti' pasibal q'uin. Che' mi' tilel laj contra che' bajche' but'ja'lel cha'an mi' tic'lan i tejclumob Dios, ya'an i Ch'ujlel lac Yum ti' tojlelob cha'an mi' coltañob.

²⁰Mi caj i c'otel i yaj Coltaya jini año' ba ti Sion tsa' ba i clyayob i mul, che'en lac Yum. ²¹Jiñach jini t'an mu' ba c'ay'ueñob: Jini quEspíritu mu' ba c'ay'ueñetla ma'anic mi caj i c'ayetla. Mi caj la' mulan chuqui tac uts'at. Mi caj la' ts'a'len chuqui tac mach uts'atic, jatetla yic'ot la' walobilob ti pejtelel ora. Che' tsi' yala lac Yum.

I ñuclel jini tsiji' ba Jerusalén

60 Ch'ojyenla c cha'año' ba. PASala i c'ac'al la' coltan tel cha'an mi' q'uelob pejtelel tejclum tac. Come wolix i pas i ñuclel lac Yum ti la' tojlel. ²Wen ic'yoch'an pañimil, come jini chumulo' ba ti petol pañimil ma'anic mi' c'añob Dios, pero lac Yum mi caj i pas i saclel i ñuclel ti la' tojlel. ³Cabal tejclumob mi caj i tilelob ba' añetla ba' sac pañimil cha'an mi' coltan telob. Yumalob mi caj i tajojob i tijicñayel cha'an la' ñuclel mu' ba i yaq'ueñetla la' Yum.

⁴Letsan la' wut cha'an mi la' q'uel pañimil, come talob ba' añetla mu' ba caj i yochelob ti la' walobil. Talob ti ñajtal ba' ma'anic mi' c'añob Dios. ⁵Che' mi la' q'uelob, mi caj i ñuc'an la'

pusic'al. Mi caj i toj sajtel la' pusic'al cha'an wen tijicñayetla. Mi caj i yalq'uentel Sion pejtelel i chub'a'an jini tejclum tac mach ba anic tsi' cãñayob Dios. Mi caj i cuchbeñetla tilel cabal chub'a'añal tilem ba ti ñajtal. ⁶Bajc'al caballo mi caj i c'otelob ba' añetla loq'uemo' ba ti Madián yic'ot ti Efa. Mi caj i cuchob tilel oro yic'ot pom. Mi caj i tsictesañob i ñuclel Dios. ⁷Mi caj la' walq'uentel alac'lal tac am ba ti Cedar. Mi caj i p̄ayob tilel tat tiñame' tac ch'oyol ba ti Nebaiot cha'an ma' pulbeñon. Uts'at mi caj j q'uel c majtan ya' ti pulantib*. Ti jim ba q'uin mi caj i q'uejlel ti ñuc jini Templo c cha'an che' mi cac' ti tsictiyel c ñuclel.

⁸¿Majquiyob jini motocñayo' ba talo' ba ti Israel che' bajche' x'ujcuts mu' ba i sujtel ti' ni'? ⁹Ñaxan mi' c'otelob colem barco tac loq'uemo' ba ti Tarsis. Woli' p̄ayob tilel la' walobilob loq'uemo' ba ti ñajt tac ba tejclum. Woli' cuchob tilel i chub'a'añob yic'otob. Come jini Ch'ujul Ba ti Israel tsa'ix i yalq'ueyetla la' ñuclel ti' wutob jini año' ba ti pañimil.

¹⁰Jini ñajt ba ch'oyolob mi caj i cha' wa'chocobeñetla la' tejclum tac. Jini yumalob mi caj i melob la' we'tel. Tsac lowoyetla tic mich'ajel, pero wale ti cutslel mi caj c cha' p'untañetla. ¹¹Ma'anic mi caj i ñujp'el i ti' tac la' tejclum mi ti q'uiñil mi ti ac'lalel. Jamal mi caj i yajñel cha'an mi' yochelob jini ñajt ba ch'oyolob woli ba i ch'ambeñetla tilel i chub'a'an tilem ba ti' lumal tac. Jini reyob mi caj i p'isetla ti' wenta.

¹²Jini tejclum mach ba anic mi' q'ueletla ti ñuc p'ump'un mi caj i c̄aytal. Mi caj i lu' jilelob jini mach ba anic mi' p'isetla ti wenta. ¹³Jini año' ba ti Líbano mi caj i cuchbeñetla tilel jini c'ax uts'at ba te', jini ciprés, yic'ot jini taj, yic'ot olmo, cha'an mi la' cha' mel ti uts'at jini Ch'ujul ba Ajñibal c cha'an. I t'ojol jax mi caj i q'uejlel jini Templo c cha'an ya' ba' mi cac' c ñuclel.

¹⁴Jini yumalob tsa' ba i tic'layetla mi caj i tilel i peq'uesañob i ba ti la' tojlel. Mi caj i ñoc̄talob ti la' woc pejtel tsa' ba i ts'a'leyetla. Mi' caj ti ajlel Jerusalén, "I Tejclum lac Yum", yic'ot "Jini Ñuc ba Wits i Cha'an jini Ch'ujul Ba ti Israel".

¹⁵Ma'anix mi caj c chan c̄ayetla. Ma'anix mi caj la' ts'a'lentel. Mach ti la' bajñelic mi caj la' c̄aytal. Mi caj c ñuq'uesañetla. Mi caj la' cha'len yumal ti pejtelel ora. Mach jilic la' tijicñayel ti pejtelel ora. ¹⁶Cabal reyob yic'ot cabal tejclum tac mi caj i yalq'ueñetla i chub'a'an cha'an mi la' ñaj'an ti pejtelel chuqui tac

la' wom. Che' jini mi caj la' ña'tan Yumalon, la' waj Coltayajon tsa' ba c mañayetla. Joñon jach P'atlon ti Israel. ¹⁷Mi caj caq'ueñetla chub'añal ñumen letsem ba i tojol che' bajche' la' cha'an. Ti' wentajlel bronce mi caj caq'ueñetla oro. Ti' wentajlel tsucu taq'uin mi caj caq'ueñetla plata. Ti' wentajlel te' mi caj caq'ueñetla bronce. Ti' wentajlel xajlel mi caj caq'ueñetla tsucu taq'uin. Mi caj la' mel la' we'tel ti' ñach'tilel la' pusic'al. Mi caj la' jac' chuqui toj. ¹⁸Ma'anix mi caj i chan tejchel jontolil ti la' lumal. Ma'anix wocol yic'ot jisaya ba' chumuletla. Coltabiletla cha'an la' Yum, i wentajach i ts'ajquil la' tejclum. Mi caj la' suben wocolix i yala che' mi la' wochel, che' mi la' loq'uel.

¹⁹Ma'anix i ye'tel q'uin ti la' tojlel. Ma'anix i ye'tel uw. Come añach la' c'ac'al ti q'uiñil yic'ot ti ac'lalel, jiñach la' Yum Dios mu' ba caj i chan lejmel i wenta c'ajc ti la' tojlel. Jini mi caj i yaq'ueñetla la' ñuclel ti pejtelel ora. ²⁰Ya' ba' aňetla ma'anix mi caj i chan bajlel q'uin, mi jinic uw. Come la' Yum i wentajach c'ajc la' cha'an mach ba yujilic yajpel ti pejtelel ora. Mach chan talix i ch'ijyemlel la' pusic'al. Tsa'ix ñumi la' wocol. ²¹Toj mi caj i yajñelob la' pi'glob ti jujuntiquil. Mi caj i yajñelob ti jini lum ti pejtelel ora che' bajche' c'oc' ba i buts te' tsa' ba c pac'a mu' ba i wen colel. Jiñach c melbal tsa' ba c mele. Ñuc mi caj c pas c ba ti' tojlelob. ²²Jini mach ba ñuquic mi caj i p'ojlel ti jump'ejl mil. Jini jump'ejl ala colonia mi caj i colel ti colem tejclum. Joñon la' Yumon. Mi caj c ts'actesan che' i yorajlelix.

I tsictesantel i coltantel Israel

61 An i yEspíritu lac Yum Dios tic pusic'al, come lac Yum tsi' yajcayon cha'an mic subeñob jini wen t'an jini utso' ba. Tsi' chocoyon tilel cha'an mic lajmesabeñob i ch'ijyemlel i pusic'al jini ch'ijyemo' ba, cha'an mic subeñob loq'uel jini ñup'ulo' ba, cha'an mic jambeñob i ti' majquibal ba' ñup'ulob, ²cha'an mic subeñob i yorajlelix mi' pastal i yutslal i pusic'al lac Yum. Tal to jini q'uin che' mi caj i quextan mulil lac Dios. Chocbilon tilel cha'an mic ñuq'uesabeñob i pusic'al pejtel woliyo' ba ti uq'uel. ³Mi caj j coltan jini woli ba i tsicob i pusic'al ti Sion. Mi caj caq'ueñob i ch'ajlil i jol i wenta tañil c'ajc. Mi caj caq'ueñob i tijicñayel i pusic'al i wenta uq'uel. Mi caj c lajmesabeñob i wocol cha'an mi' cajelob ti c'ay cha'an

ñucon. Toj mi caj i q'uejlelob. P'atɔl mi caj i yajñelob che' bajche' c'olol wen chucul bɔ i wi'. Tsac pɔc'ayob cha'an mi' tsictesañob c ñuclel.

⁴Mi caj i cha' melob jini jejmen bɔ otot tac am bɔ ti wajali. Mi caj i wa'chocoñob. Mi caj i cha' melob jini tejclum tac tsa' bɔ jejmi ti yan tac bɔ ora. ⁵Jini ñajt bɔ tilemob mi caj i cantañob la' tiñame'. Mi caj i q'uelob la' chol yic'ot la' ts'usubil. Jini mach bɔ anic tsi' cɔñayob Dios ti ñaxan wolix i melbeñetla la' we'tel. ⁶Jixcu jatetla mi caj la' pejcantel ti "motomajob i cha'an lac Yum" yic'ot "x'e'telob i cha'an Dios". Jini wen chumulo' bɔ ti yan tac bɔ lum mi caj i yaq'ueñet la' majtan. Mi caj i wen p'ojlel la' chubɔ'an. Wen ñuc mi caj la' q'uejlel. ⁷Tsa' la' wubi quisin che' bɔ tsa' a'lentiyetla, pero mi caj la' wɔq'uentel cha'yajl i ñumel la' majtan cha'an mi' cha' ñuc'an la' pusic'al. Che' jini mi caj la' wen chumtɔl ti la' lum. Mi caj la' taj la' tijicñayel mach bɔ yujilic jilel.

⁸Come joñon la' Yumon. Mij c'uxbin chuqui tac toj, pero mic ts'a'len xujch' yic'ot tsansa. Mi caj cɔq'ueñetla la' chobejtɔbal. Mi caj c mel xuc'ul bɔ t'an quic'otetla mach bɔ yujilic jejmél ti pejtelel ora. ⁹Mi caj la' cɔjñel ti' tojlel yan tac bɔ tejclum cha'an mero i p'olbaletla Israel. Majqui jach mi' q'ueletla mi caj i ña'tan c'uxbibiletla c cha'an. Che' tsi' yaɔɔ lac Yum.

¹⁰Cabɔl mi' ñuc'an c pusic'al cha'an lac Yum. C'ax tijicña jax mi cubin cha'an c Dios, come tsi' coltayon. Tsi' yaq'ueyon toj bɔ c pusic'al. Tsi' yaq'ueyon c lap wen uts'atax bɔ pisil yubil, che' bajche' xñujpuñijel mu' bɔ i ch'ɔl i bɔ, che' bajche' xch'oc mu' bɔ caj ti ñujpuñijel mi' ch'ɔl i bɔ ti wen letsem tac bɔ i tojol. ¹¹Lac Yum mi caj i mel ti toj jini colem tejclum tac. Che' bajche' jini lum mi' yaɔ' ti coled lac pɔc'bal, che' bajche' mi' pasel pimel yic'ot nichim, che' ja'el lac Yum Dios mi' yaɔ' ti pasel chuqui tac toj ti' tojlel i tejclumob. Che' jini mi caj i c'ayibeñob i ñuclel Dios pejtelel tejclum tac.

62 Lac Yum woli' yaɔ: Mach ñach'alic mi caj j cɔytɔl, come c'ux mi cubin Sion. Mic p'untan Jerusalén. Ma'anic mi caj j c'aj co jinto mi' mel chuqui toj, jinto che' coltɔbilix cha'an mi' pam tsictiyel c tojel che' bajche' i saclel q'uin, che' bajche' c'ajc woli bɔ ti lejmel, che'en. ²Pejtelel tejclum tac mi caj i q'uelob toj a pusic'al. Pejtelel jini yumɔlob mi caj i q'uelob a ñuclel. Lac Yum mi caj i yaq'ueñet tsiji' bɔ

a c'aba'. ³A t'ojol jax ti' c'Ab che' bajche' corona. I ch'ajlibet rey ti' c'Ab Dios cha'an ma' pAs i ñuclel i yumΔtel. ⁴Ma'anix majqui mi caj i yAl “cAybilet”. Ma'anix majqui mi caj i yAl “jisAbil a lumal”. Mi caj i yAllob “c'uxbibilet i cha'an lac Yum” yic'ot “pAybilet che' bajche' ti' ñujpuñijel”, che'ob, come tijicña mi' q'uelet lac Yum. Ñujpuñemet yic'ot. ⁵A walobilob mi caj i c'uxbiñet, Jerusalén. Wen tijicñayob i pusic'al che' bajche' xñujpuñijel mu' bA i pAy xch'oc cha'an i yijñam. Che' ja'el tijicña i pusic'al a Dios ti' a tojlel.

⁶⁻⁷Joñon a Yumon, Jerusalén. Tsa'ix c wa'choco xcAntayajob ya' ti' ts'ajquil a tejclum mu' bA caj i pejcañonob ti oración ti q'uiñil yic'ot ti ac'Allel. Jatetla mu' bA la' c'uxbiñon mach yomic mi la' cAy la' pejcañon. Mach mi la' waq'ueñon j c'aj co jinto mic tilel c cha' wen'esan Jerusalén, jinto che' tsa'ix c cha' mele ti uts'at, che' cha' anix i ñuclel Jerusalén ila ti pañimil. ⁸Tsa'ix c wa'choco c t'an. Tsa'ix c letsa j c'Ab yujil bA e'tel. Ma'anix mi caj c chAn aq'ueñob i c'ux a trigo a contrajob. Jini ch'oyolo' bA ti yamba lum, ma'anix mi caj i japob a vino tsa' bA a mele. ⁹Jini mu' bA i cha'leñob c'ajbal mi caj i c'uxob i wut. Mi caj i subob c ñuclel. Jini mu' bA i tue'beñob i wut ts'usub mi caj i japob i ya'lel ya' ti' pat jini ch'ujul bA Templo c cha'an. ¹⁰Winicob x'ixicob, ochenla, ochenla ti' ti' tac Sion. ChajpAbenla i bijlel c cha'año' bA cha'an mi' sujtelob. Wen melela jini colem bij. Loc'sanla pejtelel mu' bA i mActan. Letsanla i bandera Israel. ¹¹La' wilan, tsa'ix cAc'A ti ubintel c'AlAl ti' ñajtlet pañimil: Subeñob c cha'año' bA: “Joñon la' Yumon, la' Dioson. Talon cha'an mij coltañetla. Mi caj cAq'ueñetla cabAl la' majtan”. ¹²Mi caj i pejcAntelob jini israelob ti Chujul bA Tejclum, yic'ot ColtAbilo' bA i cha'an i Yum. Jixcu Jerusalén, mi caj i yotsabentel i c'aba' ti SaclAbil bA Tejclum, yic'ot Tejclum mach bA cAybilic. Che' tsi' yAlA lac Yum.

Lac Yum mi' yaq'uen castigo i contrajob

63 ¿Majqui jini ñuc bA loq'uem bA ti Bosra am bA ti Edom? LApAl i cha'an wen i t'ojol jax bA i pislel, ts'ajbil bA ti chAccojan bA. Talix ti xAmbal yic'ot cabAl i p'AtAllel. Dios tsi' jac'A: JoñoñAch a Yumon. Mic sub chuqui toj. P'AtAlon, wen cujil coltaya, che'en. ²¿Chucoch chAccojan a bujc, che' bajche' i bujc jini mu' bA i pets' t'uchtan loq'uel i ya'lel ts'usub?

³Dios tsi' jac'Λ: C Bajñel jach tsac pets' t'uchta loq'uel i ya'lel ts'usub ti EDOM, come ma'anic c pi'Λl ti e'tel. Tic mich'ajel tsac pets' t'uchta j contrajob. Tsac teñeyob tic mich'ajel. Jini cha'an tsi' wijts'ayon i ch'ich'el. Tsa' laj pΛjq'ui c pislel. ⁴Tsac wΛn ña'ta jini q'uin. I q'uiñileΛch i q'uextantel mulil. Wolij coltan c tejclum cha'an mi' loq'uelob ti' wenta jini mu' bΛ i tic'lañob. ⁵Tsaj q'uele ma'anic majch woli' coltañob mi juntiquilic. Tsac mele c pusic'al cha'an ma'anic majch tsi' jac'Λ i coltañob. Jini cha'an tic mich'ajel tsaj coltayob tic bajñel p'ΛtΛlel. ⁶Tic mich'ajel tsac pech' teñe winicob mach bΛ anic tsi' cΛñayob. Tsac xiq'uuyob ti yajlel. Tsac jisayob. Yolocña tsa' majli i ch'ich'el ti lum. Che' tsi' yΛΛ Dios.

I yutsllel lac Yum ti' tojlel Israel

⁷Mi caj c cha' sub jini ñuc tac bΛ a we'tel c Yum, cha'an tsa' p'untayon lojon. Ñuquix c pusic'al cha'an tsa' wen pΛsbeyob israelob i yutsllel a pusic'al. Uts tsa' pΛsΛ a bΛ tic tojlel lojon. Tsa' wen coltayon lojon c'ΛlΛl ti oñiyi. ⁸Tsa' wΛΛ: C cha'añetla. Ma'anix mi caj la' chΛn cΛyon, che'et. Jini cha'an tsa' coltayon lojon. ⁹Ti pejtelel i wocol c tat lojon tsa' wubi wocol. A bajñel tsa' coltayob ti a c'uxbiya, ti' yutsllel a pusic'al. Tsa' ch'uuyob letsel ti a c'Λb. Tsa' meq'ueyob majlel. Ma'anic tsa' wis cΛyayob.

¹⁰Pero tsi' ñusayob a t'an. Tsi' yΛq'ueyob i ch'ijiyemlel i pusic'al jini Ch'ujul bΛ a wEspíritu. Jini cha'an tsa' sujtiet ti' contra. Tsa' p'ojlesabeyob i wocol. ¹¹Ti' caj i wocol tsa' caji i cha' ña'tañob Moisés i winic Dios tsa' bΛ i pΛyΛ loq'uel c tat lojon ti Egipto. C'am tsa' caji i yΛlob: ¿Baqui an lac Yum tsa' bΛ i pΛyΛ ñumel ti colem ñajb jini israelob ti' c'Λb Moisés che' bajche' xcΛnta tiñame'? ¿Baqui an Dios tsa' bΛ i choco tilel Ch'ujul bΛ i yEspíritu cha'an mi' yajñel yic'ot c tat lojon? ¹²¿Baqui an jini tsa' bΛ i t'oxo jini colem ñajb ti ñuc bΛ i p'ΛtΛlel che' bΛ tsi' sats'Λ i c'Λb Moisés? Che' jini tsi' yac'Λ i bΛ ti cΛjñel cha'an mi' ña'tantel ti pejtelel ora. ¹³¿Majqui tsi' c'axtesayob ya' ba' tam jini ja'? Toj tsa' majliyob che' bajche' caballo ti tiquiñal pañimil. Ma'anic tsi' jats'ayob i yoc. ¹⁴Jini Ch'ujul bΛ a wEspíritu tsi' yΛq'ueyob i c'aj i yo che' bajche' wacax ti jamil. Che'Λch tsa' toj'esa majlel a winicob. Ñuc tsa' pΛsΛ a bΛ ti' tojlelob, che'ob.

Tsi' c'ajtibeyob Dios i coltāntel

¹⁵C Yum, añet bΛ ti chan, añet bΛ ti ch'ujul bΛ a chumlib i t'ojol jax bΛ, q'ueleyon lojon. ¿Baqui an a c'uxbiya? Cha' pΛsbeñon lojon a p'ΛtΛlel yic'ot ñuc bΛ a melbal. Mach a tats' a bΛ tic tojlel lojon. ¹⁶Mach chΛn mejlix i coltañon lojon jini Abraham yic'ot Jacob, pero mi mejlel jatet, come c Tatet lojon, Caj Coltayajet lojon. Jiñach a c'aba' ti pejtelel ora. ¹⁷C Yum, ¿chucoch ma' wΛc'on lojon ti sajtel ba' mach c tajayic a bijlel? ¿Chucoch ma' tsats'esan c pusic'al lojon? Jini cha'an ma'anix a bΛc'ñΛntel ti' tojlel winicob. Sujten tic tojlel lojon, come a cha'añon lojon che' bajche' jaymojton lojon. C'ux ma' wubin a winicob. ¹⁸Jini Jerusalén poj jumuc' jach an tic wenta lojon. Tsa' juli laj contrajob. Tsi' chilbeyon lojon. Tsi' t'uchtayob. ¹⁹C Yum, ¿chucoch ma' q'uelon lojon che' bajche' sajtem bΛ mach bΛ i cañayetic, mach bΛ anic mi' yumañet, jini parte bΛ i c'aba' mach bΛ a walobilic?

64 Uts'atax muq'uic a jam jini panchan cha'an ma' jubel tilel. Che' jini mux i ñijcan i bΛ jini wits ti bΛq'uen che' ma' t'uchtan. ²Lajal a ñuclel che' bajche' c'ajc mu' bΛ i pul jini colem te'el tac, mu' bΛ i yΛc' ti lojc jini colem ñajb jinto mi' lu' tiquesan. Tsiltsilña ti bΛq'uen jini colem tejclum tac ti a tojlel. Ma' wΛc' ti cañnel a c'aba' ti' tojlel a contrajob. ³Tsa' pΛsbeyob bΛbΛq'uen bΛ a melbal mach bΛ anic tsac pijta lojon. Che' bΛ tsa' jubiyet tilel, tsi' ñijca i bΛ colem wits ti a tojlel. ⁴C'ΛlΛl wale ma'anic ba' wis ubibil i cha'an winicob yambΛ dios bajche' jatet. Ma'anic yambΛ cambil bΛ c cha'an lojon mu' bΛ i mel ñuc tac bΛ i ye'tel cha'an mi' coltan jini mu' bΛ i ñop ti' xuc'tilel i pusic'al.

⁵Jatet ma' ch'Λm ti a wenta jini mu' bΛ i tijicñesan i bΛ ti' melol chuqui toj, mu' bΛ i c'ajtesañet baqui jach mi' majlel. Pero mach tojonic lojon. CabΛl lojon c mul. CabΛl tsa' jal'ayon lojon ti mulil. Jini cha'an mich'et. ¿Mejl ba c taj lojon j coltāntel? ⁶Tic pejtelel lojon bibi'on lojon ti a wut cha'an lojon c mul. Ma'anic ma' q'uel ti uts'at wen bΛ c melbal lojon. Che' yilalob ti a wut bajche' tuwix bΛ pisil. Lajal mi' jilel laj c'Λñibal che' bajche' mi' tiquin i yopol te'. Cha'an c mul lojon mic pΛjyel lojon majlel. ⁷Ma'anix majch mi' chΛn ña'tan a

c'aba'. Ma'anix majch mi' c'ajtibeñet i p'untantel. Jini cha'an tsa' mɔɔɔ a wut tic tojlel lojon. Tsa' cɔɔɔyon lojon ti' p'atɔɔlel c mul lojon.

⁸Pero c Yumet lojon, c Tatet lojon. Añon lojon ti a c'Ab che' bajche' oc'ol ti' c'Ab xmel p'ejt. Tic pejtelel lojon a melbalon lojon. ⁹C Yum, mach a chɔn mich'an. Mach yomic cɔɔɔɔ jax a mich'ajel. Mach ma' chɔn c'ajtesan c mul lojon. Q'ueleyon lojon, awilan a cha'añon lojon. ¹⁰Tsa'ix sujti ti tiquiñal bɔ pañimil jini ch'ujul bɔ a tejclum tac ti Israel. Jisɔbilix Jerusalén. ¹¹Laj pulemix ti c'ajc jini ch'ujul bɔ Templo, jini i t'ojol jax bɔ baqui tsi' ch'ujutesayetob c ñojte'el lojon. Laj jisɔbilix pejtelel jini c'uxbibil bɔ c cha'an lojon. ¹²Q'uelelix a cha'an pejtelel ili wocol, c Yum. ¿Mach ba anic chuqui mi caj a tumben? ¿Ñach'ɔl ba mi caj a cɔɔɔɔ jinto ma' wen peq'uesañon?

I castigo jini xñusat'añob

65 Lac Yum tsi' yɔɔɔ: Tsa cɔc'ɔ c bɔ ti cɔjñel i cha'an jini mach bɔ anic tsi' c'ajtiyoñob. Tsi' tajayoñob jini mach bɔ anic tsi' saclayoñob. Tsac subeyob jini mach bɔ i cɔñayoñobic: “Um ba' añon. La'la”, cho'on. ²Pero ti pejtelel q'uin wolic chɔn pɔɔ c cha'año' bɔ. Tsi' ñusayob c t'an. Tsi' tsajcayob i bijlel jontolil yic'ot chuqui tac jach yomob. ³Mi' chɔn xic'oñob ti mich'ajel, come ñɔmɔlob ti dioste' tac. Mi' ch'ujutesañob ti pɔc'ɔbɔɔ. Mi' pulbeñob pom ti pulantib melbil bɔ ti ladrillo. ⁴Ti ac'ɔlel mi' majlelob ba'an mucoñibal yic'ot ch'en tac cha'an mi' ch'ujutesañob xibajob. Mi' tsɔnsɔbeñob chitam cha'an mi' c'uxob i bɔc'tal yic'ot yambɔ tic'bil tac bɔ i bɔɔ i ñɔc'. ⁵Mi' lon subeñob i bɔ: “Calen ya'i, mach a tɔlon, come wen sɔcon. Bibi'et”, che'ob. Jini winicob mi' techbeñoñob c mich'ajel. ⁶Ts'ijbubil pejtelel iliyi ba' q'uelel c cha'an. Mach ñach'ɔlic mi caj j cɔɔɔɔ. Mi caj j q'uextɔbeñob i mul. ⁷Mi caj i tojob i mul, yic'ot i mul i tatob. Come junlajal tsi' puluyob pom ti wits. Tsi' ts'a'leyoñob ti bujbujtɔɔ. Jini cha'an mi caj cɔq'ueñoñob i toj i mul. Che' bajche' an i melbalob, che'ɔch mi caj c p'isbeñoñob i wocol.

**Lac Yum mi' wen coltan jini toj ba, pero
mi' jisan jini xnusat'añoob**

⁸Lac Yum woli' yaL: Ma'anic mi caj c laj jisañoob, come mach junlajalobic. Mi caj c yajcañoob che' bajche' mi la' yajcan ts'usub ya' ti ts'usubil ba' xabal uts'at ba ts'usub yic'ot mach ba uts'atic. Mi' la' wal: “Mach ma' wac' ti sajtel jini wen ba, come añach i c'ajñibal lac cha'an”, che'etla. Che'ach mi caj c mel ti' tojlel israelob. Ma'anic mi caj c lu' jisañoob come c'ux mi cubin c winicob. ⁹Mi caj cac' ti p'ojlel i p'olbalob Israel. Mi' cajelob ti chumtal ti ch'ujul ba wits ti Judá jini yajcabilo' ba c cha'an. I cha'añoobix mi' majlel jini lum. Ya' mi caj i yajñelob x'e'telob c cha'an. ¹⁰Pejtelel jini joctal ti Sarón mi caj i sujtet cha'an i buc'ujib tiñame'. Jini joctal ti Acor mi caj i yochel cha'an i potrero wacax. I cha'añoobach jini winicob mu' ba i saclañoob. ¹¹Pero jatetla mu' ba la' tats' la' ba tic tojlel, mu' ba la' ts'a'len jini Templo, mu' ba la' ch'ujutesan jini dios Gad, yic'ot jini dios Meni, ¹²mi caj caq'uetla ti tsansantel ti espada. Ti la' pejtelel mi caj la' majlel ti tsansantel. Come che' ba tsac payayetla, ma'anic tsa' la' jac'beyon. Che' ba tsac pejcayetla, ma'anic tsa' la' wubiyon. Tsa' la' mele jontolil ti' tojel c wut. Tsa' la' yajca chuqui tac ts'a'lebil c cha'an.

¹³Jini cha'an lac Yum Dios woli' subeñetla: Q'uelela c winicob. Mi caj i tajob chuqui mi' c'uxob, pero jatetla mi caj la' wubin wi'ñal. P'isi ti la' wenta. Jini c winicob mi' cajelob ti uch'el, pero jatetla mi caj la' wubin tiquin ti'. Ña'tanla, tijicña mi caj i yubiñoob c winicob, pero jatetla mi caj la' wubin quisin. ¹⁴Q'uelela c winicob. Mi caj i cha'leñoob c'ay cha'an i tijicñayel i pusic'al, pero jatetla mi caj la' cha'len oñel. Mi caj la' cha'len uq'uel cha'an ch'ijiyem la' pusic'al, come ma'anic la' coltantel. ¹⁵Mi caj i ña'tintel la' c'aba' che' bajche' p'ajoñel ti' tojlel jini yajcabilo' ba c cha'an, che'en. Lac Yum Dios mi caj i yaq'uetla ti tsansantel. Pero mi caj i yotsabeñoob yamba i c'aba' jini x'e'telob i cha'an. ¹⁶Majqui jach yom i tajben i yutslel Dios ti jini lum mi caj i wa'chocon i t'an ti' c'aba' jini isujm ba Dios, come ma'anix i ña'tantel wocol am ba ti yamba ora. Yajpemix tic wut a mul, che'en.

Tsiji' bΛ panchan yic'ot pañimil

¹⁷La' wilan wolic mel tsiji' bΛ panchan yic'ot tsiji' bΛ pañimil. Ma'anic mi caj i chΛn ña'tantel jini tsa'ix bΛ ñumi. Ma'anix majch mi caj i chΛn c'ajtesan. ¹⁸La' ñuc'ac la' pusic'al ti pejtelel ora. Yom tijicñayetla cha'an pejtjel jini woli bΛ c mel. Tijicña mi caj c cha' mel Jerusalén. Tijicña mi caj i yubiñob jini ya' bΛ chumulob. ¹⁹Joñon ja'el tijicña mi caj j q'uel Jerusalén. Tijicña mi caj j q'uel jini ya' bΛ chumulob. Ma'anix mi caj i chΛn ubintel uq'uel yic'ot oñel.

²⁰Ya'i ma'anix mi' chΛmelob alΛlob, mi jinic winic maxto bΛ ñoxobic. Mi an mu' bΛ i chΛmel che' an jo'c'al i jabilel, ch'iton to mi' chΛmel. Jini xmulil mu' bΛ i taj jo'c'al i jabilel che' mi' chΛmel cha'an i mul, ch'iton to mi' chΛmel. ²¹⁻²²Winicob mi caj i wa'chocoñob i yotot. Ya'i mi caj i chumtΛlob. Ma'anic majch mi caj i chilbeñob. Che' mi' pΛc'ob ts'usubil, mi caj i c'uxbeñob i wut. Ma'anic majch mi caj i xujch'ibeñob. Mi caj i tam'añob i jabilel che' bajche' i jabilel colem te'. Tijicñayob jini yajcΛbilo' bΛ c cha'an, come i cha'añobΛch pejtelel i wut i ye'tel. ²³Mach lolomic jach mi caj i cha'leñob e'tel. Mach cha'anic wocol mi caj i cosañob i yalobilob, come junlajalob i yalobilob yic'ot i tatob. I p'olbalobΛch jini coltΛbilo' bΛ i cha'an lac Yum. ²⁴Mi caj i yujtel che' maxto cajic i pΛyoñob, joñon mi caj c jac'beñob. Che' woliyob to ti t'an, mi caj cubiñob. ²⁵Jini bate'el ts'i' yic'ot tiñΛme' temel mi caj i cha'leñob buc'bal. Jini bajlum mi caj i c'uxe' jam che' bajche' wacax. Jini lucum am bΛ i veneno ma'anix mi caj i c'ux winicob. Ya' ti ch'ujul bΛ c wits ma'anic majch mi caj i tic'lan i pi'Λl. Ma'anic majqui yujil jisaya, che'en lac Yum.

Ti' contra jini payxo bΛ ch'ujutesaya

66 Lac Yum tsi' yΛΛΛ: Jini panchan jiñΛch c buchlib. Jini pañimil jiñΛch i yajñib coc. ¿Baqui mi caj la' wa'chocobeñon cotot? ¿Baqui mi caj la' melbeñon c chumlib ba' mij c'aj co? ²Pejtelel iliyi joñon tsac mele yic'ot j c'Λb. Tsa' jach caji ti ajñel cha'an jach com, che'en lac Yum. Majqui jach uts i pusic'al mi caj j q'uel ti uts'at. Che' ju'Λabilix i pusic'al mi' bΛc'ñañon, mi' jac'beñon c t'an. ³Mach uts'atic mij q'uel jini mu' bΛ i bajñel yajcan i bijlel, mu' bΛ i mel bajche' jach

yom i bajñel pusic'al. Che' mi' tsansabeñon tat wacax lajalach tic wut bajche' jini mu' ba i tsansan winic. Che' mi' tsansan tiñame' lajalach bajche' jini mu' ba i c'asben i bic' ts'i'. Che' mi' yaq'ueñon i wut jam tic majtan lajalach bajche' i ch'ich'el chitam. Che' mi' pulbeñon pom junlajal mij q'uel yic'ot jini mu' ba i ch'ujutesan dioste' tac. Jini mu' ba i bajñel yajcañob i bijlel mi' mulañob i mel chuqui tac ts'a'lebil c cha'an. ⁴Tsa'ix c yajcabeñob i wocol mu' ba caj c chocbeñob tilel. Chuqui tac mi' bac'ñañob mi caj c chocbeñob. Come ma'anic tsi' jac'beyoñob che' ba tsac pa'yayob. Che' ba tsac cha'le t'an ma'anic tsi' ñich'tayob. Tsi' cha'leyob jontolil ti' tojel c wut. Tsi' yajcayob i mel chuqui tac mic ts'a'len.

I colt'antel jini mu' ba i ñopob

⁵Ubinla c t'an pejteleletla mu' ba la' bac'ñañon, mu' ba la' jac'beñon c t'an. La' pi'llob mi' ts'a'leñetla. Mi' choquetla loq'uel ti' tojlelob cha'an c'ux mi la' wubin j c'aba'. Mi' wajleñetla: “La' i pas i ñuclel lac Yum. La' ñuc'ac la' pusic'al ti lac Yum”, che'ob. Pero mi caj i yajq'uelob ti quisin, che'en lac Yum. ⁶¿Chucoch ju'ucñayob ti t'an ya' ti tejclum? Ubinla t'an ya' ti Templo. Jiñach i t'an lac Yum. Woli' yaq'ueñob i toj i mul i contrajob. ⁷Ti pejtelel ora c'alal wale ma'anic ba' ubibil lac cha'an iliyi. Che' maxto i cha'le bajq'uel x'ixic, ¿mejl ba i yac' alal ti pañimil? Isujm, che' maxto anic woli ti c'oj'ol mi caj i q'uel pañimil ch'iton ba i yalobil. ⁸Ma'anic ba' q'uelbil lac cha'an. Isujmach jump'ejl tejclum mi caj i yilan pañimil ti jump'ejl jach q'uin. Bajc'al mi caj i ñopob Dios ti ora. Che' ba maxto anic tsa' caji ti bajq'uel Sion, mi caj i bac' ac' ti pañimil i yalobil. ⁹Joñon mi cac' ti cantantel alal. Joñon mi cac' ti lotol che' i yorajlelix mi' q'uel pañimil. Che' ja'el mi caj cac' ti pañimil cabal calobilob ti Sion, che'en lac Yum Dios.

¹⁰Yom tem tijicñayetla yic'ot Jerusalén. La' ñuc'ac la' pusic'al pejteleletla mu' ba la' c'uxbin. Wen tijicñayetla pejteleletla tsa' ba la' wuc'ta. ¹¹Yom tijicñayet che' bajche' alal che' cabal i ya'lel i chu' mu' ba i tsu'san. Che'ach i ñuclel Jerusalén. Yom temel mi la' ñaj'an yic'ot jini ya' ba chumulob, come ya' mi' p'ojlel pejtel chuqui wen. ¹²Come woli' ya' lac Yum: Mi caj caq'ueñob cabal i ñach'talel che' bajche' i yonlel colem ja'. Mi caj caq'ueñob i ñuclel ti' tojel pejtelel tejclum tac. Mi caj i

cuchbeñob tilel i chubla'an Sion che' bajche' i yonlel colem ja' che' mi' bujt'el. Mi caj i we'sañetla. Mi caj i meq'uetla, mi caj i xixbañetla ti' pix. ¹³Che' bajche' mi' xixban i yalobil x'ixic, che'ach mi caj c tijicñesañetla ja'el. Ya' ti Jerusalén tijicña mi caj la' wubin. ¹⁴Che' mi la' q'uel iliyi, tijicña la' pusic'al mi caj la' wubin. La' bac'tal mi caj i tsijibayel che' bajche' pimel. Che' jini lac Yum mi caj i yac' ti caljñel i p'atalel ti' tojlel jini x'e'telob i cha'an. Che' ja'el mi caj i yac' ti caljñel i mich'ajel ti' tojlel i contrajob.

¹⁵Come lac Yum mi caj i tilel yic'ot c'ajc. Mi caj i choc tilel wocol che' bajche' p'atla' bā ic' cha'an mi' jisan i contrajob che' calaxix i mich'ajel che' bajche' i nich c'ajc. ¹⁶Lac Yum mi caj i jisañob ti c'ajc yic'ot ti espada che' mi' melob ti' tojlel pejtél winicob. Cabalob mi caj i tsansantelob cha'an lac Yum.

¹⁷Temel mi caj i jilelob jini mu' bā i saq'uesañob i bā cha'an mi' ch'ujutesañob dioste' ya' ti ojilil pac'abā joyol bā ti te', yic'ot jini mu' bā i c'uxbeñob i bac'tal chitam yic'ot tsuc yic'ot yan tac bā bate'el mach bā saquic. Ti junyajl jach, mi caj i laj jisantelob. ¹⁸Come cambil c cha'an i pensar yic'ot i melbal pejtelel winicob. Jini cha'an mi caj c tempan tilel pejtelel winicob yujilo' bā t'an ti chajp ti chajp. Mi caj i tilelob cha'an meloñel. Mi caj i q'uelob c ñuclel. ¹⁹Mi caj cac' ti q'uelol i yejtal c p'atalel. Mi caj c choc majlel ti yambā tejclum tac jini coltābilo' bā c cha'an mu' bā i loq'uelob ti uts'at che' mic cha'len meloñel. Mux caj i majlelob ti Tarsis, ti Put, ti Lud, ti Mesec, ti Ros, ti Tubal, yic'ot ti Grecia, yic'ot ya' ba'an jini chumulob ti' ti'il ñajb ba' mach wis ubibilic i cha'añob c t'an, ba' mach wis q'uelbilic i cha'añob c ñuclel. Mi caj i tsictesabeñob majlel c ñuclel ti pejtelel tejclum tac. ²⁰Mi caj i lu' payob tilel la' pi'alob loq'uemo' bā ti pejtelel tejclum tac, i wenta i majtan lac Yum. Mi caj i sujtelob ti caballo, ti carreta, yic'ot ti ab, yic'ot ti mula, yic'ot ti camello, ti ch'ujul bā wits ti Jerusalén, che'en lac Yum. C majtañach che' bajche' i wut jam tsa' bā i ch'ambeyoñob tilel israelob cha'an mi' yotsañob tic Templo. ²¹Mi caj cotsan lamital ti motomajob yic'ot ti lev'ijob, che'en lac Yum.

²²Jini tsiji' bā panchan yic'ot tsiji' bā pañimil mu' bā caj c mel, mi caj i chān ajñel ti pejtelel ora. Che' ja'el mi caj i chān ajñelob la' p'olbalob tic tojlel. Ma'anic mi caj i ñajayel la'

c'aba'. ²³Ti jujump'ejl uw ti' q'uiñilel tsiji' bɔ uw, ti jujump'ejl semana ti q'uiñilel c'aj o, mi caj i tilelob pejtelel winicob cha'an mi' ñocchocoñob i bɔ tic tojlel. ²⁴Che' mi' cha' majlelob, mi caj i q'uelbeñob i bɔc'tal jini chɔmeño' bɔ tsa' bɔ i ñusayob c t'an. Mach chɔmic i motso' ti pejtelel ora. Mach yajpic jini c'ajc mu' bɔ i pulob. Ts'a' mi caj i q'uelob pejtél winicob, che'en lac Yum.